

EXPOSITIONES

In aliquos

HIPPOCRATIS
ÆGROTOS,

Admodum practicabiles.

AUCTORE

STEPHANO RODERICO
Castrense Lusitano.

OLIM SERENISS. MAGNI DVCIS ETRVRÆ
Sanitatis Confiliario, & in Pisana Academia
Medicinam Supraordinario loco
docente.

SVPERIORVM PERMISSV.



VENETIIS, M. DC. LVI.

Apud Franciscum Brogiollum.

EXPOSITIONS

In aliquos

HIFFORATIS

AGROTOS

et alios similes.

ATOTIS

STEPHANUS RODERICUS

AGROTOS

AGROTOS

AGROTOS

AGROTOS

AGROTOS



VENETIIS. M. DC. LVI.

Apud Franciscum Brognium

3
Illustrissimo, ac Generosissimo Domino

D. MARCO DE MARTELLIS.

Senatori Florentino.

FRANCISCVS CASTRENSIS

STEPHANI FILIVS F. P.

EA est Solis benefica in omnes natura, vt vno eodemque tempore, & sublimia Regum palatia, & infimas rusticorum, pastorumque tabernas collustret; neq; propterea æthereæ suæ sublimitati quidquam detrahat, immo maiori inde laude dignus acclametur. Ita Illustrissima D. tua instar ipsius Solis eximiae suæ virtutis radijs hoc tenue quidem munusculum, sed singulare meæ erga eam obseruantiae monumentum, illustrare dignetur: præsertim cùm sit opusculum à Parente meo, suoque olim addictissimo cliente elaboratum. Igitur enixè oro, vt læta fronte hoc, quândocumque est muneris, accipere velit: dicamque cum meo Genitore.

Sint tua facta mihi, quod mea Musa tibi.

MARCVM MARTELLVM SENATOREM FLORENTINVM.

CARMEN.

Francisci Castrensis, quo ei hoc opus Stephani
Roderici Castrensis Patris
Dicat.

Lumine spargebat primo Tithonia Coniux
Terras puniceis lutea vecta rotis.
Autior irriguos somnus laxauerat artus,
Cum visa est oculis umbra inopina meis.
Charior Elysij domibus quæ venerat umbra,
Scilicet occurrit tristis imago Patris.
Qui mihi, longa trahens suspiria pectore ab imo,
Hos lacrymis mixtus fudit ab ore sonos.
Quid iuuat innumeras noctes vigilasse serenas.
Quidve dies tantos euigilasse iuuat?
Profuerit quid lingua bonas edocta per artes,
Profuerint mentis quid monumenta mea?
Si tamen hæc pateris tenebris obducta iacere,
Publica per longos nec finis ire dies.
Proh dolor! haud versent scripta expectata Nepotes,
Posteritas tanta destituatur ope.
Si te tangit Amor fœtus, è faucibus Orci
Eripe, tu libros denique cude meos.
Vna Flumentinas inter MARTELLIA gentes
Gens micat, egregijs nobilitata Viris.
Illustres animas dedit hac de gente Vetustas,
Sæcula, & illustres vestra dedere viros.

Quid

Quid referam M A R C V M , nulli probitate secundum ,
Ac Animo vigilem, Consilioque grauem .
Quem sibi purpureos inter Florentia Patres
Omnia delegit munia obire parem .
Si mæcenatem iactabat Romula tellus ,
Iactat Flora animo largificoque suum .
Nate, typis chartas vrgendas, munere M A R C O
Des nostras, largas ipse refundet opes .
Quæ super egrotis scripsit, præcepta, Magister
Cous, tot studiis enucleata meis,
Huic modo fac dones ; modò nostris abnue dictis,
Vt viuam semper docta per ora virum
Talia fatus erat, cum chara simillima ventis
Conspectu è nostro fugit imago Patris .
Accipe iam (facilis) Genitor, quæ munera mittit,
Muneraquæ Natus reddere iussus auct.
Accipe parua quidem meritis : sed munera digna,
Munere, nam gemini munera Cordis habes .



6
A V C T O R I S
E L O G I V M.

Illustrissimo Domino

VALENTINO
FARINOLÆ.

Sereniss. Magni Ducis Etruriæ
Auditori.



*Apientia, ac virtutum caterarum simili-
tudo animum tuum animo Stephani
Castrensis arctissimè agglutinavit. Tibi
igitur iure meritòque imago eius dicanda. Vale.*

CLarorum virorum ingenij monumenta ir-
requieta manu versare vtile, mores intue-
ri iucundum. Stephani Castrensis Philosophi, ac
Medici præstantissimi scripta mortales omnes
mirantur, nec immeritò, cuius imaginem viri
nunc quasi carbone delineare animus fert. Pa-
tria ei Vlyssipo celeberrimum Europæ totius
Emporium, vbi Parentibus Francisc. Rodriguez
Castrensi, & Isabella Aluares honesto loco natis
oritur xiii. Kalendas Decemb. M. D. LXII. Glo-
riam,

riam, quam à natali solo nascens acceperat, præ-
 claris lucubrationibus eidem magno fœnore,
 redditurus. Viuida ei mens, & amœna. In palæ-
 strâ litterariâ Musis se primum addixit, ac multus
 in Poesi fuit, Elegos, epigrammata, & heroica
 scripsit suauiter, acutè, grauitè, ac neruosè. Theo-
 logiæ non ignarus, Philosophiam, ac Medici-
 nam in Conymbricensi nobili Academia toto
 pectore hausit. Sciendi amore adeò flagrabat,
 vt quotidie solidas viij. horas studendo infume-
 ret. Felix qui nullam diem perdidisse, nullamq;
 sine plurimis lineis præterisse, àc plus olei quam
 vini adhibuisse gloriari poterat. Mero rarissimè,
 eoque optimè diluto utebatur. Aqua sitim cre-
 brò restinguebat, atque impigrè capaces frigida
 pateras haurire, ac pleno se proluere crysallo so-
 lebat. In medendo virtuti eius fortuna comes
 fuit. Semino morborum Lynceus introspecie-
 bat, remedijs ditissimus & vberimus, in præsa-
 giendo euentu felix; quoad æger spiritum duce-
 ret nunquam desperationi succumbebat, liquidò
 commostrans, magnæ indolis esse sperare sem-
 per. Vbi enim Medicus despondet animum, egro-
 tus tristitia obruitur, & mens consternata, ac ve-
 lut effētis viribus, remedia pertinax auersatur.
 Quo facilius omni domestica cura solutus sa-
 pientiæ litaret, Genoeuam Figueiram splendi-

dis natalibus ortam, ac bene nummata duxit uxorem; vixeruntque ambo mira concordia, per mutuam charitatem inuicem se anteponendo. Ex ea liberos tres suscepit Franciscum nunc superstitem, Antonium, & Martinum, qui iam è vita migrarunt. At desiderio præclariores Italia Vrbes perlustrandi motus, patriam relinquere decreuit, ac post longum iter Florentiam cum venisset, florentissimæ Ciuitatis fama, oculis proprijs testibus, captus hic sedem fixit; nec latere præclara hominis virtus diù potuit. Gerius de Spinis Senator, ac Iurisconsultus insignis atroci, ac penè conclamata valetudine laborabat, sed breui huius industria feliciter incolumitati redditus. Facinus in præclaro viro maximam nominis famam eicomparauit. Sacerdos quidam Scalandronius vulnus alebat venis, & cœco febrium igne carpebatur; noster Erasistratus vocatus vasculo frigidæ accepto ægroti faciem nihil tale suspicantis repentè perfudit; ità natura irritata resumptis viribus profligata febre morbum superauit, hinc apparet Medicum solertem graues, & periculi plenas egritudines leuibus, & facillimis remedijs persæpè discutere, Sereniss. Cosmi II. Magni Etruriæ Ducis, qui diuturno conflictabatur morbo, valetudinem recreauit, eiusque in itinere Lauretano comes à Sereniss. Francisco Ma-

ria Urbini Duce optimo ingeniorum æstimatore, qui eum super mensam audierat, commendatus est; quare Magnus Dux rediens publicè professus est: Stephanus Castrensis sua virtute nobis honor fuit. Aloysius Cardinalis Capponius in ancipiti ac diuturna valetudine viri opem expertus, ita, literis ad eum datis, eius Encomium paucis, sed grauibz verbis absoluit. Se numquam Medicū ei similem (per multis ob diutinam egritudinem vsus erat) cognouisse. Sereniss. Ferdinandus Mātuæ Dux ancipiti morbo periclitabatur, inter diffidentes Medicos vnus Stephani Castrēsis consilio acquieuit. Anno 1630. sæua lues ciuitatem Florentinam affligebat: magno publico bono Magistratus Sanitatis à consilijs deligitur; ex eius ingenij fonte multa vtilia feliciter profluxerunt. Sereniss. Ferdinandus II. M. Dux de Stephano dicere solitus erat. Quoties virum hunc audio, semper aliquid nouæ cognitionis acquirō. Viginti annis in Pisano Lyceō mille aureorum stipendio, ac Supraordinarij titulo medicinam docuit. Ingentem gloriæ segetē adeptus sui nominis fama Lusitaniam, & Italiā impleuit. Vulgo iactabatur, Paroemia opus esse egroris, si valere cuperent, Medicum Lusitanum vocare. Ita emenso vitæ curriculo 78. ætatis anno, die Apostolorum Principi sacro, hora xx. mortalitatem expleuit; magna-
cum

cum religionis laude, totius vite noxas Patri Laurentio Cocchio Theatinorum familia confessus, spei plenus discessit, Francisco filio, amplum gloria Patrimonium, relinquens. Qui pius æquè, ac gratus Parentis fætus latentes in tenebris magna diligentia, ac labore conquisitos in lucem edidit; totidem signa auro pretiosiora, atque ære firmiora immortalitatis in Templo Patri optimè merito statuens: humatus est in Saluatoris Ecclesia, tota Ciuitate eius laudibus personante: Candorem animi, auri negligentiam, beneficam in egenos manum, ac voluntatem alijs extollebant; alijs scientiarum supellectilem, Medicinæ, ac Philosophiæ thesauros in animo eius commorantes, humaniorum literarum ornamenta, suspiciebant. Plerique, ammisso tanto viro, iacturam non vulgare lacrimabatur. Ita funus, veluti triumphus, persolutum. Huius viri effigies veneranda inter illustrium Virorum imagines, quæ in augustissima Sereniss. Magni Etruriæ Ducis Pinacotheca asseruantur exposita est. Discant omnes eius exemplo inscitiam, ac desidiam fugere, alijs prodesse, sapientiam sectari; nam Stephanus Castrensis memoria virtutum per ora virum volitans, vsq; ad mundi decretoriam diem superstes erit, &c.



STEPHANI

RODERICI

Castrensis Lusitani.

PROÆMIUM.



Vicumque arduum, & difficile Medicina iter suscipit summa spe niti debet, ut experimento, & ratione simul (quæ duo sunt eiusdem artis crura) incedat. Simul dixi: nam seorsim vel Empiricum, vel metho-

dicum faciunt: Empiricum sola experientia, methodicum sola ratio, utraque dogmaticum. Porro dogmaticorum princeps Hippocrates si historias, & singularem exempla omitteret, methodicus fieret: quippe methodici ars notitia quædam est communitatum, non proprietatum tanquam communem, & generalem hominem, non particularem curandum suscipiat. Si ex altera parte, in sola historia consisteret, empiricum imitaretur, qui, tametsi aliquid sæpissimè simili modo conspiciat, nullum tamen inde theorema artificiosum

*Gal. 8.
met. c. 7.*

*Gal. 3.
met. c. 7.*



G. 2. dif-
ficul. re-
sp. c. 7.

sum constituit. Quid ergo? rationem quidem historia
coniumxit. Hoc non intelligebant veteres, quos redar-
guit Galenus, quippe Hippocratem cum Thucydide
comparabant. At Thucydides omnia scripsit, etiam
idiotis nota, nihil ipsorum penitus prætermittens. Hip-
pocrates verò pauca ex ijs, quæ ad totam affectionem
pertinent, circa quam ægrotus est periclitatus, multa
verò alia ab idiotis quidem neglecta artificiosam ve-
ro, & exactam cognitionem exhibentia, et quæ etiam
optimos Medicos sæpe latere possunt, scriptis manda-
uit. Denique Thucydides quicquid circa ægrotos
contingit, velut idiota idiotis scripsit. Hippocratis
vero, ut artifex artificibus. Vos autem ô Iuvenes,
qui medicinæ sacris initiamini, & iam philosophiæ
præceptis imbuti ad Hippocraticos fôtes acceditis, dum
adhuc per vos ipsos experiri nequitis, quicquid exer-
citatus ratione vir, longa observatione, & multorum
annorum euentibus acquisiuit, attento animo consi-
derate, & utilitatem capturi, memores mente reponi-
te. Ego, quæ meæ sunt partes, difficiliora explanabo,
& quicquid præfari libet, paucis quibusdam, nec ina-
nibus quæsitis in præsentia complebo.



PRIMUM QVAESITVM.

*Quid impulit Hippocratem, vt historias
scriberet?*

TRiplex mihi occurrit ratio, quæ sapientif-
simum senem, vt historias conscriberet,
persuasit. Prima. quoniam (vt ipse initio apho-
rismorum suorum scripsit) *vita brevis ars vero
longa*. Porro vitæ breuitati consulens artem lon-
gissimam voluit decurtare: idcirco historias cō-
scripsit: *cum enim* (vt Galenus ait) *vnus hominis* *G. de sub*
vita ad omnium inuentionem sufficere nequeat, longi *figur. em*
temporis obseruationes historia colligit, vt eius bene- *piric. c. 9*
ficio; tamquam ex multis tot seculorum hominibus,
vnus efficiatur eruditissimus. Altera. cum artis fun-
damenta iaceret, instrumentis ad inuentionem
aptis, & fide, quæ nouarum rerum inuentoribus
difficuler præstari solet, opus habuit. Ratio, & *G. 3. me-*
experimentum, ex Galeno, inuentionis sunt in- *th. c. 12.*
strumenta, & simul, ex eodem, inuentorum fi- *de sang.*
dem faciunt. rursus ratio, & experimentum, vt *miss. c. 3.*
diximus in historijs, locum habent. Merito er- *G. 1. me-*
go historias est amplexus, & in ijs tam inuen- *th. c. 3.*
tionis instrumentum, quàm inuentorum fidem.
Tertia. Vt, & suæ, & aliarum memoria melius
inferuiret, doctrinam per historias disposuit,
adiungens semper locum in quo æger decum-
bebat, aut eiusdem nomen, aut parentis, aut
coniugis, aut heri. Hæc autem ad reminiscen-
tiam non parum faciunt.

SECUNDVM QVAESITVM.

Quis doctrinae ordo in historijs seruetur?

*G. initio
Artis
med.* **C**VM triplicem statuatur doctrinae ordinem Galenus, primum, qui per resolutionem fit; secundum ex compositione eorum, quae per resolutionem sunt inuenta; tertium ex definitionis resolutione, hunc tertium in praesente omitendum censeo, non quia non detur (vt inanibus argumentis nixus Rossellus existimauit) sed quia ad praesentem rem nihil facere videtur. Nam definitiuus ordo, & ad totius compendium, & ad singulorum memoriam (vt Galenus est autor) praestat, haec autem duo, vt diximus, historia, ex se, habet. Porro de resolutione, & compositione si quis quærat, vtrumque respondebo, diuerso tamen modo: quemadmodum, enim, eadem via est, quæ ab Athenis ducit ad Thebas, & à Thebis ad Athenas, sic idem planè est à resolutione ad compositionem, & à compositione ad resolutionem procedere, Hippocrates inuentor processit resoluendo, quisquis autem addiscit, componendo addiscere oportet, quod vt pateat aliqua sunt enucleanda.

*Manar.
dus, &
Thomas
à Veyga.
Argent.
redarg.* Resolutiua methodus à notione finis procedit; iccirco omnium præstantissima à Galeno existimatur. Cur ita sit, non dixit, dixerunt tamen pro eo Manardus, & Thomas à Veyga: nempe quia resolutio propinqua est causæ finali, quæ diuina censetur. Redarguit Argenterius inquiring, finem hic non esse causam finalem, sed id, quod est vltimum, à quo incipit resolutio.

Deci-

Decipitur tamen : nam hic non loquimur de resolutione , quæ est operis demolitio : in hac quidem verum est , finem sumi pro eo , quod vltimum est , à quo incipit resolutio , e. g. tectum in domus ædificatione est vltimo , & , si quis rectè velit domum demoliri , à tecto incipiet . Loquimur de resolutione , in ordine doctrinæ , hoc est , quæ mente fit : mente autem ad causam finalem primo loco accedimus , e. g. lignorum , laterum , calcis , & arena , ad construendam domum , tamquam ad causam finalem , congregantur . Itaq; vera resolutio , grecè ἀνάλυσις , licet ob vocabulorum penuriam appellari soleat resolutio , tamen propriè reditus est vniuscuiusque rei ad sua principalia . Sic mixtum resolvimus in elementa , sic particulare in vniuersalia , e. g. Socrates resolvitur in hominem , & in suam differentiam indiuiduantem , homo in animal , & rationale , ex quibus componitur .

Porro simplicium rerum finis sunt res compositæ , ac proinde vniuersalium particularia , cumque vnumquodque resolvatur in ea ex quibus componitur , resolutio fiet ex particularibus in vniuersalia . Sed quomodo ? Exemplum vobis sit , quod dici solet *philosophiam peperit admiratio* . Admiratus est quispiam singularem euentum , cepit causas rimari , & vniuersalia theoremata componere , quibus instructus , iam in multis eiusdem nature euentibus desinet amplius mirari . Hinc habetis methodum resolutionem , qua Hippocrates , bonorum omnium in arte medica inuentor , fuit usus . Obseruauit particulares casus , & historias conscripsit , inde communia

nia quædam extraxit documenta, quibus alios libros impleuit.

Restat nunc videre quomodo addiscentes, ex aduerso compositiua vtantur methodo, methodum ne, an ordinem quis dixerit, parum refert. Porro methodus compositiua ex compositione constat eorum, quæ per resolutionem fuerunt inuenta. Pertinet ad addiscentes. Quicquid ergo artis procures resoluendo inuenerunt, postea

G. 2. dieb. de-cret. c. 3. ri componendo didicerunt. Hoc Galenum non latuisse reor: siquidem aliquando opus epidemion ante aphorismos, & prognostica scriptura fuisse ait: nempe insinuans artis inuentorem à singularibus casibus, qui in epidemijs narrantur, ad vniuersalia aphorismorum, & prognosticorum theoremata resoluendo processisse.

G. 3. prognost. c. 38. Alibi autem opus epidemion vltimo loco post aphorismos, & prognostica transcribi iubet, & in hoc insinuat debere addiscentem ab vniuersalibus theorematibus, quæ in aphorismis, & prognosticis continentur, incipere, vt tandem ad particulares casus, qui in epidemijs narrantur, deueniat: neque enim (vt Galenus ait) præcepta fidem faciunt, nisi prout stabiliuntur experimento. Tria tamen se se offerunt dubia, quibus respondere erit operæ pretium.

G. 3. proæmio c. 9. meth. c. 4. Primum Galenus expedire ait, vt exëplis tyrones exerceantur cum igitur medicinæ sacris initiati, tyrones dicantur, si hi exemplis sunt exercèdi, ab exemplis addiscentes incipiant oportet, ac proinde resolutiuo, non compositiuo ordine. At expendere oportet, qui tyrones dicantur. Non quidem rerum artis omnino ignari, quorum

rum intellectus in doctrina, ad quam accedunt, est adhuc veluti tabula alba, in qua nihil est depictum. Quemadmodum namque quantumvis aliquis per multos annos librorum lectione militiam addiscat, si ad bellum accedat appellabitur tyro. Sic in Medicina arte ij, qui doctores ex libris nuncupantur, quando ad praxin se se conferant, tyrones sunt appellandi. Exerceantur itaque exemplis tyrones, postquam scilicet documentis sunt imbuti: quippe adhuc (ante exercitium) in tyrocinio esse dicuntur.

Secundum. Quoniam diximus resolutiuam methodum à particularibus progredi ad vniuersalia, videtur obstare Galenus, qui sic ait: *ab specialissimis, quæ multa sunt, ad primum genus componendo accedamus.* sic ille, si ergo *ab specialissimis componendo falsum erit ab specialissimis resoluendo.* Sed aduertite compositionem duplicem esse, alteram, quæ opponitur diuisioni, alteram, quæ resolutioni. Galenum autem, ibi, cum de diuisione loqui constet, de ei opposita compositione agere. Igitur cum propriè diuisio sit totius in suas partes compositio ei opposita erit partium in suum totum, partes autem vniuersalia sunt particularia: si enim vniuersale diuidatur, in particularia debet diuidi, & eodem iure ex particularibus debet vniuersali compositione diuisioni opposita, componi. At verò compositio, quæ opponitur resolutioni, fit ex rebus prioribus in posteriora, sicut ei opposita resolutio, ex posterioribus in priora: quoniam ergo vniuersalia sunt priora natura particularibus, resolutio fit in vniuersalia, & ei

G. de placit. c. 9.

opposita compositio ex vniuersalibus: iam enim diximus resolutionem sic ob penuriam vocabulorum appellari, re vera autem esse reditum vnicuiusque rei ad sua principia. Iam ergo manet satisfactum secundo dubio: quippe methodus diuisiua, quæ ad definitiuam, cui inseruit, refertur, esse aliam à resolutiua, de qua loquitur.

Tertium. Quoniam ars imitatur naturam, si natura procedit à simplicibus ad composita, cur non progreditur ars eodem modo? Multiplex potest esse responsio. Prima imitatur quidem naturam ars, & quemadmodum natura gignit componendo, sic ars in intellectu addiscentium, in intellectu autem inuentorem nondum ars dici potest, sed artis præludium. Altera. Ars imitatur naturam, natura autem prius corrumpit, vt postea generet, sic ars prius per resolutionem, quasi per ignorantia corruptionem inuenta, postea in intellectu suos generat habitus. Tertia. Imitatur natura ars in fine, non in medijs ad finem: quapropter, sicut naturæ est proprium aliquid gignere, sic etiam artis, diuerso tamen modo.

TERTIVM QVÆSITVM.

An in historijs Hippocraticis narrentur duntaxat morbi Epidemici?

MOrborum quidam sunt pandemij, siue epidemij hoc est communes, alij sporades idest sparsi, sunt autem sparsi sic appellati, quoniam, vt Galenus ait, sparsim priuatimque pre-

prehendunt, ægròs discrepantes fatigantes, neque secundum communem modum constantes. Communes, autem, vel sunt endemij, hoc est patrij, seu vernaculi, de quibus Hippocrates agit in libro de aere, aquis, & locis; vel epidemici, qui tempore aliquo, in regione aliqua abundant. Ex quibus si maior ægrotantium pars pereat, dicitur cum addito epidemia perniciosa, alio nomine λοιμός hoc est pestis, de peste autem nullum peculiarem confecit librum, quoniam ex epidemijs vnum esse illam per libros epidemiorum demonstraui. Si vero maior pars euadat, simpliciter appellatur epidemia, quæ libris epidemiorum, seu de morbis vulgaribus inscriptionem præbuit. Cum verò in his epidemiorum libris historiæ sint descriptæ, occasio non levis datur existimandi solos epidemicos morbos, in hisce historijs narrari.

Cœterum quoniam idem Hippocrates in libello de flatibus, ex victu morbos epidemicos fieri negat, ex victu, inquam, vniuscuiusque particulari, rectè sequitur, eos morbos, qui ex errore in particulari victu accidunt, esse sopradicos. At in hisce historijs morbi aliqui narrantur, qui ex particulari victu acciderunt, (sit vobis pro exemplo multorum instar vnus Silenus, quem *ex lassitudinibus, & potationibus, & exercitijs tempestiuis febris corripuit*) igitur, quamuis communem narret in epidemiorum libris cœli statum communesque morbos, nihilominus in historijs, nequid omitteret, ægrotos etiam commemorat sparsim, neque secundum communem modum laborantes.

QVARTVM QVAESITVM.

Cur signorum optimus obseruator Hippocrates signa ex pulsibus ferè omisit?

*G.3. cris.
c. ult.*

Videtur huic quæsito respondere Galenus quando sic ait, *signa ex pulsibus sumpta Hippocrates, vel quia non nouerat, vel quia non magni momenti existimauit, iccirco non est executus. hoc nisi rectè intelligatur, vtrumque est falsum. nam & nouerat, & magni momenti existimauit, vtrūque vobis fiet palam. In primis idemmet Galenus fatetur alibi, Hippocratem pulsum notitiam habuisse. Nec diffiteri quidem poterat: si quidem in Hippocraticis scriptis sæpè pulsum fit mentio. Vt quando ait, *cui venæ in cubito pulsant insanus, & iracundus est. Venarum nomine more veterum arterias intellexit, quod Galenus sæpissime in memoriam reuocat. Et alibi. Si vero pulsus in hypochondrio insit, perturbationem significat. Et in historia filij Eratolai, secundum tempora autem pulsus erat, & iterum, saltatio autem venarum circa tempora detinebat, & in Cydis filio in temporibus autem pulsus non defecit, & in historia Pherecydæ pulsus in fronte valde obscurus.**

*G.1. pro
gn. 28.*

Verum dicetis Hippocratem in his sententijs loquutum de magna, & vehemente arteriarum motione, vt, ante quàm contingatur, innotescat, interdum egro duntaxat, quandoque etiam de foris intuentibus. Hoc quidem ita est, & nos cum Galeno admittimus. Ceterum sunt alij apud eundem Hippocratem loci, ex quibus colligitur, cum

eum non solum pulsationes conspicuas, sed inconspicuas etiam cognouisse. Vt cum ait, *Venarum pulsationes, & respiratio spiritus iuxta aetatem, & consonantiam, & dissonantiam sunt & morbi, & sanitatis signa.* quid clarius dici poterat? pulsationes quidem, quæ sunt sanitatis signa, non sunt conspicuæ, & vehementes, sed inconspicuæ, & moderatæ, & alibi *carnes attractrices ex ventre, & extrinsecus significat sensus: quoniam* *H. 6. epid. sect. 6. i princip.* *expirabile, & inspirabile calidior venula sanguinis multitudine exustum procreat, illisque secernit.* Hæc omnia de attractione aeris, & expulsionem fuliginum Galenus interpretatur, fit autem attractio compressione arteriarum, expulsio earundem dilatatione. Sic etiam verba illa, *Vrinæ excretio, flatusque tum vnius, tum alterius partis, nutrimentique & spirationis.* Ibi Galenus nomine spirationis difflationem intelligit, difflatio autem, motu arteriarum fit, vt idem Galenus est autor. Similiter de pulsu arteriarum inconspicuo intelligenda censeo, verba illa, *pulsus ad manum accelerantes debiles deficientes & statim pereunt.* Nec minus manifestè alibi sphymicam notitiam nobis tradit inquit, *in acutissimis febribus pulsus creberrimi, & maximi.* Et alibi, *Zoili fabri pulsus tremuli, & tardi.* Quid autem de Pythodoro cui *pulsus non defecit?* sanè, licet Vallesius de pulsu conspicuo in temporibus verba hæc intelligat, nescio cur de inconspicuo nequeant intelligi. *H. 6. epid. sect. 5. tex. 4. lib. de salub. diet. com. 20. & 4. loc. aff. c. 8. Hi. li. de alim. H. 4. epid. n. 31. 4. epid. num. 57. Valles.*

Sed, quando iam Hippocratem pulsuum notitiam habuisse satis manet demonstratum, remanet alia pars demonstranda: nempe eam non parui momenti existimasse. Non potuit

quidem parui momenti existimare actionem,
à corde immediate dependentem, nec rursus
potuit ignorare, actionem arteriarum immedia-
tè à facultate cordis procedere: quippe ait, *ra-*

Hipp. de aliment. dicatio venarum iecur, radicatio arteriarum cor.

Nec solum magni momenti esse agnouit in ef-
fendo (vt in scholis loqui solemus) sed etiam in
significando: si quidem ab eo est dictum, *qui*
manibus contrectauit ventrem, & venas, minus sal-
li potest, quam qui non contrectauit.

Porro dicendum, Hippocratem omnia,
quæ ad artem pertinent nouisse, non tamen
omnia accuratè tractasse, sed quædam insinuata
nobis reliquisse, forsitan, accuratius tradenda,

G. 1. de differ. puls. c. 3. & de prædict. ad posth. c. 12.
si vita supersuisset, Iccirco Galenus ait, *no-
uit, sed non excoluit.* Sed cur idem Galenus ait (quod
initio diximus) *vel quia non nouerat, vel quia non*
magni momenti esse existimauit? hæc verba iam
monui cautè esse intelligenda, vtpote quæ beni-
gnam recipiunt interpretationem. Agebat Ga-
lenus de signis futuræ crisis, inter hæc signa po-
nuntur aliqua sumpta à pulsu, quæ Hippocrates
potuit non adhuc nouisse, vel prorsus contem-
pisse. Poterat quidem non nouisse: quia in pri-
mordijs artis medicæ poterat debitas pulsuum
ad significandam mortem inseruire, crebritas
ad significandam febris acutiem, & horum duo-
rum duntaxat mentio facta apud Hippocratem
reperitur. Vterius quid saperent medici tunc,
cum non exacta erat differentiarum cognitio:
signa quidem futuræ crisis expulsiu venari diffi-

G. 3. cris. ult.
cillimum est, quod indicat Galenus, qui ad si-
gna vomitus critici ab Hippocrate scripta, adiū-
git

git signum ex inæqualitate pulsus, quod ab eodem Hippocrate, vel ignoratum, vel contemptum fuisse ait. Signa coctionis ex vrina sumuntur manifesta, non autem ex pulsu. Quod si Galenus coctionis signa tum ex pulsu, tum ex vrina accipi dixit, intelligite, vrinam directè esse coctionis significatricem, pulsum per longas ambages coctionem insinuare: nempe contractione maiore, quam sit dilatatio: cum enim contractione fuligines expellantur, cum rursus fuligines magis abundant, cum materia est cruda, sequitur, contractionem auctam materiæ cruditatem indicare, vnde ex minore contractione minorem cruditatem, ac subinde coctionis aduentum arguimus. Erant hæ differentiæ ignotæ primis medicinæ fundatoribus, quare credibile est, eas Hippocratem ignorasse. Forsitan etiam non ignorauit, sed contempsit: cur .n. inter mille signa fidissima, qualia sunt, quæ in prædicto loco ex Hippocrate colligit Galenus, non contemneret signum vnum infidū, qualis est pulsus, de quo Celsus clamās, aut, *pulsui fallacissimæ rei credimus.*

Quamuis autem Hippocrates sphymicam partem non excoluit, hanc tamen ipsum sequuti (vt Galenus ait) alio aliud addente, vsque ad Galeni tempora absoluerunt, Galenus tandem pluribus libris adeo perfecte exornauit, vt nihil sit, quod adiungi possit. Sunt autem hi de pulsibus ad tyrones liber vnus; de differentiis pulsuum libri quatuor; totidem de dignotione pulsuum; totidem de causis pulsuum, vnus de præcognitione ex pulsibus; & synopsis sexdecim suorum librorum de pulsibus.

QVINTVM QVAESITVM.

Cur Hippocratis seculo frequentes fiebant crises nostro autem raræ?

DVpliciter morbi soluuntur, vel per simplicem solutionem, vel per crism. Est autem crisis, siue iudicium (aliàs ætymologias non curo) subita, quæ in morbis mutatio fit, cuius species, seu differentias Galenus non semel colligit: nempe, quatuor *ad salutem, ad mortem, ad melius, ad deterius*. Sola, quæ ad salutem fit, simpliciter crisis appellatur, aliæ cum addito. Porro crism fieri dixit Galenus per manifestas excretiones, & in hoc differt à simplice solutione, unde de meritò reprehenditur Vallesius, qui crism fieri ait per insensilem transpirationem. Itaque frequenter apud Hippocratem in ægrotis, qui sanantur, euacuationem aliquam manifestam reperietis, & simul hæc verba *indicatus est*. rarò autem in nostris ægrotis ita accidere videmus.

Non vna duntaxat huius rei afferenda est ratio, sed ad plures respiciendum esse cenſeo, sunt autem, hæc regio, vitæ consuetudo, & medicorum nimia sollicitudo. Regionis rationem habendam esse ad prænoscentiam crism dixit Galenus, nec est præter rationem. Nam regio calida humores generat irritantes, quales sunt biliosi, qui acutorum morborum sunt causæ, generat subinde facillè irritantes: quemadmodum, enim, mores hominum corporis temperamentum sequuntur, sic temperamentum, quod

quod natura etiam nuncupatur, sequitur humorum in corpore prædominantium conditionem: cum ergo natura sit, quæ crisis facit, ex Galeni doctrina, ubi natura facilis est ad irrationem facilis est ad crism, quâ non nisi irritata molitur. *G. 17. v. supar. c. 2.*
 Habetis ergo in regione calida morbos fieri, qui frequenter crism patiuntur, hi sunt acuti, ut Galenus fidem facit, habetis in eadem regione naturas esse ad irrationem, subinde ad crism præptas: *G. 3. crif. c. 3. 2. crif. 11.*
 colligere ergo hinc licet, regionem calidissimam, in qua degebat Hippocrates, unam fuisse ex causis, quæ frequentes inducebant crises.

Altera causa est vita inordinata: quemadmodum enim sine febre rigorem non vidit antiquitas, quia (ut refert Galenus) veteres, nec blancis post cibum, nec vita otiosa utebantur. ita etiam *G. de rig. & palp. c. 7.*
 ob frugalitatem robore naturæ valde pollebant, propterea robusta natura facile in causam morificam insurgens, crises moliebatur.

Tertia, quoniam antiquitas progressum morborum diligenter speculabatur, & occasionem faciendi, quam præcipitem esse nouerat, non omittebat, ea tamen iudicii maturitate, ut suis medicis auxilijs naturæ concursum non præocuparet. Nunc autem medici, vel quia critica signa non contemplantur, naturæ morbum superare satagentis cursum interrumpunt, vel quia vulgo importune, & intempestive remedia expostulanti, magis quam medicæ artis præceptis obtemperare malunt, aut quia scioli sunt, & non finunt naturam aliquid agere. Ageret quidem illa non interpellata, cessat ad medici irruentem audaciam.

SEXTVM QVAESITVM:

*Cur Hippocrates in suis historijs vix vnquam reme-
diorum mentionem facit?*

*G. 9. de
placit.
c. 5.*

NVnquid remedia, quæ proficua esse poterant, inuidus celauit? absit, vt hoc cogitemus de viro, quem Pætus diuina natura prædictum acclamauit. Nunquid ægris prodesse noluit, & propterea remedijs nõ est vsus? At ille (vt Galenus ait) humanitate, & benignitate hominibus medebatur. Nunquid negligentiæ attribui debet, quod facienda omiserit? At diligētissimū eum vocat Galenus. Nunquid remedia, aut agendorū methodum ignorauit? At remedia quāplurima alibi scripta reliquit, methodi autem inuentorē fuisse constat ex Galeno. Nunquid remedia, quæ scriptis tradidit nullius momenti esse putauit, ac propterea in curatione morborū ea cōtempnit? Fallax esset, si nos falsa doceret, veritatis tamen amatorem, & veracem, probū hunc Virū quis cum Galeno non appellauit? quid ergo est existimandum? Nempe sapientissimū Senem distinctè voluisse doctrinam tradere, cūq; homines illius seculi longō annorū spatio artē medicam didicissent, non eis deerant tēpus ad percurtēda omnia. Posteriore autem æuo (ita suadente auaritia) non dum ē tyrocinio egressi, ad lucrādum accedunt: quapropter cupiūt cūcta promiscuē audire, & promptius remediōrum siluam quærunt, quā methodum ratione, & methodo cōparatam. iccirco præpostero ordine in Scholis videbitis, initio artis medicæ, ante quam theorię initientur, ad praxim cupidos accedere.

ÆGROTVS PRIMVS.

PHILISCVS propè muros habitabat ; decubuit . Primo die febris acuta , sudauit , noctem laboriosam habuit . Secundo die omnia exacerbata sunt . vesperi ab infuso per clysterem adhibito benè habuit ; noctem quietam . Tertio mane , & vsque ad meridiem visus est à febre liber esse . Ad vesperam febris acuta cum sudore ; siticulosus erat ; lingua exsiccabatur , nigra minxit , noctem molestam habuit ; non dormiuit ; omnino delirauit . Quarto omnia exacerbata sunt ; vrinæ nigræ nox tolerabilior , vrinæ melioris coloris . Quinto circa meridiem parum de naribus stillauit non mixtum . Vrinæ variae , quæ habebant innatantia quadam rotunda , geniturae similia ; dispersa , non subsidebant . Subdita glande , flatuosa pauca prodierunt . Noctem habuit laboriosam , somni parui , sermones , deliramenta , extremitates vndique frigidae , & non amplius recalescentes . Minxit nigra , dormiuit parum , ad diem voce destitutus est , frigidum sudauit , extremitates liuidæ . circa meridiem sexta die mortuus est . Huic Spiritus ad finem vsque veluti reuocanti , rarus , & magnus . Splen eleuatus est orbiculari gibbositate , sudores frigidi perpetuò , exacerbationes diebus paribus .

In totius anni vniuersali narratione Philisci narrationem bis factam reperietis . Primò quando ait , quinta die habuisse stillam sanguinis è naribus , Secundò quando die sexto obijisse narrat .

*G. conie-
ctura
circa æ-
tatem.*

rat. Hæc eadem in præfente historia referuntur, quare hic, & ille vnus, & idem est. Eius ætatem omisit, sed Galenus senem fuisse suspicatur: siquidem, si ætatis robore præstans fuisset, ad octauum diem potuisset cum morbo perdurare, obiit sexto: quoniam ætas erat non admodum valida. Mercurialis existimat fuisse iuuenem: nã,

*Hip. 3.
prog. 14.*

vt Hippocrates ait, ex acutis citius intereunt iuuenes: quippe grauius ægrotant: vnde verisimile est fuisse iuuenem, eò maximè quòd laborauit ardente, & acuta febre, quæ fit in ætate iuuenili. Non omnino spernenda est isthæc Mer-

*Mer-
cur. con-
iectura
circa æ-
tatem.*

curialis coniectura, cæterum, quia hic morbus aliquando inducias præbuit (præbuit autem tertia die, in qua visus fuit à febre liber, & quinta, in qua parum quieuit) potior est sententia Galeni, duraturum scilicet per plures dies morbum fuisse, & ad octauum vsque peruenturum, nisi vires defecissent. Incipit narrationem à die decubitus, vt addiscatis, ex qua die debet incipere critico- rum supputatio, non à tempore lassitudinum, hoc est, non à tempore neutralitatis, quippe cū lassitudines non sint morbi, sed prænunciæ morborum, corpus sub lassitudinibus neutrum est, nec adhuc morbus adest à cuius initio, quod est decumbendi hora, fit supputatio.

Prima die febris acuta -- Nempè vehemens velox, continua, biliosam possumus addere, & quæ ob eximiam vehementiam prima statim die talem se prodidit, sed præcipue in primæ diei secunda parte, hoc est, in nocte: quippe apud medicos diei spatium est viginti quatuor horarum, qui incipit ab hora decubitus, & sic computa-
tionis

tionis ordò progreditur. Philiscum meridiè horam decubitus habuisse suspicor : quoniam tertia diè circa meridiem noua exacerbatio increuit, quinta circa meridiem parum de naribus stillauit, sexta circa meridiem occubuit. Itaque grauius meridiè ægrotans, decumbere fuit coactus, grauius nocturno tempore se habens, cum sudore, laboriosam transegit noctem.

*Autoris
cōiectu-
ra circa
horam
decubi-
tus.*

Sudauit, laboriosam noctem habuit — Putat Mercurialis deprauatum esse contextum, quem ita corrigit *sudauit laboriosam ad noctem*. Tamen ipse in sua versione (in qua nihil vnquam à Cornario discrepat, & inutiliter se in translatorum numerum congeffit) laboriosam noctem sine controuersia legit. Verum exigua est differentia : quòd enim sudauerit, & nocte simul noctem laboriosam transegerit, idem est, ac laboriosè sudasse. Sudor, inquit, laboriosus est ille, qui fit præter tempus, cum non tollit, aut saltem lenit febrem, & cum difficulter fertur ab ægroto. Verum ad hoc significandum, quòd oportuit dicere laboriosè, satis quidem fuit, quòd dixerat prima diè, in qua nulla excretio est utilis, melius est dicere, noctem fuisse laboriosam, hoc est cum prauo sudore.

*Mer-
cur. re-
fellitur.*

Videntur quidem rationabiliter loqui illi, qui sudorem istum frigidum fuisse inquirunt. Hoc loco monendi estis, vt in Hippocratis historijs ante omnia respiciatis ad verba in fine historie apposita: ex his nāq; cognoscetis, quibus nā signis, Symptomatibusq; maiorem fidem habuerit, inuenietis in fine huius historie (quod ad præsentem sudorem cognoscendum spectat) duo maxime

*Admō-
nitione
cessaria.*

xime necessaria. Primum tumorem lienis significantem huius visceris inflammationem, ob quam calor ad interna reuocabatur, & hæc poterat esse frigidi sudoris causa, deinde aliud, quod addit, sudores perpetuò fuisse frigidos: Si perpetuo, ergo à prima die.

*Sudor
in affli-
ctione
qualis.*

Quod si calidos adhuc prima die fuisse vultis, ne per expulsionem factos fuisse credatis, sed per expressionem factam à violenta afflictione: solent quippe ob hanc causam, qui in angore sunt, etiam sani ob passionem animi sudare. Itaque sudor iste in nocte laboriosa erat laboris soboles, seu effectus, non verò causa, ita vt hæc sit differentia in loquendi modo. Qui dixerit, sudauit laboriose, significabit, laboriosum sudorem fuisse causam laboriosæ noctis: qui verò dixerit sudauit, & addiderit laboriosam fuisse noctem, iudicabit ex labore noctis ortum fuisse sudorem.

*Hipp. 4.
eph. 37.*

Porro sudores isti, si frigidi erant, cum acuta esset febris, erant lethales, proinde poterat medicus statim prima die mortem prædicere. Ex aphorismo *frigidi sudores cum acuta quidem febre mortem, cum mitiore longitudinem morbi significant.* Si vero calidi erant, & simul cum morbo apparuerunt, erant parui. Sic in coacis *Sudor, qui cum febre incidit, malus.* Denique cum sudor suo tempore adueniens decretorius sit, extra tempus, seu potius ante tempus, damnatur: cupit iccirco Hippocrates, ne statim decretoria appareant.

Secunda die -- Primus impetus fuit vehemens, debuerat secunda die natura à pugna aliquantulum conuiescere. Tantum abest, vt quienerit, quin

quin potius omnia fuerunt exacerbata. Iam ergo si per tertium debent fieri exacerbationes, maior exacerbatio, quæ respondebit exacerbationi secundæ diei, fiet quarta die, & subinde morbus exacerbabitur per pares, & hanc etiam poterat medicus de ægrotantis rebus malè sperare, nam sic vel sexta, vel octaua die acutissimus morbus iudicandus erat, harum vtraque ad bonam crisin est inepta.

Verum in vltima diei parte ab infuso per clysterem benè habuit. Mercurialis profuisse existimat clysterem, & hanc morbi mitigationem, clysteri acceptam refert. Sed quid potuit clyster fæces extrahens ab intestinis, humores intra venas, quæ sunt iuxta cor, praua putredine infectos mitigare? Profectò, nō quia clyster fuit iniectus, benè habuit, sed quia benè habuit, clyster fuit iniectus. Hoc est in hora quietis, quando exacerbatio cæpit mitescere, occasionem arripuit Hippocrates iniijciendi clysterem, quem in vehemētia paroxysmi, regulariter nō iniicere conuenit, regulariter, inquam: nam coactè, si videlicet intolerabilia accidant tormina, aut aliud quidpiam, quod præceps minetur periculū, nulla habita exacerbationis cura, ad remedia confugimus. Hic obiter caute à Mercuriali, qui ait semper optimum esse clysteres iniicere in hora vespertina. Hippocrates clysterē vespere iniiecit, quia tunc aderat declinatio, alioquin si exacerbationis ratio liberum relinqueret medici arbitrium, eligēdum esset matutinum tempus, quod magis est ad omnia aptum; tunc enim æger apparet à nocturno somno aliquantulū recreatus, solis

*Mer-
cur. re-
fellitur.*

*Mer-
cur. da-
mnatur.*

folis etiam exortus aerem attemperans ægrotum iuuat. Præterea, si ex clystere, vel quouis medicamento perturbatio adsit, melius, & toleratur, & sedatur tempore diurno, quam nocturno, in quo, & quietis amissio est grauior, & quælibet afflictio molestior. Dixit ergo Hippocrates, vespere ab iniecto clystere melius habuit, hoc est, melius habuit post iniectum clysterem, non quòd clyster fuerit causa, cur melius habuit: sed æger, qui cæperat quiescere, & ideo illi fuit clyster iniectus, postea etiam per aliquot horas melius habere perseuerauit.

Hipp. 2. aph. 27. *Tertio die* — Usque ad meridiem, quæ erat hora reuersionis, visus fuit à febre liber, visus, inquam fuit, medicis imperitis, aut adstantibus idiotis, non autem sapientissimo Hippocrati, qui suæ ipsius doctrinæ memor, ijs, quæ præter rationem eueniunt, non esse credendum cognoscebat. Erat omnino præter rationem, vt febris ardens malignitatis signa indubitata præseferens, tertia die, nullis præcedentibus coctionis signis, nulla euacuatione alicuius momenti celebrata, liber à febre fieret.

Cæterum interrogabitis. nonne poterat præcedere euacuatio ab arte facta? poterat quidem, sed non quæ febrem omnino tolleret. Potuit Hippocrates prima, aut secunda die, propter incendium febrile ad ventilandam, aut etiam minorem reddendam materiam, quæ intra vasa putrescenserat, & multò magis ad reuellendum à parte affecta, sanguinem mittere, purgans autem pharmacum in tanta caloris vehementia, post sudorem, post noctem laboriosam, nequa-

quaquam exhibere. Cæterum in hac tertiæ diei parte, videlicet matutino tempore, quoniam nox præcessit admodum quieta, & quies adhuc perseverabat, conueniens fuit occasionem arripere, pharmacum exhibendi, quod forsitan Hippocrates præstitit, sed id non narrat, quoniam à remediorum narratione solet abstinere, id alibi magis commodum fore ratus.

Ad vesperam febris acuta cum sudore -- Redijt ad suam acutiem, tertia die post meridiem (sic enim intelligitur illud vespere, quod Montanus non intellexit, cumque inuenisset in nonnullis codicibus *sub crepusculo*, existimauit, esse crepusculum matutinum, quod sequebatur post tertiã diem. Sed in græco codice est *πρὸς δειλὴν*, nempe à meridie) tunc igitur cæpit febris acuta quidem valde, sed quæ primæ diei responderet, licet multa habuerit, praua symptomata, quæ prima dies non habuit. Verum hæc pergentis in deterius morbi signa erant, nempe præter sudorem, qui prima die adfuit, fitis, quæ antea non ita valida corripuerat, & hoc familiare est omnibus ferè febribus, vt primis adhuc diebus humiditas non sit consumpta, propterea non datur sitiendi occasio. Porro contingit in vniuersalibus totius morbi temporibus idem, quòd in particularibus. Inuadit accessio sine siti, quoniam tunc distillatur humiditas, deinde ad augmentum, & statum vsque calor fit maior, & ex maiori calore ventriculus exsiccatur, palatum fit aridum, æger de siti conquæritur. Ita etiam in vniuersali principio, non exhausta adhuc humiditate, imò verò liquefacta, nulla adest fitis, pro-

Montanus non recipitur.

gressu temporis, & sitis, & linguæ ariditas propter durationem caloris fiunt, & hoc est, quod Hippocrates appellauit superius hoc libro, sitim non intempestiuam, hoc est, quæ tunc accessit cum par erat accidere.

Hic tamen animaduertere deberis, sitim hanc, quæ tertia die apparuit, fuisse solito maiorem, & secum habentem linguæ ariditatem, nihilominus prima statim die (licet Hippocrates id non expresse) sitim adfuisse. Nam febris erat ardens, quæ pathognomonica signa habet sitim, & calorem. pathognomonica autem signa ab assidentibus in eo differunt, quod illa semper simul cum morbo inuadunt, hæc autem non semper. Fuit ergo sitis statim à principio: quoniam statim à principio fuit febris ardens, sed sitis, quam tertia die superuenisse narrat, magnitudinem significat.

Quid ergo potuit sitis aucta, cum linguæ ariditate, tertio die superueniens, significare? nempe internam inflammationem (inflammationis nomine abscessum à quocumque humore ebulliente intelligo) cuius nam visceris erat inflammatio? tactu percipiebatur in sinistro hypochondrio, in quo residet lien. Erat, propter adustionem, sitis, & propter eandem, linguæ ariditas, seu asperitas, imo propter nigras fuligines, nigram etiam fuisse linguam, mihi persuadeo. Sed Hippocrates nihil de nigredine. Ita est, satis fuit dixisse aridam, ut adiungere nobis liceat, & nigram. Præterea, iuxta eiusdem Hippocratis doctrinam, lingua lotium significat; iccirco eodem modo debuit esse, & lingua, & lotium, si lotium dicit fuisse

*Hip. 6.
epid.
sect. 5.
text. 14.*

fuisse nigrum, quid ni etiam nigra erit lingua? Atri humoris, & pessimi multitudo redundabat ex inflammato liene, propterea quod lien munere suo retinendi atram bilem, & eam per suos canales effundendi, nonungebatur.

Vnde nam nigredo in vrina? num ex atri humoris redundantia, an ex incendio, an ex frigidity? vnaquæque ex his causis sua signa habet. Redundare melancholicū succū cognoscimus ex liene, propter inflammationē impedito; incēdiū, ex inflāmatione; frigiditatē, ex caloris extinctione; quā sudores frigidi poterant significare. Ego neq; adhuc frigiditatē eo processisse arbitror, vt vrinas denigraret, quas prius saltē liuidas fuisse oportebat (nam hic est gradus ad nigredinem ex frigore) neq; etiam prius virides fuerant, aut æruginosæ, aut aliū colorem, qui ad nigredinem factam ex calore ducat, habentes. Quare cū manifesta fuisset causa, nempe lienis inflammatio, & ex inflammatione colliquatio, ob quam atrabilis, ultra quam par est, aucta, & adusta vrinas potuerit tingere, non est, cur aliō recurramus. Erat autem pessimum signum serum atræ bilis, humoris scilicet perniciosi, per venas sero sanguinis esse permixtum, & tale per vrinas excerni, præcipuè cum morbus tunc, inciperet: quippe *morbis quibuslibet incipientibus si atrabilis sursum, aut deorsum eruperit lethale.*

H. 4. aph. 22.

Triplex

causa

quare

vrina

nigra

fuerunt

praua.

Erant prauæ vrinæ, tum quia in principio: nec enim possumus dicere fuisse iudicatorias, & per eas corpus ab atro humore mansisse expurgatum, præcipuè cum Hippocrates non dicat, fuisse multas, nec crassas, tum quia cum

lien^{is} inflammatione fiebant, vnde oriebatur liquefacti illius visceris suspicio: Est namq; lienis substantia nigra, cuius liquefactio nigra etiam sit oportet. Tum denique quoniam non erat solum sedimentum nigrum, sed ipsamet vrinæ fusio, quod multum quidem refert: etenim authore Galeno pessima est tota vrina denigrata, adeò vt neminem vnquam seruatum viderit ex ijs, qui talem vrinam minxerunt. Minus verò perniciosa, si solum id, quod subsidet nigrum fuerit, atque adhuc minus, si solum id, quod in medio iacet, ac multo minus etiam, si nebula.

*G.I. cris.
c.12.*

*Montanus
reij-
citur,*

Quoniam Hippocrates tertia die, & quarta, & quintæ diei nocte vrinarum nigrarum mentionem fecit, existimat Montanus, tertia die vrinā sola hyposthafi nigrā fuisse, inualecente autē malo, quarta die fuisse & hyposthasin, & vrinam nigrā propter valde magnū incendiū. Sed quinta diei nocte nigredinē vrinæ, ex caloris innati extinctione, prodixisse. hanc suā considerationē ampullosis verbis extollit, quæ tamen consideratio inanis quidē est. Nā solet Hippocrates singulorū dierum vrinas cōmemorare, vt si quid varient in melius, aut deterius, aut perseuerent in malitia, cognoscamus. Iccirco quarta die vrinas, ait, fuisse melioris coloris, quinta autē varias, quæ noctu ad solitā ingredinē redierūt. Si verò ex vniuscuiusq; diei repetitionib. argumentū variationis causarū conficiendū est, nullus est æger, in quo ista variatio non contingat. Præterea nō est credibile, ex vna die in alterā, solo interdicto vnus noctis spatio, vnum, & eundem vrinarum colorem contrarias omnino, habuisse causas.

Noctem moleſtam — Inſtationibus, doloribus, anxietudinibus nox fit moleſta, moleſtior autem apparet propter ſomni priuationem : nam eo tempore dormire ſolemus, & tum quies, tum tenebrę ad ſomnum inuitant, quòd ſi eo tempore vigilia adſit, intollerabilis eſt. Aderat autem tum moleſtia, hoc eſt anxietas, tum vigilia: quia bilioſus humor, & anxietudinem in ventriculo, & vigiliarum in cerebro, vellicando, & pun-gendo cauſa erat.

Omnino delirauit -- Quoniam (vt in fine narra-tionis addit) Spiritus toto morbo fuit rarus, & magnus, de quo ibi fuſius agemus: nunc pro hy-poteſi habere oportet, hanc reſpirationem oc-cupatę mentis ſignũ eſſe. Itaq; hæcenus obliuio-ſus erat, & tardè ad interrogata, diminutèq; re-ſpondebat, erant hæc futurę phreſeos rudi-menta. Sed vndenam id colligo? tum ex eò quòd ſemper reſpirationem raram, & magnam ha-buit, tum ex eo quòd nunc addit *omnino delira-uit*. Conſidero illud *omnino*, quaſi dicat prius mē-tis conceptus turbulenti erant; non tamen ſer-mone exprimebantur. Iam nunc delirium omni-no manifeſtum apparuit, nempe in ſermonibus, & actionibus. Tres ſunt delirantium gradus. pri-mus quando æger errores mente concipit, quos tamen adhuc rationis frano gubernat, ſecun-dus quando eos voce exprimit, tertio quando opere complet quicquid prius cogitauit. Hoc etiam ſanis euenire dicimus. Prius quidam odio infectus vindictam mente concipit, de-inde dicit velle ſe vindictam ſumere, tan-dem recurrit ad arma. Itaque cum dicat *om-*

nino delirauit insinuat, prius fuisse *ταραχάδες*, hoc est perturbatum, siue apprehensum delirio, quod in prorrheticis *ασαφές*, idest obscurum appellatur: quia vix non solum ab ignaris, sed à medicis etiam cognoscatur: à medicis, inquam, vulgaribus, qui solos phreneticos esse putant, quos exclamare, vel exhibere vident, vt medicus quidam, qui cum Galeno contendebat, asseuerans ægrum sic insanientem, neq; perniciosè habere, neq; phreneticum esse. Videndus est Galenus in citato prorrhetico, qui ægrum in delirio obscuro constitutum eleganter describit.

*Cur peius est delirium in vigilia, quam in omni-
no.* Cæterum delirare vigilantes maius malum est, quàm si dormientes: nam per somnum, præ mentis impotentia, facilis est lapsus in mentis alienationem, quod multis sanorum est familiaris, scilicet per somnum loqui. At vigilantibus, quando ratio est libera, si ea à recto deuiet itinere, longè maiorem facultatum rectricum significat lapsum. Opponet tamen aliquis ex aphorismo *vbi somnus laborem facit mortale, & ex alio vbi somnus delirium sedat bonum*. Si ergo somnus, qui est aptus labores, & præcipuè delirium sedare, non sedat, sed excitat, videtur magnum esse malum, quo maius esse nequit, nempe mortale, & longè minus, si vigilans deliret. Aduertite in delirio duo esse considerata, causam, & subiectum; causam appello vapores, inflammationem, saltem phlogosim, spirituum turbulentiam. Subiectum autem, sensus internos. Quod attinet ad causam, ea potest per somnum mitigari, nempe coctione, humectatione, spirituum quiete, refectione; quod si som-

nus hoc non efficiat, sed pro coctione, diffusionem faciat, pro humectatione, biliosorum vaporum augmentum, pro spirituum quiete, ac restauratione, eorundem agitationem, & dissolutionem, pernicioſa res est, tum ratione signi, tum ratione causæ. Et tunc videbitis ægrotantes è somno expergefactos, magis quam prius deliros permanere. Quòd verò spectat ad subiectum, nempe ad sensus internos, quorum læsio delirium est, multò facilius in somno patiuntur, quoniam tunc, quodammodo ligati, non possunt causis resistere, attamen cum æger expergiscitur, si somnus fuit bonus, nulla est ex parte sensuum repugnantia, sed patiens statim resipiscit, Quoniam igitur Philiscus (vt ad rem nostram reuertamur.) non dormierit, & omnino delirauerit, signum est, delirium non fuisse ob sensuum impotentiam, sed ob vaporum multitudinem, si vero noctu dormiens delirasset, & vigilans resipisceret exiguum erat malum, ad solam sensuum impotentiam reducendum. Hinc est quòd somnia turbulenta, magis futuri delirii signa, quam delirium, appellantur.

Quarto die. Quia tertio grauiter ægrotauit, & quarto grauius, signum erat ægrotum in interitum velociter pergere. Præterea, quia exacerbatio quarti exacerbationi secundi respondebat, morbus per pares mouebatur, & in die pari (vt diximus) expectanda erat crisis, in die autem pari ex ijs, qui proximè futuri erant; neque enim morbus adeo acutus in multos dies produci poterat. Erant vrinæ adhuc nigrae, quia causa ob quam tales fiebant, hoc est internum

incendium, & lienis inflammatio, permanebant. Nox istius quarti respondere debuit nocti secundi, proinde fuisse dicit tolerabiliorem. Non fuit tamen ita tolerabilis, ut nox secundæ diei: quippe morbus ingrauescebat, fuit tamen tolerabilior, quam nox præterita.

Vrina melioris coloris — Cum adhuc dies quarta duraret, erat enim quartæ diei initium meridie, & durabat per viginti quatuor horas, nocturna quies, & melior vrinarum color poterāt medico imponere, ut futuram salutem prædiceret. Verum in mea *Syntaxi prædictionum medicarum* medicum admoneo, ut tardus sit in prædicendo: nam melior vrinarum color non sufficit, debet etiam apparere aliquod sequestrationis signum, nempe aut nebula, aut appendiculum. Deinde color fuit melior, non vero simpliciter bonus. Tandem, licet simul cum colore fuissent aliqua coctionis rudimenta, coctio inter bona requisita vnum habere debet, ut scilicet perseveret. Quapropter non statim prædicere oportet, sed expectare donec signa sint firma. Potuit autem vrina in illa nocte colorem mutare, quoniam atra bilis fuerat per vrinas eiecta, & alia denuò non dum ad eam quantitatem peruenerat, quæ posset omnino nigro colore tingere, nec propterea existimandum erat, causam nigredinis, hoc est incendium, fuisse mitigatam, quod postea apparuit ex vrinarum mutationibus in diebus sequentibus.

Quinto circa meridiem — Reuertebatur semper natura ad pugnam hora meridiana, in qua febris incæperat. Verùm natura ad pugnam erat coacta,

eta, & impotens, coactam dignosco, quia ante coctionem euacuare tentauit, impotentem, quoniam initio statim destitit. Has incipientes, & non progredientes euacuationes adeò Galenus damnat, vt deteriora esse dicat ijs, quæ nullo pacto apparent, si vbi incæperint, cessent: con-tingit enim interdum, coquentem adhuc con-
Gal. 1. prorr. sect. 1. com. 1.

tristitia naturam nondum ad hõrum expulsionem excitari: in illis verò, quæ cæperunt quidem, sed protinus desierunt, apparet veluti excitatio quædam, conante natura excernere, quæ molesta sunt, atque ob imbecillitatem, quod proposuerat, perficere nequeunte.

Num ob solam debilitatem sanguinis stilla fit? Galenus, præter hanc causam, duas alias adducit, sanguinis scilicet crassitiem, & partium densitatem, vel quædam ex his, vel propter omnium concursum. Propterea existimat ab Hippocrate dictum, in acutis morbis, quæ in æstate, & autumnò fit sanguinis stillatio, robur, multamque in venis inflammationem significare, per robur densitatem intelligit. Quoniam ergo æstate, & autumnò benè fluentem sanguinem esse oportet, tum ob redundantiam flauæ bilis, tum ob ambientis eo tempore caliditatem, magnitudo quædam causæ indicatur, propter quam fluere inhibetur, hanc robur esse Hippocrates, hoc est densitatem, ait.

Verum mihi videntur febres ardentes, tam hyeme, quam æstate sanguinem supponere biliosum, & efficere tenuem, & utroque tempore idem esse malum. Vtrum vero semper stilla sanguinis in morbis acutis prauum sit signum, in-
 hi-

historia Metonis examinabimus. Sufficiat nunc scire in Philisco perniciosam fuisse, tum ob alias causas, tum quia sanguinis erat merus, seu impermixtus. Merum interpretatur Galenus atrum, seu nigrum: nam puri sanguinis excretio non est in lethali morbo visa vnquam. Sed quid oportet huius vocabuli significationem innouare, si eo Hippocrates, non solum in sanguine, sed in alijs etiam humoribus vtitur, meros appellans eos, qui suo sero priuantur? cum namq; vnicuique humori suus debeatur ichor, tunc merum humorem appellat, cum sine ichore est. Stilla itaque sanguinis meri, est, ac si dicatis, sanguinis sine suo sero. prauum autem est signum synceritas; quia fit ab incendio aquositate consumente. Quòd si quis pro Galeno dixerit, sanguinem sine sero saturatum habere colorem, si autem sero diluatur, albidior, non repugnabo. Erat igitur stilla, hoc est euacuatio diminuta, seu duntaxat incipiens, significans, & molestiam, & debilitatem naturæ; erat sanguinis meri, hoc est, sine suo ichore, indicans vehementissimum incendium; erat quinta die quando, videlicet, morbus qui mouebatur per pares, debuerat quiescere potius, quam euacuationibus perturbari, quid non habebat hæc euacuatio, quòd mali ominis non esset.

Vrina variæ-- Possumus vrinas varias appellare eas, quæ versicolores sunt, possumus etiam varias dicere, hoc est, inconstantes, significareque magnos naturæ conatus, ita vt interdum vinceret, interdum vinceretur. Cæterum in spatio temporis adeo exiguo, non potuit hæc

varietas considerari: nam post meridiem varias
vrinas conspexit, quæ statim noctu ad solitam
nigredinem redierunt. Iccirco magis placet va-
rias appellare variegatas, seu versicolores. Com-
parantur facibus versicoloribus, quas Hippo-
crates dixit nigras esse diuturniores, sed valde
lethales.

*Hip. 2.
progn.
23.*

Dicetis tamen. Si vrinæ versicolores veluti
fæces, diuturnitatem significant, cur eas habuit
Philiscus, qui breuiter, hoc est, sexta die est mor-
tuus? scire expedit sententiam Hippocratis di-
stinctiuè esse intelligendam, videlicet, vel signi-
ficant diuturnitatem, vel mortem, diuturnita-
tem cum viribus validissimis: quippe ad varios
humores expugnandos, multo tempore est opus,
& (vt inquit Galenus) qui cum multis pugnat ini-
micis, multum temporis consumat oportet;
mortem verò cum infirmis viribus: hæ enim
multorum simul infestantium hostium labores
sustinere nequeunt.

Iterum interrogabitis, cur signum in vrina,
diuersos humores attestabatur, cum tamen sola
bilis prædominans ex alijs signis cognosceretur?
Respondeo, bilem duntaxat multorum humorū
vices subire, tum propter eius eterogeneitatem,
tum propter inæqualitatem caloris in eam agē-
tis: quippe vna pars magis, quam alia aduritur,
ideo ex pallida fit flaua, ex flaua rufa, ex rufa yi-
tellina, deinde & porracea, & æruginosa.

Talis erat vrinæ color, contenta vero æneo-
remata, seu innatantia, siue appendicula (sic n.
appellantur, quæ in medio innatant, sicut nu-
bes, aut nubeculæ, quæ in summa superficie ap-
parent,

parent, hypostasēs, vel sedimenta, quæ in fundo resident) erant genituræ similia: hoc autem contentum, quod genituram, seu sperma refert dicitur γονέδης, est vero album, granulosum, & nonnunquam etiam dicitur νελοιδής hoc est vitreum. Convulsiones per excretionem huiusmodi æneorematis sanantur, ut autor coacorum scriptum reliquit. Et in Perintho, ut narratur 6. epidemion, criticè excernebatur: quoniam crudus humor, & vitreus, qui in morbis pituitosis abundat, sic euacuatur. In acutis autem, qualis Philischi febris, quæ à pituita longè aberat, perniciosissimum fuit signum: quippe, quando non fit à pituita, fit à partium solidarum colliquamento: humor enim tertia coctione confectus, qui solidas partes nutrit, albus est, crassus, & subiecto cum semine idem.

6. epid.
sect. 2.
tex. 37.

G. 6. e-
pid. sect.
3. com.
36.

Erat etiam hoc æneorema rotundum, videlicet ex materia non fluida; quippe fluida figuram nullam seruant, & ab opifice calore, qui spissando, & cogendo rotunditatem efficit. Rotunditas enim, ex Galeno, ex materia fit viscosa, & ex efficiente calore. Materia iam nutritura, ac proinde consistentiam habens à calore, à quo liquatur, cum non possit sat bene liquari, in rotunditatem abit.

Verum si rotunditas fit à calore cogente, cur ait Hippocrates æneorema fuisse dispersum? Erat dispersum, quo ad materiam, glomeratum, quo ad figuram: etenim glomerati, & diuulsi æneorematis materia eadem esse potest: quæ enim in hepate, liene, & renibus partim assantur, linquantur, partim fiunt diuulsi, & frustulati.

latim

latim concisæ exhausto humore, à quo inter se continebantur, sed semper à calore in orbem aguntur. Erat denique innatans, nec subsidebat, quoniam à flatibus attollebatur.

Subdita glande — Cum nullam hæctenus dejectionis mentionem fecerit, nisi eius, quæ secunda die ab infuso clystere sequuta fuit, pro hypothese tenendum est, aluum huic fuisse astrictam, quod in internis inflammationibus euenire solet, fugente humiditatem sæcum calore, vnde sæces indurata, difficilem habent exitum. Iccirco aluum mouere voluit, nec ausus fuit, alio vti auxilio, quam glande suppositoria; quæcumque fuerit siue lenis, siue acrior, parum refert. Vltus fuit eo consilio, quod nobis scriptum reliquit, nempe si virtus valida fuerit clystere, vtendum esse, si adsit imbecillitas glande. Attamen nihil hac via est consequutus: quippe intestina pauca quædam, & flatuosa reddiderunt. Pauca, quia tam leui instrumento natura debilis non potuit adiuuari, & sæcum renitentia non potuit superari; flatuosa, quoniam calor naturalis diminutus, & præter naturalis auctus, in materia adhuc cruda, flatu excitant: neque vero ita bilis abundabat, quin aliquid crudorum excrementorum, saltem in prima regione, non aceruaretur. Obiter hic animaduertite, ægrum quinta hac die ad desperationis terminum fuisse deductum: siquidem exigua remedia non proficiebant, magna non tolerabantur.

Noctem habuit laboriosam -- Quintæ huius diei nox, nocti tertiæ diei respondere debuerat, & in hac nocte par erat, vt morbus inducias præ-

H. I. a-
cut.text.

45.

præ-

præberet, & æger aliquantulum quiesceret. Verumtamen adeo increuerat ægritudo, vt labor labori videretur adiungi, & nox, quæ minus praua esse debuerat, fuit reliquis antecedentibus deterior, vt ventura dies, hoc est, sexta, quintam hanc prauissimam in prauitate superans, nihil aliud attulerit nisi mortem. Dixit itaque quintam fuisse laboriosam, quasi hoc generico vocabulo omnes labores compræhendantur. Idcirco *parui somni*, quoniam dormire incipiens, à violentia symptomatum irrequietus excitabatur. *sermões*, nempe continuæ querimoniæ, verum non constantes, propterea ad sermones addit *deliramenta*. Tandem, quod extremum fuit malum, extremitates frigidæ, quæ propter virtutis inopiam, non recalescebant: non enim erat expulsio, qua calor rursus ad partes refrigeratas mitteretur. Urinæ solitam nigredinem receperant.

Dormiuit parum ad diem, voce destitutus -- Hic *H. 2. a-* quadrat aphorismus *vbi somnus laborem facit, le-*
phor. 1. thale. Æger, ex nocturno labore defatigatus, matutino tempore somnum suscepit, somnus, quantumuis breuissimus, aliquantulum debuerat labores sedare, tantum abfuit, vt sedaret, quin potius auxit: siquidem ex somno expergefactus, mansit aphoniæcus, non quia ex loquacitate in taciturnitatem incidit; nam voce destitutus aliquid est maius, quam ob mutescencia. Si vero huius aphoniæ causam inquiratis, nullam inuenietis in musculis respiratorijs; neque enim huius affectus hæcenus mentio est facta. Sed potest ne sine instrumentorum vocis vitio vox de-

deperdi? Potest, nimirum, si vel cerebrum sit affectum, ut contingit in eiusdem sphacelo, aut percussione, vel quia membra respirationi inferuientia, ob debilitatem omnimodam, non possunt moueri motione, quæ aerem formandæ voci necessarium, atrahat. Solent moribundi exiguam vocem emittere, quia iam paucum aerem atrahunt. Ideo centurio cognouit in Christo Domino diuinitatem, quia clamans voce magna expirauit. Philiscus erat iam a deo morti proximus, ut paucae illi superessent vitæ horæ: quippe hoc fuit mane, ille autem meridie obiit.

Aderat ante mortem frigidus sudor, & lior partium extremarum. Cæterum cum in fine historię apponat Hippocrates, illum per totum morbum frigidum sudorem habuisse, cur nunc, iuxta mortem, peculiarem sudoris frigidi mentionem facit? Videlicet, quia, propter mortem, erat extremè frigidus, quod attestatur extremitatum lior, quippe lior morticinium quoddam est, & penitus extincti caloris signum.

Circa meridiem sexta die mortuus est -- Inuasionis febrilis hora meridiana erat, æger tamen in extremo languore constitutus, inuasionis impetum non potuit tolerare, sed victus cessit. Huic quatuor notatu digna toto morbo fuerunt, quæ in fine recenset autor. Primum spiritus, veluti reuocanti, rarus, & magnus; secundum splen eleuatus orbiculari gibbositate; tertium sudores frigidi perpetuo; quartum exacerbationes diebus paribus. Retulit quæ singulis diebus contingebant, nunc in fine addit quæ fuerunt perpetua.

*G. I. de
diffic. re-
spir. c. 2.*

Respiratio magna quidem fuit, quoniam rara, rara autem, quoniam æger mente erat turbatus. Dixi magnam, quoniam erat rara, quippe Galenus actiones istorum, quemadmodum per multum temporis fieri, ait, sic etiam & magnas. Obliuiscuntur v. g. mingere, aut bibere, aut respirare, postea vna vice vltra mensuram mingunt, aut bibunt, aut respirant: quod enim sæpè debito tempore facere oportebat, id ipsum aceruatim, vrgente necessitate, explere coguntur, præsertim vbi necessarium id sit ad vitã. Dixi præterea raram fuisse, quia mens laborabat, & hoc quidem merito: nam vbi deest ratio, mensura tum agendi, tum quiescendi perditur, raritas autem fit propter maiores quietes, quàm oportet. Qui igitur mente vacillant, animum simulachris occupatum habentes, actiones animales negligunt. Naturales quidem facultates (vt benè Galenus ibidem notauit) semper necessarijs sibi actionibus incumbunt, nunquam torpent, aut negligentes sunt: quæ verò è voluntatis libertate procedunt, vbi facultas in quibusdam fuerit occupata, alias contemnit. Sic celeriter ambulantes, si cogitatione aliqua irretimur, multum à priore concitato gradu remittimus, donec postea recordantes, velocius iterum viam suscipimus. Id quod sanis, sed mente occupatis contingit, contingere similiter solet, si mens ex morbo laboret, adeo vt ad vrinam reddendam, aut aluum deiciendam, non nisi admoniti accedant. Propterea Galenus, Philiscum habuisse, ait, spiritum magnum, & rarum, veluti reuocato, hoc est ve-

luti admonito ad respirandum, quod idem est ac si diceret, fuisse magnum, & rarum ex magnis intervallis. Alij reuocationem intelligunt inæqualitatem respirationis, cum videlicet spiritus intus reuocatur; vt in plorantibus pueris conspiciamus, quibus in medijs lachrymis, & quærelis, ingeminat respiratio. Fit hoc in ægrotis propter imbecillitatem, non aliter ac senibus ambulantibus contingit, qui præ debilitate cespitant.

Alterum, quod Hippocrates notauit Philiscum per totum morbum habuisse, est tumor in liene orbiculari gibbositate eleuatus. Erat lien tumidus, si enim fuissent tumidi duntaxat muscoli, tumor magis in longitudinem, quam in globulum fuisset deductus; erat magnus; quippe oculis, aut saltem tactu percipiebatur, quod non cuiilibet tumori, sed solum magno conuenit. Erat insuper inflammatio: nam cum liene tumido, & indurato diuturnus fuit morbus, non autem acutus, vt hic fuit.

Interrogabitis, an febris fuerit accidens tumoris, vt i febris ex bubone. Respondet Vallesius, non fuisse accidens: quoniam in excrementis aderant putredinis signa, quasi verò febres, quæ symptomata appellantur, omnes sint ephemeræ, at meminisse debuerat ab Hippocrate dictum *ex bubone febres omnes crta malæ, præter ephemeræ*. Profectò cum per totum morbum, hoc est, à principio morbi lienis tumor visus fuerit, dicendum est, hanc febrem in eo sensu dici accidens, in quo Veteres appellabant febrē pleurticam eam, quæ cum pleuritide fit, peripneumoniacam, quæ cum peripneumonia, hepa-

Gal. de
diff. mor.
hor. c. 5.

ticam, quæ cum hepatis inflammatione, phræneticam, quæ cum phrenitide, diceturque ista, splenitica, quia erat cum inflammatione, splenis. Hæ enim febres licet non sint verè symptomata, vt veteres arbitratos fuisse suspicor, quos Galenus repræhendit, nihilominus symptomatis vicem gerunt, quatenus alterius morbi, velut vmbra quædam, sunt, & hoc non tollit quominus veri morbi sint, hoc est affectus præter naturam lædentes sensibiliter, per se operationes. Dixit optimè Dinus, febrem semper esse morbum, sed respectu cogitationis nostræ, vt ad operationem dirigamur, symptoma dici posse: nam dum scimus, febrem esse symptoma, sci- mus, non omninò ad illam dirigendam esse cogitationem, sed simul ad morbum, ex quo pendet. Sic in Philisco, sanguis quidem si detraheretur ex brachio, debebat extrahi ex brachio sinistro, respectu habito ad inflammationem sinistri lateris. Si febris potum frigidæ expostularet, non erat exhibenda frigida propter internam inflammationem, & alia similia.

Tertium huic morbo perpetuum fuit sudor frigidus, signum lethale, dicente Hippocrate, *frigidi sudores cum acuta quidem febre mortem*, sed cur febre acuta, subinde calidissima detentum, corpus frigidum sudat? An quia sudor frigidus frigiditatis externæ est comes, densatur vapor iuxta cutem, cum autem cutis sit frigida, sudorem ibi detentum frigidum esse oportet. Si igitur externa frigebant, diceretur hæc febris lipyria, in qua externa frigent interiora vruntur.

Verum quoniam Hippocrates non dicit toto morbo

morbo fuisse extrema frigida, dicit tamen toto morbo fuisse sudorem frigidum, alia querenda est ratio, & confugiendum ad caloris naturalis extinctionem: quippe ob defectum naturalis caloris vapores in aquam concrecentes, non habent à quo incalescant, propterea remanent frigidi. Addite ex caloris febrilis praesentia fieri antiperistasin, quo pacto in aestate aquae sunt frigidiores, quam hyeme. Erat hæc febris helodes, seu typhodes, sic febres, quas continuus comitatur sudor, Græci appellant.

Quartum; quod annotavit, est exacerbationes fuisse diebus paribus, quod pollicebatur indicationem die pari futuram, cumque ex morbi violentia, iudicatio debuit præsto fieri, non alia inter dies pares potuit esse, nisi aut quarta, aut sexta, aut octava, quartam euasit, quia

morbus aliquantulum quieuit: tertia

enim die visus fuit à febre liber,

ad octauam peruenire non

potuit, reliquum erat

ut sexta morere-

tur.

Et ita conti-

git.



ÆGROTVS

SECVNDVS.



SILENVS habitabat in Platamone, prope filios Edalcidis. Hunc ex lassitudinibus, & potationibus, ac exercitijs intempestivis febris corripuit. Cœpit autem agrotare ex lumbis, & caput gravitas tenebat, & colli distentio erat. Ab aluo, prima die, biliosa, mera, spumosa, abunde colorata, multa prodierunt. Urinæ nigræ nigram subsidentiam habentes: siticulosus, lingua resiccata, nocte nihil dormiuit. Secunda die febris acuta, secessus plures, tenuiores, spumosi. Urinæ nigræ, nox molesta, parum deliravit. Tertia omnia exacerbatâ sunt, præcordij distentio vtrinque oblonga ad umbilicum submollis: secessus tenues, subnigri, urinæ turbata subnigræ. Nocte nihil dormiuit, sermones multi, risus, cantus, continere se non patuit. Quarta per eadem. Quinta secessus biliosi meri, laeves, pingues. Urinæ tenues, pellucidæ, parum resipiscebat. Sexta circa caput parum sudavit. Extremitates frigida, liuida. iactatio multa: ab aluo nihil prodijt. Urinæ suppressæ sunt, febris acuta septima die voce destitutus est. Extremitates non amplius recalescebant: nihil minxit. Octava sudavit frigidum per totum sudorem: papula cum sudore, rubræ, rotundæ, parvæ, velut vari permanebant, non absedebant. Ab aluo verò cum parva irritatione, stercora tenuia velut inconcocta, multa prodibant cum dolore. Urinam reddebat cum dolore mordacem. Extremitates parum recalescebant. Somni tenues, soporosi, Vox intercepta, urinæ tenues,

pei-

pellucidæ. Nona per eadem. Decima potum non
suscipiebat. Soporosus erat, somni autem tenues. Ab
alio similia. Minxit acervatim subcrassum deposti-
tum subsidens: subsidentia crassæ farinæ similis, albæ.
Extremities rursus frigida. Undecima mortuus est.
Ab initio huic, & ad finem usque spiritus magnus
rarus: præcordij palpitatio assidua. Aetas erat circa
annos viginti.

Non est iste Silenus cuius meminit in vniuer-
sali constitutione : nam ille, veluti Philiscus, stil-
lam sanguinis è naribus habuit, & sexta die obiit,
in hoc, nec stillæ sanguinis fit mentio, nec mors
nisi vndecima accidit, propterea alius quid fuit:
nomen enim Sileni Græcis familiarissimum, fre-
quentissimum erat. Multa huic acciderunt, quæ
etiam Philisco, aliqua tamen diuersa, vt lumbo-
rum dolor, & capitis grauitas, alui fluxus, præ-
cordij distentio ad vmbilicum sub mollis, papu-
læ rubræ, inclinatio ad somnum, exacerbationes
diebus imparibus, & alia.

Narrat prius causas procatacticas, hoc est, antecedentes externas manifestas, à quibus egrotavit, eę fuerunt lassitudines, potationes, exercitia intempestiva: quamvis autem causę istę nihil, quod curationi vsui sit, edoceant, teste Galeno, nihilominus ad cognitionem plurimum facere idemmet scriptum reliquit in libro localium, propterea eas considerari iubet, passim, ab Hippocrate edoctus. Fuerunt autem causę primitivę, quę Silenum in febrem incidere fecerunt, in primis lassitudines, aliqui vertunt labores, causam scilicet pro effectu accipientes: quippe labor causa est defatigationis, nisi defa-

tigatio fit spontanea. At ista Sileni non videtur fuisse spontanea: tum quia Hippocrates non simpliciter dixisset lassitudines, sed cum addito, vt solet, spontaneas: tum quia hæ Sileni lassitudines recensentur inter causas externas, lassitudines autem spontaneæ externis causis opponuntur: quippe idem est dicere lassitudinem spontaneam, ac si dicamus lassitudinem, quæ non fit à causa externa, sed interna.

G. 3. de
tép. c. 2.
l. de caus.
morb. c.
3.

Fuerunt præterea *potationes*, scilicet vini. Dubitat Mercurialis quomodo potuerit vinum febrem, affectum videlicet calidum excitare; cum tamen vinum ex sententia Galeni frigidorum affectuum sit causa: Respondet sibi met, potationes non fuisse solas, sed simul cum lassitudinibus, & exercitationibus. Verum quoniam hæc responsio non videbatur satisfacere, aliam adiungit, nempe, vinum moderatum calorem naturalem fouere, immoderatum morbos excitare calidos, immoderatissimum frigidos, vt pote quod calorem naturalem extinguit. Verum ista trimembris diuisio nullibi apud Galenum reperitur, qui vinum moderatum comparat oleo flammam fouenti, vinum immoderatum oleo superfluo flammam suffocanti. Deinde vinum immoderatum, quod excitat morbos calidos, vt calorem præter naturalem excitat, sic minuit naturalem, si vero ad caloris naturalis extinctionem procedatis, ad interitum deuenietis: neque enim dicimus fieri catarrhos & alios morbos frigidos propter caloris naturalis extinctionem, sed propter eiusdem diminutionem. Vallesius ex potationibus cruditates, ex labo-

laboribus, & exercitijs biliosos humores excitatos, existimat fuisse causam, cur Silenus morbo composito laborauit: erant enim alia symptomata bilem, alia pituitam attestantia, bilem, excrementa biliosa, quæ prima statim die prodierunt, pituitam, sudores frigidi, & somnolentia. Confirmat etiam hanc sententiam vniuersalis constitutio: quippe ea propter temporis inconstantiam, & biliosos, & pituitosos affectus grassatos fuisse. Hippocrates narrauit.

Mihi quidem videtur ex vini potu posse corpus prætermodum incalescere, & febrem excitare, sic Galenus inter causas febris ebrietatem reponit. Nam potus vini, velut etiam aliæ causæ calefacientes, possunt faciliè febrem ephemeram excitare, quæ in corpore prauis humoribus referto, degenerat in putridam, vt Galenus etiam fatetur. Cæterum ex ebrietate morbos frigidos ortum habere dicimus, nempe ex ebrietate asidua: quoniam potandi consuetudo, quemadmodum etiam lurconandi, calorem naturalem, vt congeries lignorum ignem, opprimit. Et quis dubitat, homines gulæ deditos in hydropem, tractu temporis incidere? quamuis autem, & hydrops ex morbis acutis fiat, teste Hippocrate in prognosticis, & catarrhi ex intemperie cerebri calida, & alij multi morbi frigidi ex calore, cum hoc fiat per accidens, non tollit, vt calor per se calidos efficiat morbos. Ex vino itaq; calido, calidus fit morbus per se, ex eiusdem vini per asuefactionem potatione, morbi frigidi per accidens. Potuit Silenus febre ardente corripì ex immoderato vini potu, in vna cæna possunt &

G. 1. def. feb. c. 2.

G. 8. meth. c. 7.

Hip. 2. progn. 1.

potatores, longo potandi usu, in epilepsias, paralytes, & reliquos morbos frigidos, à Galeno commemoratos, labi, possunt & ad apoplexiam disponi, vnde aphoniacum ebrium febre superueniente iuuari, dixit Hippocrates: quia scilicet à materia frigida, genita ob suffocationem caloris, aponia, quam etiam apoplexiam dicere possumus, ortum habet. Itaque si causas, quæ per accidens agunt, consideremus, possunt etiam è contrario morbi calidi fieri à causa frigida e.g. quando humor crassus pituitosus, obferrans meatus, & caloris ventilationem impediens inflammationes internas v. g. pleuritides excitat. ideo in hyeme Hippocrates pleuritides, peripneumoniasque fieri dixit, non alia de causa nisi ob meatuum constipationem.

Tertia causa fuerunt intempestiuæ exercitationes, profectò idem de exercitio, quod de vino solet dici, possumus affirmare, quid enim exercitio in tempore, & mēsurā factō salubrius? quid rursus, si intempestiuè fiat nocentius? sanitatis studium, inquit diuinus Hippocrates, non satiari cibis, & impigrum esse ad labores, labores, inquam, tempestiuè factos (laboris nomine exercitium intelligite) quos idem, quo tempore conueniant, demonstrat, inquires, *labores cibos præcedant*, & rursus *labor, cibus, somnus, venus omnia mediocria*, innuens scilicet, quo ordine his uti oporteat, & laborem, siue exercitationem ante cibum conuenire, quod si præposterè fiat, hoc est, à cibo, intempestiuè factum dicetur. Dicitur etiam exercitium intem-

pestium ratione temporis, quo durare debet :
 neque omnibus vna, & eadem conuenit norma.
 Calidis omninò exercitium interdicat Hippo-
 crates. Senib. non quidem vehemens exercitatio, *H. 6. e-*
 sed nec pcnitus quies conuenit, vt Galenus vult. *pid. sec.*
 Præterea alia hyemis, alia estatis est exercitatio. *4. te 15.*
 Silenus nec tempus, nec modum in exercitio ob- *G. 5. fa-*
 seruans calorem præter naturam concepit, & *nit.*
 subinde febrem. Vnaquæque ex his potuit fe- *tuend.*
 brem excitare, omnes simul concurrentes, longè *c. 3.*
 melius.

Potuit ne ex causis istis externis febris primò
 esse ephimera, quæ postea ob corporis appara-
 tum, in putridam degenerauit? Mercurialis ne-
 gat: quoniam Hippocrates dixit *ignis corripuit*,
 & per ignem non nisi acuta febris intelligitur.
 Mihi aliter videtur: nam febris ephimera, licet
 non sit periculosa, nihilominus ob spirituum, in
 quibus accenditur, tenuitatem ingentem secum
 habet flammam, non tamen valde mordacem,
 nihil autem prohibet hanc intra paucas horas
 abire in putridam, nec in hoc est immorandum,
 vtpote quod nec ad prælagiendum, nec ad cu-
 randum quicquam facit.

Corripuit eum ignis, hoc est, ardentissima fe-
 bris non πυρετός, sed πυρ quam comitabantur
 lumborum dolor, capitis grauitas, colli tensio,
 & diarrhæa biliosa. Erat quidem affectus phleg-
 monosus, nempe ex plenitudine, & cacochymia
 compositus. Plenitudo indicabatur dolore lum-
 borum, colli tensione, capitis grauitate: quip-
 pe vena caua ascendens, & per lumbos, & cer-
 uicem ad caput, cervicalibus, furculis, san-
 gui-

*Sicut
 Erasim.
 accidit
 infra
 egrot. 8.*

guinem transmittens, adeò plena erat, ut dolores in his partibus, grauitatemq; efficeret. Cacoehymia alui fluxu bilioso significatur: erat namque accensi, subinde prauis humoris index. Ut ex conditionibus, quas Hippocrates narrat, fit manifestum.

Ab aluo prima die -- In primis, quod prima die hæc deiectio incæperit, praua censenda est: nihil enim tunc excernitur naturæ ratione, sed sunt omnia hæc casus præternaturam earum, quæ in corpore sunt dispositionum, ut Galenus ait. Deinde quia erat biliosa: siquidem bilis ab excofacto sanguine fit, unde biliosi excrementi copia, copiam excedentis caloris demonstrabat. Tertio quia mera, quippe (ut Galenus in porrheticis ait) non solum vomitiones syncere (quas Hippocrates ibi, & in prognosticis damnat) malæ sunt, verum quoque & deiectiones, & sputa, & urinae, & quiduis aliud. Nec vos deterreat idem, qui in commento historiæ, qui in Dealcis horto iacebat inquit *proprium ubi colorem quisq; humor, & formam retineat synceram, ibi eum dicimus merum edi*, non inquam vos deterreat, nam syncerum pluribus dicitur modis.

Erant præterea, quæ Silenus deiiciebat *spumosa*, quæ ebullitionem significabāt: quamuis enim Galenus spumam, tum propter frigiditatem, tum propter caliditatem fieri dicat, cuius rei signum affert tum ventos in aquis spumam concitantes, tum efferuescentem eam, quæ in lebece est caliditatem, nihilominus frigiditas spumam non concitat: nam venti, non quia frigidi sunt, sed quia maris aquam agitant, eam spumescere

fa-

faciunt: Vnde melius idem, aut agitationem humidi propter spiritum flatuō sum contentum, aut ebullitionem à calore factam, spumæ causam statuit. Vt autem omnes causæ ad vnam reducantur, (quod quidem, quoties fieri potest, *G.2. pro-* semper ex arte est) siue sit agitatio in aqueo, & *gn. 20.* aereo; vt in mari furiosis ventis agitato, & in al- *7. a-* lisione vndarum ad scopulos, siue sit ebullitio *ph.30. &* facta à calore, vt in lebete aqua pleno, & in ligno *2. aph.* viridi cum comburitur, proxima causa est attenuatio partium humidi aquosi, quæ dum in vapores conuersa egressum per crassiores substantiam quærit, detinetur à substantia illa crassiore, suam integritatem retinere conante, & detenta frangitur in parres minimas. quod si substantia illa sit facile cedens, vt est aqua, facile exitum præbet, & cito spuma desinit. Si sit viscosa, & difficilior cedat, diutius vapores remoratur, & propterea spuma diutius durat. Itaq; biliosa materia in corpore febriente aliquas partes attenuat, quæ exitum parant, & detinentur, ita ebulliunt, & spumescunt, & merito spuma dicitur ignei caloris soboles.

Hinc intelligetis sententiam quãdam Hippocratis, siue autoris prorrheticon quicumque ille fuit *deiectiones spumosa, synceraque desinentes morbum exacerbant*, dixit *desinentes*, hoc est, in morbi progressu, seu tractu temporis. dixit *morbum exacerbant*, hoc est, morbi exacerbationem significant. quod in hunc modum explico. Maiores bullæ in principio excitantur, quia tunc maior adest copia vaporum exitum sibi paratium, deinde tractu temporis, deficientibus vaporibus, minui-

*1. prorr.
sect. 2.
tex. 15.*

minuitur spuma. Si igitur tractu temporis, cum spuma debuit minui, tunc demum apparet, signum est exacerbationis, seu potius nouæ ebullitionis. Itaque spumosa deiectione semper est malum signum, quia igneum calorem ebullitionis autorem significat, longè deterior in fine, quia tunc cessare debuerat ebullitio, & tantum abest, ut cesset, quin potius denuò apparet. In Sileno fuit in principio, & incendium magnum significauit.

Erant præterea abundè colorata signum aduersionis, sed cum dixisset syncera, visus fuit dixisse abundè colorata, neque erat cur hoc adiungeret. Verum addidit, abundè colorata, ut declararet, quomodo syncera essent: nam si fuissent biliosa syncera primo modo, hoc est ex bile, nullo altero humore permixta, potuissent esse flaua, & suo sero diluta, cum ergo addat benè colorata, indicat, se loquutum de synceritate ob exhaustum ichorem.

Erant etiam multa, quæ multitudinem materię, magnitudinemque ardoris materiam accumulantis significabant. Nonne erat bonum, multas esse: si quidem euacuationes diminutæ damnatur? Multitudo in euacuationibus symptomaticis magis asserre potest difficilem tolerantiam, quam conferentiam, neque enim hæc est ex his, quæ ab incendio liberant. Hoc eleganter scripsit Galenus in hunc modum, *in febribus admodum acutis, nihil mirum si pura bilis in corpore producitur, siquidem, & adeps, & caro tenera, ac paulo ante concreta, sub huiusmodi febrib. tabescit, & sanguis adurit, concurrere autem hæc ad alium, & intestina, cum tabent proprium est, ubi tantum nervosæ partes labo-*

laborant cum ipsis enim vitiatur, lediturque os ventriculi, quod maxime nervosum est, &c.

Biliofa porro excrementa bene colorata, & spumosa, siue excernantur, siue retineantur, pessima sunt. Retenta acerbissimos gignunt dolores, incendium fouent, anxietudines excitant, à quibus, neq; excretionē liberantur, ac præterea exeuntia partes, per quas transeunt, exulcerant; crebram exsurgendi necessitatem iniungunt, vnde somni interruptio, defatigatio, virium languor. Quod si flaua bilis æstu fluctuet in ventriculi tunicis, nec exitum habeat, tunc nausea, & anxietudo crescit, vehemens illius partis æstus molestat, fitque cardiogmos, & cardialgia, & aliquando etiam syncope.

Tandem, quod ultimo loco circa hanc biliosam diarrhæam aduertendum se offert, est, eam capisse præcedentibus lumborum doloribus. Lumbos appellant medici interstitium, quod est inter os sacrum, & dorsum quinque vertebris comprehensum, cui multæ adhaerent partes, quarum aliæ continent, vt muscoli spinæ, & spina ipsa, aliæ continentur, vt nerui, renes, vena caua, intestina, mesenterium. Cum igitur intestina inter lumborum partes comprehendantur, facile fuit humorem, qui in lumbis detentus, dolores excitabat, per intestina exitum suscepisse, & hoc prauum est ex prorrhético, *In biliosis, syn-*
cerisque deiectionibus spumosa efflorescentia mala, *z. prorr,*
tum aliàs, tum ei, qui lumbis ante doluerit, at-
que eiusmodi deiectiones intestina permeauint. Et hoc quidem merito est dictum: siquidem bilis sua mordacitate, & acrimonia effecit, vt

ad intestina è lumbis permearit.

Verùm dicet aliquis, si spumosa erat deiection, cur erat à lumbis, non autem à capite? Etenim *H. 7. a- ph. 30.* Hippocratis sententia hæc est, quibus in alui profluuijs excrementa spumosa sunt, his ex capite defluit. Aduertere oportet, Hippocratem in aphorismo loqui de deiectione spumosa pituitosa, & hanc à capite fluxam esse credidit. Deinde hanc sententiam vniuersaliter acceptam non recipi à Gale-
no: siquidem, & à vasis in ventriculum exonerantur, & ab ipso ventriculo possunt spumosa educi. Ego quidem mihi, persuadeo, in quacunq; corporis parte posse feruentissimam bilem ebullitione spumas concitare, nec Hippocratem aliter sentire, sed solum voluit pituitosos fluxus, si spumosi sint, à capite descendere: quippe in pituita non fit ebullitio ab igneo calore, vt in bile, sed fit à flatu, qui agitatione concitatur, agitatio autem contingit in longo itinere à capite ad intestina.

Existimabit tamen aliquis, pituitosas etiam deiectiones in acutis febribus fieri spumosas, ex sententia autoris prorrheticon, quæ sic habet. *1. porr. sect. 2. tex. 18.* In acutis biliosis, albicantes, spumose, & picrocholæ deiectiones malæ, quibus verbis videtur insinuari albicantes deiectiones, hoc est pituitosas, fieri spumosas in acutis febribus, quod non fieret, nisi pituita concepto ardore ebulliret. Videtur igitur, etiam pituitosum excrementum, ebullitione facta à calore, spumescere, Verum non ita est: nam calor, qui spumas ebullitione concitat, si pituitam arriperet, eam omnino in alium humorem permutaret. Prædicta autem

tem sententia Galeno videtur suspecta, aut saltem correctione digna: quippe si albicans est materia, quomodo simul picrochola, hoc est biliosa? Putat ergo, vel legendum adiecta negatione *non picrochola*, vel omittenda dictione *picrochola*, vel intelligendum vno tempore *albicantia* alio *picrochola*, vel si tempore vno scerni vtraque quis asserere voluerit, albicantia quidem tum constantium, tum duorum excrementorum colorem indicabunt. picrochola veró ea, quæ circa ipsa sunt, bilem substantia tenuem habere: consueuerunt autem tales excretiones *πικρόχολα*, idest circiter coloratas appellare.

Atque hæc de diagnosi, & prognosi diarrhææ, quæ simul cum febre Silenum inuasit, quam ego, non fuisse accidens consequens ad febrem, neq; febrem fuisse istius diarrhææ accidens, sed vtrumque ab vno tertio existimo. Nam quoniam, ob præteritæ vitæ errores, multam bilem coaceruauit, huius pars quædam intra venas ebulliens, ardentem, hoc est tertianam continuam excitauit, pars altera, ad intestina transfusa, ventris fluxum effecit. Miror tamen, non transiisse diarrhæam hanc in dysenteriam, mordicante, & vlcerante intestina bile præ nimia acrimonia.

Vrinæ nigre nigram subdentiā habentes -- Omnia hæc: nempe vrinæ, & sedimenti nigredo, sitis, linguæ ariditas, & peruigilium, statim in principio signa erant magni incendij in humore bilioso, prius, ob vitæ errores accumulato: sitis & peruigilium, & siccitas à caliditate sunt: sitis exhausto humore in ore ventriculi, quod malum

linguæ cōtinuatur, quia eadē est tunica, quæ linguam, & quæ ventriculum vestit; nempe ventriculum interius, exterius vero linguam, perungilium, quoniam ex humore adulto vapores ad caput eleuati, mordacitatis participes erant.

Secunda die febris acuta -- Non quod prima die non fuerit acuta, sed quod secūda apparuit acutior. Multoties Hippocrates in prognosticis ait *in morbis acutis*, sed cur ita, si in prognosticis solum de morbis acutis agit? nempe, quando addit *in acutis*, intelligit *in acutioribus*. Persenerant hac secunda die vrinæ nigredo, creuit alui fluxus, cuius materia facta fuit tenuior, apparuit de nono principium delirij. Secessus fuerunt plures, & tenuiores. possumus dicere fuisse plures, quia tenuiores: erant tenuiores, concurrentibus ē venoso genere in ventrem, & intestina, fuis, liquatisque humoribus, & ideo plures erant, plures, inquam, tum quantitate, tum numero, quantitas confluxu liquatæ materiæ augebatur, numerus, ob frequentiam deijcendi, frequentia, ob materiæ acrimoniam, acrimonia à calore liquante, vt Hippocrates voluit. Si quærat, cur materia tenuis non exibat potius per vrinam, cum tamen Galenus in colliuationibus, id quod tenue est, à renibus trahi, & per vrinam excerni, dixerit? An quia secessus isti tenuiores quidem erant, quàm reliqui præcedentes, non tamen adhuc adeo liquidi, vt à renibus traherentur? An quia natura alui fluxu assueta, & valde perturbata, non potuit aliam viam quærere, quam si suscepisset, optimum foret, multis namque ex tempestate contigit

sarra-

*Hip. de
viēt. a-
cut. tex.
112.
Gal. 3.
sympt.
caus. c. 2.*

sanari à dysenterijs, ob superuenientem strangu-
riosum vrinæ confluxum, quod Hippocrates
narravit.

Nox fuit molesta, insomnia, cum aliquo deli-
rio. Peruigilium, & delirium biliosi humoris ad
caput raptum significabat, simul autem deie-
ctiones augeri, naturam valde molestari, signum
erat: quippe sursum, & deorsum duobus contra-
rijs motibus agitabatur.

Tertia omnia exacerbata sunt – Respondebant
per impares exacerbationes, & hoc, vt diximus,
melius erat, quam per pares. cæterum, vnum ta-
men exiguum bonum inter multa magna mala,
quid proficeret? In hac exacerbatione nouum
quidpiam apparuit, præcordij distentio, vtrinq;
ob longa ad vmbilicum sub mollis, hoc est, sub
vacua, erat tensio in præcordio, scilicet in hypo-
chondrio, sine tumore, quia inflammationem
septum transuersum patiebatur, inde per conti-
nuitatem sursum trahebatur hypochondrium.
Mercurialis inflammationem fuisse negat, quia
non dolebat, potuit tamen dolor, hoc est, do-
loris causa, adesse, & æger dolorem non sentire,
quia mente ægrotabat; erat quippe delirus. Sed
instabitis, dolori septi transuersi respirationem
frequentem deberi, sed iste ægrotus, (vt in fi-
ne historiæ additur) toto morbi decursu respi-
rationem magnam, & raram habuit. Habuit
quidem: quia præualebat delirium. Iam in
Philisco dixi, in dolore cum delirio, si dolor
præualet, respirationem esse crebram, si deli-
rium, raram.

Adiungit Mercurialis, risum fuisse cum cantu,

& hilaritate, quare pertinebat ad animum, neq; potuisse fieri ex sola titillatione septi transuersi: neque enim in alijs febribus ardentibus, in quibus datur idem ardor, contingit idem risus. Sed debuerat animaduvertere, non in omni febre ardente adesse septi transuersi inflammationem, aderat in hac, ac proinde tumor præternaturam habens secum aliquantulam continui solutionem, ad quam sequebatur risus, vt nos docet historia narrata à Galeno militis, qui vulnus accipit penetrans vsque ad septum transuersum. Et quatinus militis risus fuit tumultuosus, Sileni vero cum hilaritate, nihil refert. nam miles ex vulnere, hoc est, ex magna continui solutione dolebat, & simul, ratione partis vulneratæ risus aderat, risus autem simul cum dolore tumultuosus erat. Exigua vero solutio continui in Sileno satis erat ad excitandum risum, non vero ad tantum concitandum dolorem, quantus redderet risum tumultuosum.

Interrogabitis vnde nam Sileno hilaritas? nempe ex risu: quemadmodum enim risus oritur ex lætitia, sic lætitia ex risu: quippe risus expansio quædam est, expansione spiritus dilatantur, & animus fit hilaris. Experimento etiam constat, fieri ex risu lætitiā, plorantes pueros ad risum compellimus, & subinde à planctu auertimus.

Sed dicat nunc aliquis pro Mercuriali inter tot praua signa prauam cacochymiam attestantia, potuit ne adesse signum attestans benignitatem sanguinis? at si risus iste erat desipientia cum risu, securior erat alijs desipientijs, ex decreto

creto Hippocratis, non ob aliā causam, nisi quia *H. 6. e-
ph. 53.*
desipientia cum risu ex bono fit sanguine. At si
humor erat mitis risum faciens, eius vapores mi-
tes debuissent esse, ac proinde magis ad conci-
liandum somnum, quam ad inducendam vigiliam
aptus, & tamen Silenus non dormiebat. Tandem
deiectiones adustæ, vrinæ subnigræ melancholi-
cum humorem præferebant, cuius comites sunt
metus, & mæstitia; magis ergo conueniens erat
huic ægroto, ex parte humoris prædominantis,
mæror, quam hilaritas; fuit ergo hilaritas ex spi-
rituum expansione. ideo dixit Dauid, in tri-
bulatione dilatasti mihi, nempe, cor, & spiritus.
hoc est lætum, consolatum me fecisti, fuit, in-
quam; hilaritas ex spirituum expansione, ex-
pansio ex risu. nam quemadmodum planctu
constrictio, sic risu fit dilatatio.

Risu excipi debet Mercurialis inquiens, cau-
sam huius risus calorem moderatum, fuisse. At
vbi nam habebat Silenus istum calorem mode-
ratum, qui toto corpore vehementissimum pa-
tiebatur febrile incendium? Concludo risum esse
actionem, si ergo erat verus risus Sileni, cur, ait
Hippocrates *continere se non poterat*; Sero Val-
lesium in controuersijs dixisse, risum esse ex ijs,
quæ, quamuis libere fiant, nequeunt tamen om-
nino cohiberi, sicut de respiratione oportet di-
cere. Ita esto, risus omnino cohiberi nequit, sed
aliqua ex parte potest supprimi, quemadmodum
respiratio, quam cohibere non possumus, maio-
rem, aut minorem facere possumus. Cæterum
verba Hippocratis *continere se non poterat* indicat,
illum non potuisse aliquo modo risum modera-

re, maxime quia aderat mentis impotentia.

Quarta per eadem -- Quarta dies est index septimæ, nihil ad bonum contigit in quarta, non fiet ergo bona crisis in septima, nec mala, tum, quia nihil etiam novum, ad malum habuit, tum quia seprima dies Rex appellatur, in qua scilicet iudicantur ij morbi, qui ad bonum iudicari debent. Cæterum quoniam quarta hæc dies omnia prava habuit, quæ tres præcedentes dies habuerunt, nullam medico benè augurandi occasionem præstabat.

Quinta secessus biliosi, meri, læues, pingues -- Deiectiones biliosas, & synceras fuisse, nihil novum attulit: nam tales prius etiam fuerant: læues, & pingues manifestam ostendunt colliquationem. Omnis autem colliquatio mala est, non tamen omnis pariter mala, sed quædam alijs deterior, quod oportet medicum accuratè discernere. Duo aderant colliquationis in deiectionibus signa læuitas, & pinguedo, deterius signum erat læuitas, quam pinguedo, nam pinguis deiectio, sola pinguedine colliquata potest fieri, yt Galenus inquit, pinguedinis autem liquatio lethalis non est, dicente Galeno, deiectiones pingues, pravas quidem esse, non tamen lethales prorsus: nam calor, qui carnes colliquat feruentissimus est, moderatior, qui pinguedinem. Et alibi pinguedinem absunni, dixit ab igneo calore, non tamen vehementer maligno. At verò deiectio lævis, non nisi a magna fit consumptione, sicut enim læuitas in bonis optima est, sic in malis pessima: læue (yt inquit Galenus) redditur quic-

G. 7. a-
ph. 53.
G. 2. pro
gn. 22.
G. 3. e-
pid. se. 3.
agr. 1.
G. 2. pro-
gn. 21.

quicquid de corpore excernitur, aut quod habeat æqualem coctionem, vt nulla eius pars effugerit naturæ alterationem, aut propter vehementem consumptionem, vt nulla materiæ pars imperpeffa superfit. Vt igitur, quicquid salubre est, id omne salubrius redditur, quoties æquale fit, ita quicquid malum est, id omne euadit deterius si æquale existat. Vtrunque enim per omnem materiam apparet, quæ aut naturæ comptum recepit, aut turpitudinem prauitatis. *G. ibid.*

Vtina tenues pellucidæ - Fuerant vrinæ nigræ, & turbidæ, facta fuerunt *tenues pellucidæ*, poterant esse signum delirii, at iam antea delirabat, poterant auctum delirium significare: quippe humor ad cerebrum raptus, non iam vrinas tingebat. At Sileno delirium non fuit auctum, imo potius tunc resipuit. Relinquo Montanum, qui ineptissimam affert rationem. Videlicet non delirasse, quia non ascendebant iam vapores ad caput, non ascendebant autem, quia deerat agitatio: quoniam natura præ debilitate cessabat à pugna. Caterum non erat ita morti proximus Silenus, vt naturâ pugnam defereret: etenim postea, & deliria, & alia accidentia superuenerunt, quæ naturæ pugnam indicabant, & cum his per sex adhuc dies superuixit.

Vallesius, cum bilis, ait, atq; adeo maligna omnia excrementa, per debilitatem facultatis, & malo in deterius eunte, sursum reperent; tamen ab inflammatione hypochondrij in media via intercipiebantur, proinde apparere cæperunt vrinæ perspicuæ, & homo nihilominus mente

constitit. Tamen aucto magnopere malo, quod obsidebat hypochondria, omnia lethalia signa ab ea die magnopere sunt aucta, & mortuus esset celerrimè, nisi quædam exanthemata, varis similia oborta, liberare tamen non valentia, mortem retardassent.

Quæmadmodum Vallesius exanthematibus acceptum refert, quod æger vitam per aliquot dies prorogauerit, ita Mercurialis eisdem attribuit, quod non delirauerit: quia materia per urinas non expurgata, ad cutem, non ad caput se se contulit. neque recipit materiæ interceptionem à Vallesio allatam: nam si hoc fuisset equum erat, ut incendium magis in ipsis hypochondrijs perciperetur, quod tamen minimè narratur in sexta die contigisse. Decipitur tamen Mercurialis: nam sexta die febrem fuisse acutam, inquit Hippocrates, non quod in præcedentibus diebus acuta non fuerit, sed ad significandum acutiei augmentum. Deinde eadem sexta die iactatio fuit multa, iactatio autem magnum æstû significat; qui ex hypochondrijs ortum habebat, siquidem ibi minerâ mali latebat. Quicquid ergo dicat Mercurialis, præstat Vallesij coniecturæ adhærere, quam cum eo resipiscentiam quintæ diei tribuere exanthematibus, quæ octaua apparuerunt.

Sexta circa caput parum sudauit. — Sudor iste duobus nominibus præuus erat, tum quia non vniuersalis, tum quia circa caput membrum princeps: nam ubi sudor, ibi morbus. accedit etiam, quod comitem habebat extremorum frigiditatem, atque liuorem, iactationem multam,

cam, & alui vrinæque suppressionem. suppressio
tum excrementorum, tum vrinæ non fuit, vt
multi putant, ob debilitatem expultricis: nam,
si ita foret, non daretur regressus in homine ad
interitum tendente, ille tamen postea, & ab aluo
excreuit, & minxit. Fuit ergo causa istius sup-
pressionis ingens hepatis, renumque calor, qui
sua siccitate fæcum humiditatem fugit, & ad
exitum fæces renitentes facit, præterea idem
calor, ad se trahens, non finit excrementa alior-
um diuerſi, tandem cum deliraret (delirauit
enim per totum morbum, quod testatur spiri-
tus semper magnus, & rarus, licet per ali-
quod interuallum exiguum resipuit) delirantes
autem fæces reddere obliuiscuntur.

Septima die voce destitutus est. Factus fuit *apa-*
ros, hoc est, voce destitutus, non *mutus*, hoc
est, mutus. Aphonia fit vitiatis vel instrumen-
tis proximis, vel remotis. remota instrumenta
sunt omnia inspiratoria, hæc erant sana, quippe
spiritus erat magnus, qualis, pro voce edenda,
est necessarius, fuit ergo vitium in instrumentis
proximis, hoc est, in nervis recurrentibus, ad
quos potuit fieri aliqua non levis fluxio pituito-
sa: quamuis enim in venoso genere bilis abunda-
bat, quæ ardentis febris erat causa, nihilominus
in cerebro non deerat pituitosus succus, cuius si-
gnum fuit somnolentia, non valde post, sequuta,
deniq; septima dies pestilentium more, praua
fuit, quippe hæc febres in decretorijs deteriores
sunt, nempe certamine semper in malum ter-
minante.

Octava sudavit frigidum per totum. Fuit ne mi-

nus prauus sudor iste, quia vniuersalis, quā prior particularis in capite? conditio boni sudoris est, vt sit vniuersalis, quod ita intelligatis velim, vt si sudor bonus sit, hoc est calidus, vniuersalis sit melior particulari, sin prauus, nempe frigidus, quo plures occupat partes, eò est deterior.

Papulae cum sudore rubrae – Rubrae minus male erant, quā liuidæ, aut nigrae, nisi adessent alia grauitatem morbi significantia, cæterum aderat adhuc sanguis tenuis ruber, qui velut in auram conuersus, & per cutem dispersus, quasi in guttulas rotundas conuertebatur, quamuis eodem tempore, iam ex frigiditate liuor crassiorē sanguinem deturparet. Erant parua, iudicantes tenuitatem materiae, quo enim tenuior est, eo in minuitiores diuiditur maculas. Erant sicut vari; sunt autem vari græcè *ισθες* tubercula, quæ in facie solent apparere. Non dicit Hippocrates, apparuisse has papulas, sed *permanebant*, vnde occasionem arripiūt aliqui existimandi, eas iam prioribus diebus apparuisse, & hac octaua die permanfisse. Verumtamen Hippocrates diligens narrator, & vigilans persequator non omisisset diem, quo primum apparuerunt neq; hoc pretermisisset. ait igitur *permanebant*, non *abscedebant*. hoc est, papulae tunc apparentes non euanescebant, sed permanebant.

Non desunt qui dicant non *abscedebant* fuisse dictum, hoc est, non transibāt in abscessus, quod si ita accipiatis, vana remanet opinio Vallesij, qui existimat, has papulas fuisse variolas: vana, inquam est hæc opinio, quia variolæ *suppurantur*, præterea non solent variolæ (vt bene

ad.

aduertit Mercurialis) ad octauam diem apparitionem referuare, sed tertia, aut, ad summum quarta apparent. Posset aliquis dicere, fuisse morbillos, cœterum nec aderat tussis, nec frequens sternutatio, nec oculorum rubedo, quæ morbillos semper comitantur. Alij fuisse suspicantur punctículas, quæ nostro hoc æuo febrium malignarum sunt comites, & ex hac, & alijs Hippocratis historijs sibi persuadēt, has punctículas non esse morbum nouum veteribus incognitū.

Ab alio vero cum parua irritatione -- Sulpicor, paruam irritationem fuisse factam, subdita glāde, vt & Philisco; neq; enim auderet Hippocrates aliquid violentius in statu illo tentare. Magnæ autem adustionis signum fuit mordacitas tum fæcum, tum vrinarum, siquidem vtrobique probabant excreta cum dolore ob acrimoniam humoris, qui cum excrementis permiscebatur.

Erant stercora tenuia, vel inconcocta recte dicit velut, nam tenuitas illa erat, qualis solet in cruditatibus esse, non tamen tunc hæc erat causa, sed quam diximus, nempe, colliquatio, quæ vltterius semper progrediebatur, adeo vt iam sub finem subsidencia vrinarum esset farinacea, quam diximus omnium esse pessimam, quia iam partes solidæ à perseuerante maligno calore consumptæ erant.

Extremities parum recalescebat -- Aliqua videbitis nunc, quæ medicum possent seducere, vt existimaret, morbum in melius pergere, nempe recalescebant aliquantulum extremities, quod non dubiū est esse bonum signum, quippe frigiditas nō recalescens fit ob extinctionem; deinde
etiam

etiam somni, licet tenues, & soporosi, meliores sunt quam vigilia, quæ præerat, & iactatio, & delirium.

Præterea vox intercepta melior erat, quam quæ antea fuit omnino ablata, urinæ tenues, & pellucidæ, meliores quam crassæ nigræ. Cæterum dum aliquis inani spe detinetur, videtur urinam acervatim mictam cum farinaceo sedimento, extremitates frigidas, ad quas mors sequuta fuit. Vnde nam illud morbi in melius vergentis specimen? placet mihi Cardani responsio, nempe in lethalibus morbis dari etiam aliquam quietem, tum ob horas diei, semper enim matutina hora ægrotantibus est favorabilis, tum ob motum materiæ, quæ aliquando accipit viam in qua minus molestat, licet in ea non perseveret, tum ob astrorum dispositionem: certissimum namque est corpora nostra supernis lationibus esse obnoxia, tum ob comparationes causarum, ut si comparetur ærthatio huius horæ cum exacerbatione hesternæ diei in eadem hora, itaque quicquid boni tunc accessit, homini iam mortuo accessisse putandum est, nam Galenus ait, Silenum moriturum fuisse septima die, qua aphoniacus fuit factus, quod autem ad undecimum perduraverit, tribuendum est virium robori, quo erat præditus, ob ætatis florem; agebat enim annum vigesimum circiter. Mortuus fuit die undecimo, cui decernendi, sed magis præcipue indicandi vis inest. Habuit semper spiritum magnum, & rarum, & hypochondrij palpitationem ab inflammatione ortam: quippe inflammatio, ubi ar-

teria

teria adest, dolorem efficit pulsatilem, vt G. 2. loc.
est Galeni sententia, arteria autem affect. 1.
dorsalis non procul ab eo 3.
loco aberat.



ÆGROTVS TERTIVS.

HEROPHONTI febris acuta. Ab aluo pauca ab initio velut in tenesmo: postea vero tenuia prodibant biliosa, frequentiora, somni non aderant. Urinae nigrae tenues. Quinta mane surditas. Exacerbata sunt omnia. Splen eleuatus est. Præcordij distentio. Ab aluo pauca nigra prodierunt, delirauit. Sexta delirabat: ad noctem sudor, frigiditas, delirus permanebat, septima perfrigerabatur: siticulosus delirabat, noctu resipiscebat, obdormiuit. Octaua febricitauit, splen minuebatur, intelligebat omnia: doluit iuxta inguen, tumor partium edirecto splenis, deinde dolebat utrasque tibias: nox tolerabilis. Urinae coloris melioris parua, subsidentiam habebant. Nona sudauit, iudicatus est morbus. Intermisit. Quinta reuersus est. Statim autem splen eleuatus est, febris acuta, surditas rursum. post recidiuam tertia die splen minuebatur, surditas minor erat, crura dolebant, noctu sudauit. Iudicatus est die septimadecima. Neque delirauit in recidina.

Herophonti Febris acuta. Si primam partem huius ægitudinis consideratis, non minus periculosa habuit signa, & symptomata, quàm priores, & tamen illi perierunt, iste euasit. Verùm Philisco morbus per pares mouebatur, nec potuit, celestes influxus, inferiorib. causis fanentes, habere, neque crisim potentem. Iste autem per

impares mouebatur, ac proinde in diebus, magnam vim iudicandi habentibus, potuit se se exonerare à morbi sarcina. Silenus habuit plures vitæ errores, à quibus multitudo humoris cumulata fuit tanta, quantam natura non potuit superare, de isto similes errores non narrantur. Fuit eius febris acuta, & mali moris, neque enim possumus, non suspicari malignitatem, vbi statim in principio apparuit primum signum in vrina, primum symptoma, tum in actionibus læsis, qualis est vigilia, quæ modum excedebat, ac proinde erat mala: dicente Hippocrate *somnus, atque vigilia vtraque si modum excesserint, malum*, tum in excretis: Fuerunt namque primum pauca, vt in tenesmo, postea tenuia, biliosa, frequentiora.

H. 2. a.
ph. 3.

Velut in tenesmo — Non dicit tenesmo laborasse, sed excreta fuisse velut in tenesmo. Et hoc aduertite, quia postea adiungit, sequuta fuisse, biliosa frequentiora. Si prius fuisset tenesmus, non sequerentur frequentiora. nam nulla frequentior deiectio est, quam quæ fit in tenesmo: quippe tenesmus est frequens, inamo continua deiiciendi cupiditas: duo concurrunt in tenesmo, vlceratio recti intestini, & excretio viscosa, pituitosa, cruenta. habuit hanc excretionem, sed non habuit vlcerationem, quippe citò in diarrheam mutatio facta fuit, non autem in dysenteriam, in quam tenesmum transire dixit Hippocrates, dicendum ergo Herophontem habuisse tenesmum, quem Arabes appellant, non verum. Hoc tamen explicatione indiget, pro vt in meis exercitationibus medicis reperietis.

THUSIUS
MOS.

Hipp. li.
1. de
morb. int.
princip.

8.

Hipp. 2. prog. 32. *Vrinae nigrae tenues*-- Quoniam Hippocrates in prognosticis, inter exitiosas vrinas, reponit nigras, & crassas, accipiunt nonnulli has duas conditiones simul, & dicunt nigras, & simul crassas esse deteriores nigris tenuibus. Et ita Herophontem istum dicunt è morbo euasisse, cuius vrinae erant nigrae tenues, non euasisset, si fuissent nigrae crassae, sic etiam in Abderis Herophytus, & Nicodemus, qui vrinas nigras tenues minxerunt, saluati sunt. Verum tamen isti decipiuntur: nam si ex euentu est iudicandum, etiã mulier, quæ apud frigidam aquam in Thaso habitabat, vrinas perpetuò tenues nigras minxit, & tamen octogesimo obiit. Si ad rationem respicere debemus, tenues duplici nomine sunt prauæ; tum tenuitate, summam cruditatem indicante, tum nigredine, quæ vel ob summam frigiditatem fit, vel ob summum ardorem, deinde in morbis longis, vt in quartanarijs circuitibus in lienis, & renum morbis, vrinae nigrae min-guntur, & crassae, expurgante se per eas natura à melancholico succo. Similiter mulier morosa, quæ cum vrina nigra liberata est, copiosè descendentibus menstruis, consentaneum est, nigras crassas habuisse vrinas. Herophytus, & Nicodemus in Abderis nigras minxerunt vrinas, de crassitie, aut tenuitate non constat. Galenus nigras vrinas in opere de Crisibus damnat absolute, neque tenuitatem, neque crassitiem adiungit. *Habuit vrinas tenues, vt habuerunt alij, quos dixi, & hinc arguuntur Aetius & Auicenna, qui vrinam nigram tenuem non agnouerunt, quippe existimarunt, non aliter vrinam posse nigrã fieri.*

Hipp. 3. ep. sect. 3.

G. I. Cris.

I2.

Aet. te- tr. 2. ser.

I. 5. 44.

Auic. 2.

4. tr. 1.

c. 82.

fieri, quam permixtionē melancholici humoris, qui, cum crassus sit, necessario vrinam suā corpulentia incrassabit. Verū debuerant animaduvertere, posse à qualibet minima portione atrebilis vrinam tingi, ita vt sufficiat ad denigrandum, non autem ad incrassandum. Si verò dicatis cum Galeno deiectionem, si pauca atrabile misceatur, non nigram, sed liuidam fieri, id in deiectione admittam, in vrina negabo: quippe vrina fusio quædam est, & liquor, qui facile à substantia tingente penetratur, deiectio ob crassitiem inepta est ad suscipiendam tincturam. Sed cur datur nigra vrina tenuis; rubra autem non nisi crassa reperitur, quamuis sanguis tenuior sit humore melancholico? An quia color, quo intensior est, eò magis tingit, quo remissior minus. niger color intensissimus est, vt pote in extremo constitutus: iccirco nigri humoris quælibet portio sufficit ad nigram reddendam vrinam, rubri non sufficit?

G.2. pro-
gn.22.

Propter hanc vrinam, existimat Galenus Herophontem præter spem euasisse: quoniam ipse neminem cum hac vrina saluatum vidisse, contigit. Miror illum, neminem cum vrina nigra sanatum vidisse. cum tamen non sit omnino rarum: nam præter historias Hippocratis, in quibus multos cum hac vrina saluatos legimus, medicis medicinam facientibus hic casus multoties occurrit, & mihi pluries occurrisset plena fide testari possum.

G.1. cris.
12.

Quinta manē surditas. Existimat Mercurialis Hippocratem ea, quæ primis quatuor diebus contigerunt, confuse enarrasse, quoniam ex

alio-

aliorum narratione loquitur, & quinta die fuisse vocatum: nihil tamen prohibet, omnia à prima ad quintam diem fuisse similia, propterea omisisse diariam primorum quatuor dierum narrationem. Tamen quintæ diei exacerbatio, tertiæ exacerbationem supponere videtur: biliosa erat febris, de tertio in tertium monebatur. Cæterum exacerbatio quintæ, videtur fuisse valde maior, quam tertiæ, ideo dixit *exacerbata sunt omnia*.

H. 4. aph. 28. Surditas adfuit, à qua non potuit illum vindicare, alui fluxus biliosus, imò si rectè Hippocratis aphorismum consideratis, meritò surditas accessit, inquit Hippocrates *quibus biliosæ deiectiones, superueniente surditate, cessant, & quibus surditas, superuenientibus biliosis deiectionibus, cessat*: si igitur biliosæ deiectiones subsequerentur, liberarent à surditate, sed quia præcesserunt, & cessarunt, consentaneum fuit, superuenisse surditatem. Cessauit autem alui fluxus biliosus: siquidem prius ab aluo prodibant *tenuia biliosa frequentiora*. In hac verò quinta die, quando surditas accessit, ab aluo pauca nigra prodierunt. Metastasis praua fuit ista ab infernis, & ignobilibus membris, hoc est, ab intestinis ad superna, & nobilia, hoc est, ad cerebrum, & subindè ad auditorios meatus.

Fuit etiam in hac quinta die splenis eleuatio, & præcordij distentio. Hæc rursus altera metastasis laudabilior à capite ad lienem, concurrente namque humore ad sinistram partem lienintumuit, vt abscessus dici possit, ob hunc tumorem distendebatur præcordium, siue hypo-

chon-

drium. Et quamuis, quoties Hippocrates dicit hypochôdrium, nec addit dextrum, aut finistrum, debemus dextrum, tamquam dignius, intelligere, nihilominus in præsentem, quoniam lienis tumori adiungit tensionem hypochondrij, ratio postulat, vt finistrum intelligamus. Cum hoc tumore duo contigerunt, vtrumque valde timendum; vnum est delirium, nam descendente humore ad hypochondrium, cum cerebrum debuisset immune remanere, tunc delirium capisse, quid potuit magis præter rationem euenire? alterum excretio pauca, & nigra: hæc, quia pauca, non poterat proficua esse; quia verò nigra; lethalis videbatur, dicente Hippocrate in aphorismis. *Morbis quibuslibet incipientibus si atrabilis, vel sursum, vel deorsum exierit lethale.* Neque verò solam damnat atræ bilis deiectionem, sed etiam in præcedente, & subsequente aphorismo, omnem deiectionem nigram, siue cum febre, siue sine febre. Triplex enim est humor niger. quidam est fex, quæ in sanguinis generatione subfidet, cuius magna pars fertur ad lienem; ad ipsius nutritionem, & alios vsus. Alius est sanguis, qui deiectus per mesaraicas ad intestina, ibidem concrefcit, & denigratur. Tertius ex vltiore adustione, sanguinis, aut, aut bilis, & hæc est deterrima species, non concrefcit, splendet, saporem, & odorem refert aceti, cadens in terram fermentatur, muscas, & mures abigit, neque enim præ amaritudine audent illum gustare. Omnes autem istæ tres species, si deiciantur, prauum signum sunt, quippe debilitatem naturæ nequeuntis materiam retinere,

H. 4. a-
ph. 22.

donec eam corrigat, significant. tum etiam quoniam fæces nigræ, nigrum humorem syncerum ostendunt, syncerus autem humor, uti iam diximus, prauus est. Itaque quamuis omnis nigra deiectionio praua sit, præcipuè initio morbi; tunc enim nihil excernitur naturæ ratione, sed veluti casus eorum, quæ præternaturam in corpore fiunt, nihilominus, non omnis est æqualiter mala. Exactam atram bilem semper lethaliter excerni, Galenus ait, & in pestilentia quæ eo tempore, quo libellum de atra bile scripsit, fuit peruagata, non paucos ægrotos seruatos videt nona die, vel septima, vel vndecima, qui humorem excernebant, vel proximè ad atram bilem accedentem, vel ne mordicationem quidem, nec fædum odorem habentem, vel in medio horum consistentem, qui verò puram, exactamque atram bilem deiecerunt, omnes perierunt. Erat deiectionio Herophontis nigra, non tamen ob tincturam exactæ atræ bilis, sed ob aliquam ex alijs humoribus, alioquin non euasisset: siquidem Hippocrates de atra bile exacta videtur loqui, cum eam valde lethalem, & postridie, interimentem esse dicit.

Sexta delirabat, ad noctem sudor, frigiditas delirus permanebat -- Adhuc praua erant symptomata; sudor & frigiditas frigidum sudorem esse significant: nam si esset sudor, qui habitum corporis refrigeraret, fieret cum conferentia, at iste non solum nihil conferebat, sed potius comitem habebat delirium. Quamuis autem sudor soleat febres iudicare, nihilominus decretoria ne statim appareant, inquit diuinus Hippocrates, erat mor-

morbus adhuc in principio, neque coctionis vlla signa aderant, delirium admodum, perseverans, læsum cerebrum significabat.

Septima -- Diei septimæ in ingressu, adhuc poterat medicum perterrere, sub finem cæperunt signa fausta, veluti nautis in procella, apparere. Fuit principium cum refrigeratione, siti, & delirio, sub finem resipuit, & dormiuit. Verùm cum Hippocrates nullam narret præcedentem ab arte factam euacuationem, nec à natura copiosam, nulla fuit præcedens in vrinis visa coctio, non oportebat fidem habere, huic bono, quod præter rationem videbatur. Et solum poterat in eo prodesse, quòd morbus saltem inducias præberet, neque curreret furiosus; expectandum tamen erat, nec aliquid pronuncian- dum, donec æger à morbo expergefactus ostenderet, num somnus ille laborem fecerit, an potius delirium sedauerit, quod iam ante somnum sedatum videbatur.

Octava febricitavit -- Et quamvis dicat *febricitavit*, quod indicat febrem fuisse acutam, ego in alio sensu id accipio, nempe, quasi dicat, octava die; quamvis minuta sunt omnia, febris tamen perseverabat. Nec mirum perseverasse febrem, cum nulla euacuatione materia febrilis fuisset minor reddita, quamvis iam diuertebatur optimo naturæ consilio, hoc est *κατὰ τὴν* secundum rectitudinem; siquidem de crescente splenis tumore; inguen sinistrum, quod est splenis emunctorium, intumuit. Et iam, crescente diuersione, non solum ad inguen, sed ad crura demandabatur. Sed cur ad vtraque crura? nonne satis fuisset

occupare crus sinistrum? nempe materia ex vena descendente, cum deorsum detruderetur, ad ambas tibias detrudi debuit: quippe vena hæc bifurcatur, & ad utrasque tibias cœmunitas est vasorum. Sed dicetis, quid habet vena caua, cum liene, ad quem non caua vena, sed porta defertur. Nimirum ex iecore ad lienem transmittebatur succus melancholicus, quo lien intumescebat. lien exoneravit se in inguen sinistrum, hepar diuertit materiam per cauam descendentem ad crura, & ita lien minui cœpit propter materiam ad inguen demandatam, nec iterum creuit, propter diuersionem factam à membro mandante, hoc est à iecore, ad crura. Ex hac transmissione sequuta fuit *nox tolerabilis*, quia natura aliquantulum recreabatur, quasi deposita sarcina.

Urinae melioris coloris paruum subsidium habebant -- Magnum documentum, quo docemur, quanti facienda sit in morbis materialibus coctio humoris, quam Hippocrates ait, duo bona significare, primum securitatem, alterum breuitatem. Hæc duo præstò sequuta sunt. Quippe ex tot dierum, nempe, septem præcedentium pugna, cepit in octaua victoriæ signum apparere; coctio enim est victoria naturæ supra causam morbificam.

Nona sudauit, indicatus est morbus -- Sequuta est conueniens expulsio, nempe, per sudorem; quippe melancholicus succus in hoc egro abundabat, quem Hippocrates aquam appellat, quia scilicet melancholici multo ichore in sanguine abundant, cur autem melancholici magis quam

Hip. de morb. 4. & lib. de genit.

quàm alij, ichorosi sint, rationem esse puto; quia melancholia est fæx sanguinis à calore genita, ut igitur abundat calor terreas partes adurens, ita idemet calor humidus liquat. Ceterum cum parua subsidencia in Herophonte, non multam materiam concoctam esse indicabat, ita sudorem putò subsequutum, non valde copiosum; sudor enim, non nisi per aliquot dies continuatus, sufficiens est ad perfectè iudicandos morbos, quod quidam Noeticus adnotavit ad verba, illius sententiæ *sudores febricitanti si inceperint*: dictum est *sudores* in plurali, & additum *si inceperint*, quod continuationem quandam significat: cum igitur crisis ob hanc causam diminuta fuerit; non mirum, si æger recidiuauit.

Quinta reuersus est — Quoniam *quæ relinquantur ex morbis recidivas facere consueuerunt*; quoniam rursus, ex crisi imperfecta, non potuit non aliquid relinqui, recidiva contigit, & contigit ea die, quæ motui naturæ erat destinata, videlicet, quarta: quippe cessauit febris nona, & quinta die, postea redijt. Ita ut in hoc ægroto; siue numeretis dies decretorios, computando à prima radice, siue à recidiva, idem est. Constat autem, recidiuam ab exigua causa intus remanente fuisse orram: siquidem, præter recidiuarum legem, quæ solent suis radicibus esse deteriores, hæc fuit melior: nam in recidiva non delirauit, & durauit per tres dies duntaxat: quippe decimaseptima, sudore rursus adueniente, perfectè iudicatus est. Fuit autem à prima radice decimaseptima, à recidiva autem tertia.

H. 2. a-
ph. 12.

ÆGROTVS

QVARTVS.



N Thaso Philini uxorem, quæ filiam pepererat, cum purgatio secundum naturam facta esset, & aliàs leuiter degeret, decima quarta à partu die febris vehemens corripuit cum rigore. Ab initio verò cor dolebat, & circa percordium dextrum: muliebrium partium dolores: purgatio cessauit. Vbi verò glandem subdidisset, hæc quidem leuiora facta sunt. capitis autem, colli, & lumborum dolores permanebant. Somni non aderant. Extremitates frigida, siticulosa erat: alius combusta pauca egerebat. Vrinæ tenues ab initio decolores. Sexta die ad noctem multum delirauit, & rursus resipiscebat. Septima siticulosa: secessus biliosi abundè colorati. Octaua superriguit. Febris acuta, conuulsiones multæ cum dolore, multum delirabat. glande subdita exurgebat, multaque cum fluxione biliosa prodibant. Somni non aderant. Nonna conuulsiones. Decima parum resipiscebat. Undecima dormiuit: omnium recordata est. statim autem rursus delirauit. Vrinam autem reddebat cum conuulsionibus, acervatam, multam. Illis autem parum admonentibus crassam albam: qualis est ex his quæ subsiderunt vbi multo tempore sita fuerint conturbata: non subsidebat: color, & crassitudo talis, qualis est in vrinis iumentorum. Talia mingeat, quæ ego vidi. Circa decimum quartum diem palpitationes per totum corpus: sermones multi, parum resipiscebat, verum statim rursus delirabat, circa decimum

cimum septimum voce destituebatur, vigesima mortua est.

Cum purgatio secundum naturam facta esset -- Discrimen est inter *καταλυσια* idest menstrua, & *λόχεια* idest puerperia, quod illa singulis mensibus contingunt, & si retineantur morbos quidem gignunt, sed ut plurimum chronicos, hæc, si præternaturaliter intra tempus à natura constitutum, cessauerint, valde acutorum morborum, & lethaliū sunt causa, quippe in puerperijs praua est materia, siquidem fœtus id, quod probum erat, sibi accepit. Constitutum tempus mulieri, quæ masculum peperit triginta dierum est quæ feminam (ut erat ista) quadraginta: quippe femineus fœtus, ut pote frigidior, minus alimenti absūmit, & subinde plura relinquit excrementa.

Febris vehemens corripuit cum rigore -- Ex inflammatione vteri, qualem in hac muliere, saltem ex dolore circa partes muliebres, suspicari possumus, febrem fieri acutam scribit Hippocrates, *Hip. de morb. mul. 2.* cui assentitur Galenus, qui validas, vehementesq; febres in vteri phlegmone fieri, inquiens rationem reddit *Gal. de humor. & 6. epi. sec. 1. cō. 2.* quoniam vterus plurimas grandissimasque venas habet, in quibus, aut prope quas, si sanguis putrescat febrem succendi de synochorum genere necesse est. Est præterea alia ratio, videlicet maximus consensus vteri cum corde per arterias, quare si in alijs inflammationibus febris, quæ accenditur est magna, in inflammatione vteri longè maior esse debet. Rigor etiam vteri affectibus familiaris est: quippe vteri substantia membranosa est, & plurimos habet in sua com-

positione nervos, qua propter, cum mordetur, & pungitur, in consensu trahit viuersum nervosum genus, fitque horror, aut rigor, non aliter, ac iniecto in plagam acri medicamento.

Ab initio cor dolebat-- Patiebatur cardialgiam, seu cardiogmon, nempe dolorem, aut morsum, non quidem cordis, sed oris ventriculi, quod Veteres cor nominabant; non autem est dicendum, istum dolorem fuisse propter aliquam inflammationem illius partis: satis enim fuit, quod vapores ab vtero susciperet, ut ob hanc causam grauter doleret: est namque os ventriculi exactissimo sensu præditum, & ita esse oportuit, ut facile diuulsionem, quæ fames dicitur, perciperet. Est autem magnus vteri cum ventriculo consensus, ut ostendunt mulieres, vterinis affectibus conflictatæ, quas omnes comitatur inappetentia valde magna, nausea, importunisque ructus.

Circa præcordium dextrum-- Triplex erat dolor, vnus per consensum, quæ diximus in ore ventriculi, alij duo, propter duas partes inflammatas, iecur, & vterum. Iecoris inflammatio colligitur ex dolore dextri hypochondrij, inflammatio vteri, ex dolore partium muliebrium. Vallesius legislatorum more, ait, in iecore fuisse inflammationem, in vtero erysipelas; oportuisset tamen rationem reddere, cur ita sentiret, quod quia non fecit, deferendus est. Mercurialis, in iecore non inflammationem fuisse, existimat, sed phlogosin, hanc etiam Galeno antiquiores, nomine inflammationis, seu phlegmonis, compræhendebant, verum si sola esset phlogosis,

gosis, calor quidem sentiretur, non dolor. Ego multa in hac muliere signa reperio ab Hippocrate allata in inflammatione vteri, quæ licet erysipelate sit benignior, potest tamen occidere. cumque Hippocrates narret erysipellatis vteri signa, quæ in hac non aderant, non est, credendum, fuisse erysipelas. Cumq; phlegmon fiat ex bono sanguine, & hæc mulier per quatuordecim dies fuerit secundum naturam purgata, & in reliquis benè habuerit, magis credibile est ex sanguine, quàm ex bile, factam fuisse in vterum fluxionem.

Purgatio cessauit -- Inter euentus primæ diei, vltimo loco scribit purgationis cessationem: vnde videbitur alicui, prius febrem accensam, postea verò cessasse purgationem. quod si ita est, dubitare, possemus, num ex retentis puerperij febris fuerit orta, an magis ex febre, calore, exsiccante purgationes, cessasse. Mercurialis ait, vltimo loco factam fuisse mentionem retentionis purgationum, quia purgationes non visæ sunt cessare, nisi tardè, nam puerperia non fluunt iugiter, & continuatim, sed per interualla, vnde non statim animaduertitur vitium, sed post aliquod tempus. Respondet etiam aliter cum Hippocrate, mulieres verecundari, ac proinde istam erubuisse statim prima die purgationis defectum fateri. Verùm leuia sūt ista. Satis est, quod cessatio purgationis, inter ea, quæ prima die acciderunt, narrentur, de ordine vero non erat admodum sollicitus Hippocrates.

*Hip. I.
morb.
mul.*

Puto igitur, crassiores sanguinis partes in venis circa vterum detentas fuisse, & sanguinem,

iam

iam ab hepate inflammato procedentem, ac subinde valde calidum, ibi conculcatum incauuisse magis, & putredinem concepisse; vnde facta fuit inflammatio, & forsan ex putredine, tenuiores partes in bilem abeuntes, fecerunt, vt phlegmon esset erysipelatodes. hoc est, aliquantulum biliosi humoris particeps.

Vbi vero glandem subdidisset – Non quæ ad fæces extrahendas ano apponitur, de qua inferius, in hac ægrota mentionem facit; solet enim Hippocrates, quando de glande ad egerendum loquitur *προβήτα* hoc est, suppositoria, apposito *βάλανον* hoc est, glandem dicere, nempe, suppositoriam glandem, quando vero (vt in libris de morbis mulierum sæpissime facit) vult significare ea, quæ vtero sopponuntur, tunc simpliciter *προβήτα* hoc est, suppositoria dicitur. Ita videbitis in præsentè dictum, subdito supposito-rio, melius habuisse, & infra, subdita suppositoria glande, crebrò exsurrexisse, quod si Cornarius, cuius versionem aliàs sequimur, vtrobiq; glandem vertit, eum in hoc non sequimur, quippe græcis dictionibus non sese accomodauit, existimans fortasse, vt Mercurialis, qui Cornario semper adhæret, existimauit, vtrobiq; fuisse appositam glandem ad extrahendas fæces. Cæterum si ita esset, diceret Hippocrates, quid hac glande fuit extractum, sicut dicere solet, & inferius ex glande ait exsurrexisse. Fuit ergo suppositorum, quod, vel in vellere, vel simpliciter confectum apponi solet in vteri doloribus, aut alijs vterinis affectibus. Ceterum, cum suppositorium istud sit remedium locale, non debuit applicari, nisi ce-
lebra-

lebratis prius vniuersalibus euacuationibus, itaque cum adhuc esset in principio, non crediderim mulierem fuisse satis euacuatam, sed alterum duorum fuit, vel mulier ista ex consilio muliercularum suppositorium anodinum sibi applicari passa est, ex quo dolor quidem leuior est factus, sed hæc subleuatio non valde durauit, vel dicendum, vehementiam doloris, & grauitatem symptomatum medicum coegisse, vt ad curam coactam confugeret, & omitteret regularem, forsanque aliquod pessarium narcoticum applicuit, vt partis sensum obtundens, quietem aliquam induceret.

Capitis autem & colli, & lumborum dolores permanebant -- Quamuis remedium topicum eam partem, cui adhibitum est, consolatam reliquit, nihilominus aliarum partium labores non cessarunt. Capitis cum vtero magnus est consensus. Nam, inter reliquas corporis partes, vterus tum plurimas, tum maximas habet venas, & arterias, his repletis, & vitioso succo redundantibus, multo magis, si calor præter naturam accesserit, vapores multi, tum in stomachum, tum in caput, attolluntur: consentit enim vterus cum stomacho, & syncipite, vt ex 6. epidem. Per *Hip. & Gal. 6. epi. sect. 1. lex. 20.* venas ergo communes vtero, & mammis, multa antrorsum, per arterias colli ad posteriores partes capitis feruntur. Vnde etiam per eas venas, & arterias colli dolor fit; lumbi etiam dolent, quia præclusis acetabulis, vasa, quæ ad vterum pertinent, implentur, imbibunturque vincula, per quæ vterus vicinis partibus alligatur, ex quo lumbi maximè laborant.

Vapores, ab vtero eleuati, in cerebrum, & ventericulum, duo attulerunt mala, sitim, & vigiliam, propterea *siticulosa erat, somni non aderant*. Ventericulus à calidis fumis exsiccatus, sitim, cerebrum eorundem fumorum acredine punctum, vigiliam inducebat. *frigiditas extremorum* aderat, omnibus internis inflammationib. propria: quemadmodum enim (vt Galenus inquit) in morbis longis calor natiuus, præ debilitate, nequaquam permeat ad extremas corporis partes, sic in morbis acutis, propter magnitudinem inflammationis viscerum, parum sanguineę substantię in omne permeat corpus, plurimum verò eius in parte inflammatione affecta includitur, & ob eam rem, medię corporis partes, quę sunt thorax, ac venter, satis videntur calidę; videtur autem (teste eodem) solis accidere febribus, quę causones ab incendio nominantur, perniciosas, vel, si aliter libeat appellare, malignissimas. veluti lypirijs. Hęc autem viscerum inflammationem, ad quam febrem lypiriam sequi vult, intelligit vniuersalem quandam interiorum partium phlogosim. Nam ex particulari membro inflammato, nunquam apud eum reperio lypiriam nominatam, imò potius aliquando, referens antiquorum sententiam sic ait. *In quibus sine partis inflammatione, putrescentes in venis humores febrem accendunt, in illis solis dicebant hominem febre molestari, & ipsum à febre haberi. Atque in ipsis febrium scripserunt differentias Hepialon, lypiriam, Eloden, & Typhoden, pestilentem, & Causon, idest ardorem nominantes. Hepaticam, autem febrem, vel lienosam, aut pulmoniam, aut latheralem nemo dixit. Sic Galenus,*

Gal. 2.
progn. 4.

Gal. 4.
aph. 48.

Gal. 7.
aph. 42.

lenus, qui tamen, vel sibi parum constans, vel antiquorum dicta nihil curans, alibi ita scriptum reliquit. *Alia est enim forma febris phrenitica, & peripneumoniaca, & pleuritica, & hepatica, itidem, & aliarum omnium febrium, quæ ex inflammatis quibusdam particulis accenduntur, sed & alia rursus formæ sunt earum, quæ ex erysipelatibus accidunt, & febris ardens, vel maligna, vel pulmonis, vel hepatis, aut ventriculi erysipelatibus supervenit.* Sed his omiſſis (quisque enim ad libitum mihi videtur nominibus vsus: quippe Aetius lypiriam febrem, inquit, esse, quando in ventriculo erysipelas existit, typhoden, quando in iecore, crimnodem, quando in pulmone. Galenus tam lypiriam, quam typhoden, quam etiam crimnodem ad eas reducit febres, in quibus interna vruntur, externa algent) vnum mente tenere oportet, quod de bubonibus dixit Hipp. & ad omnes inflammationes potest extendi, si ex illis ad cor simplex alteratio distendatur, febris erit ephemera, si vapores putridi mitantur, tunc non potest non prava esse febris, putrida, & ut plurimum maligna, quæ tamen erit symptoma: propterea caute à Vallesio, existimante febrem, quæ symptoma est, semper esse ephemeram.

Alui combusta pauca egerebat-- Ut alui excrementa adustionem, sic urinae tenues decolores, cruditatem præferebant. Galenus in quadam, quæ apud Pantimedem degebat, & febre ardente laborabat, cruda verò excrementa, crudasque eiecit urinas, suspicatur, in tota mole corporis biliosum fuisse acervatum humorem, in primis autem venis lactium, & simis iecoris

*Gal. 2.
cris. 7.*

*Aet. tr.
2. serm.
I. c. 4.*

*Gal. 2.
prog. 4.*

*G. 3. e-
pid. sect.
2. agro,
10.*

cruda contenta. Et quia crudæ erant vrinæ, vt crudæ deiectiones, ait, non solum in primis venis, sed etiam in gibbo iecoris, crudos humores abundasse. In presente, quoniam deiectiones erant biliosæ, & vrinæ crudæ, dicemus in parte concaua iecoris fuisse biliosa, quæ per intestina mittebantur: in gibba autem cruda, quæ per vrinam. Nisi magis velimus dicere fæces, tinctas multa bile, ad intestina descendisse, serum autem humorum, propter biliosam portionem, ad caput raptam, remansisse sine colore, ac propterea, ait, fuisse vrinas decolores, signum ascendentis materiæ ad caput.

Multum delirauit, & rursus resipiscebat. Non erat adhuc phrænesis, propterea delirium non erat continuu. Et hoc est notatu dignum, quoniam pars biliosi humoris crassior, fæcibus admixta, per aluum descendebat, iccirco fæces erant adustæ, portio verò subtilis ad caput ascendebat, ideo vrinæ remanebant decolores, ac quoniam hæc pars subtilior in cerebri raritate non poterat permanere, effluebat, ac proinde non faciebat abscessum, sine abscessu autem nondum est facta phrænitis.

Octaua super rignit. -- Infausta valde fuit hæc octaua dies, in qua omnia, quæ antea aderant, longè grauiora sunt reddita. Habuit de nouo rigorem, quem non fuisse salutarem, preclare innuit, dum ait *super rignit, febris acuta* quippe si rigor incidat (inquit summus Dictator) febre non deficiente ægro iam debili, lethale est. Non defecit febris, imò creuit (nam cum Hippocrates ait *febris acuta*, significat febrem exacerbata, nam

aliàs

aliàs iam antea febris erat acuta) si febris increvit in rigore, vel post rigorem, certè rigor lethalis fuit, præcipuè ægro iam debili; debilitas namque ex octo dierum vigilijs, deiectionibus, laboribus, pro hypothefi habetur.

Sed cur non fuit rigor salutaris? nonne, à *cau-* *H. 4. a-*
sone habito, rigore superueniente solutio? Mulier *ph. 58.*
 ista causone, hoc est, febre ardente erat apprehensa, nihilominus rigor non potuit criticus appellari, subinde, nec morbi iudicationem, solutionemq; asserre. Non fuit autem criticus, tum quoniam non præcesserunt coctionis signa, tum quia incidit die octauo, qui decretorius non est, tum denique quoniam nullam habuit subsequentem euacuationem, ut alui fluxum, sudorem, vomitum bilosum; hæc enim, non rigor, sunt, quæ febrem solvunt, ut Galenus in commento, & alibi dixit.

Glande subdita exurgebat. Hoc suppositorium fuit ad expurgandas fæces *προέτα, βάλανον*, apposita hæc suppesitoria glande, crebrò exurgebat ad deijciendum, quod attestabatur magnam humoris mordacitatem: acquisiuit enim materia per adustionem empirrheusi, quæ mordax est. Porro ista empirrheusi, tam erat in fæcibus, quæ per aluum deijciebantur, quam in vaporibus, qui ad caput ascendebant, proinde crebro exurgebat ad deijciendum, ob mordicationem in intestinis, & simul *sonni non aderant*, ob mordacitatem in cerebro, accedit, quod crebra exsurrectio occasionem dormiendi auferebat. Fuit autem hæc euacuatio tam multiplicata in quantitate, quam in numero, ideo non
 solum

solum crebro exurgebat, sed etiam multa cumflu-
xione prodibant. Verumtamen sine conferen-
tia: quippe sequente die, hoc est, NONA
conuulsiones supervenerunt, quod prauum quidem
est, dicente Hippocrate, melius esse febrem
conuulsioni supervenire, quàm febri conuulsio-
nem. Conuulsio febri superveniens prava erat,
sed multò deterior, quia supervenit defectionib.
cum enim teste eodem Hippocrate, *conuulsio*

H. 6. *aph. 39.* fiat ex repletione, & inanitione, ea, quæ ex ina-
nitione fit, longè deterior est. Cæterum cum
dicat Hippocrates, hanc mulierem passam
fuisse conuulsiones, in numero plurali, existima-
re debemus, passam fuisse non conuulsionem
veram, in qua pars conuulsa rigida manet, sed
eam, quam aliqui spuriam appellant, Galenus
non conuulsionem, sed motum conuulsivum,
& Avicenna spasmus non proportionatum
ad materiam; fitque magis ex materia mordic-
cante, quàm ex eadem vel implente, aut ina-
niente, siuè, quod idem apud me est, hume-
ctante, & exsiccante. Consonant igitur omnia; si-
quidem acrimonia, quæ vigilias in capite, cre-
bram defectionem in ventre efficiebat, eadem
in genere nervoso potuit prestare motum con-
uulsivum.

Multa de conuulsione possem per parergon
hic adducere, quæ commodiore loco pertracto.
Sufficit nunc summam scire, eam esse motum
depranatum, non ablatum, quamvis mem-
brum conuulsivum rigidum maneat, & videat-
ur in motu: est quidem in motu, sed in motu
tonico; est motus depravatus, licet in eo ita se
gerat

gerat musculus; vt se gerit in motu secundum naturam, videlicet retrahendo se ad suum principium. cæterum in motu secundum naturam, operatur libertas voluntatis, in conuulsione, causa morbifica, fit enim conuulsio tota à causa præter naturam: neque enim est actio mixta, vt sternutatio, & rigor, de quo superius diximus, qui fit à causa præter naturam; & à natura irritata.

Decima parùm resipiscebat -- Non erat phrænitis, hoc est, non habebat delirium à causa permanente, sed à vaporum ascensu, propterea delirabat, & resipiscebat. Cæterum, qui vidisset egrotam decima die aliquantulum resipiscere, & vndecima dormire, existimaret, rem in melius progredi, & inciperet aliquid boni sperare, verum in magnis, & malignis ægritudinibus cunctandum est in prædictione, & euentus expectandus: quippe hæc statim in fine vndecimæ ad delirium fuit reuersa. Quæret fortassè aliquis, cur decima, & vndecima habuit aliquam quietem, delirium intermisit, & recordata est? Erant isti extremi naturæ conatus, quæ licet cum potentissimo hoste pugnet, à quo victoriam obtinere est impossibile, sed tandem victa concidet, nihilominus in pugna aliquem se se tuendi, licet per exiguum tempus habet locum.

Vrinam autem reddebat -- Cum medicus ad omnia attentus esse debeat, rectè in præsentī Hippocrates optimus medicus, immò optimus medicorum, in vriuatione duo considerauit, nēpe, symptoma circa actionem læsam, & aliud

circa excreta. Actio erat deprauata : siquidem non reddebatur vrina naturali modo, sed multam, aceruatam, cum conuulsionibus, & monentibus ijs, qui assisteabant : Cur monentibus his ? nunquid non pungebatur ab vrina ? sanè vrina, vti cætera, debuit esse mordax, verum mens ægrotabat, ac proinde ægra, presente doloris causa, dolorem non sentiebat, & obliuiscetur meiere, postea admonita, reddebat multam, aceruatam. Sic diximus de respiratione, sic de potu : æger enim mente laborans obliuiscitur respirare, & postea vna respiratione magna, supplet vicem multarum, sic bibere obliuiscitur, & si admoneatur vt bibat, multum simul, & tumultuario bibit. Idcirco reddebat aceruatam multam, quia non nisi admonita eam reddebat. Cæterum hoc magis pertinet ad mentis læsionem, quam ad vesicæ : quod autem reddebat vrina, cum conuulsionibus, causa esse potest, quod vterus vesicæ nimium propinquus, aliquantulum præterfluente per vicina loca vrina, pungebatur, trahensque in consensum vniuersum genus musculosum, conuellebatur, quamuis autem rarum esse, dicat Galenus, ex vtero conuulsiones fieri, fiunt tamen, præcipuè motus conuulsivi, quales sunt epilepticorum. Vel dicendum, partes illas circa vterum ex mictione recipere aerem, cuius frigiditate conuellerentur, & traherent reliqua in consensum, atque hæc de actione vitiata.

Excretum etiam vitiosum erat. Erat quidem alba, & turbata, veluti vrina, quæ multo tempore fuit reposita. Albus color, vel pituitam significabat,

ficabat, quod aliquis posset existimare, nam, somnus vndecimæ diei potest fuisse ex colliquata à calore pituita, quæ cerebrum irrigauit, & subinde somnum inducit, hoc pituitosi humoris colliquamentum potuit per vrinas excerni, ac ita erant vrinæ albæ, sed ob efferuescentiam à calore febrili erant simul, & turbidæ. Verùm, non existimo, post tot dierum igneum calorem tantam relictam fuisse pituitam, quæ huiusmodi vrinas faceret, potuit pituita in principio liquari, in fine autem non aderat. Melius videtur dicendum, fuisse turbidas ob ebullitionem, albas verò, quia deerat bilis, à qua tingerentur, deerat, inquam, quia denuo ad cerebrum raptà, nouum excitauit delirium, maxime, quia erat veluti iumentorum, & capitis affectum significabat.

Quod autem esset turbida, & turbida, remaneret turbida, prauum fuit, signum, triplicem enim turbidarum differentiam assignat Galenus, vel cum turbidæ mictæ sunt, & paulò post *Gal. 1. cris. 12.* residet, vel semper turbide permanent, vel puræ quidem minguntur, postea verò turbantur. Quæ enim statim residet, parùm aliquid inequalis turbulentia superesse demonstrat, quæ semper similis remanet, vigere adhuc, quæ est in sanguine, agitationem, ostendit, quæ verò extra cõturbatur, debet adhuc incipere concoqui, hæc tertia omnium est pessima, sed illa media medium habet prauitatis locum; talis autem fuit ista de qua loquimur, neque poterat pura mingi, & extra turbari, quoniam morbus erat iam adeò vltra progressus, vt non esset iam, cur ex-

pectaremus coctionem : erat ergo in summa agitatione, ac propterea, vrina erat micta turbida, & turbida perseuerabat. Cumque esset iam vltra vndecimam diem, nullam habebat subsidentiam, signum manifestum, humores in venis existentes, nullam à calore naturali culturam accepisse.

Circa decimumquartum diem -- Vbi ergo nulla erant coctionis signa, flatus multos abundasse patet, qui, per membra insinuati, varijs in locis palpitaciones excitabant. Suspicio etiam, has palpitaciones factas, ex ebullitione sanguinis in venis. Et profectò, quo magis progressus est morbus, eo materia magis turgentiam præseferbat: quippe vapores, flatus, & sanguis nunc in venis, & alijs corporis partibus palpitabant, mox inde ad caput sanguine accedente, multiloquij erat causa, accedentibus amplius vaporibus biliosis, augebantur deliria, secedebant omnia à cerebro, & resipiscebat, hæc ad intercurrentes nervos delapsam, aphoniæ causam præstabant. Inter hos labores mulier conflictata se se ad vigesimam perduxit, in qua, cum natura crisin moliri vellet, bonam efficere non potuit; nec enim erat in humore talis apparatus, qui ad bonam crisin conferret, quare victa tandem occubuit.

Fuit autem dies vigesima iudicatoria ad malum: quippe vt Hippocrates ait; *Febres iudicantur ijsdem numero diebus, & ex quibus supersunt homines, & ex quibus intereunt*. Hoc est vnius, & eiusdem morbi terminum ad salutem, cum signis salutaribus, & terminum ad mortem,

cum

*Hip. 3.
prog. 1.*

cum signis lethali-
bus esse, eundem. Quamuis
autem Galenus dicat, cum vno signo quosdam
citò mori, quosdam tardè liberari, hoc nihil
prædictæ sententiæ aduersatur: Nam loquitur
de identitate signi, non de identitate morbi.
nam si sedimentum apparuerit farinaceum in
morbo acuto, mors breui sequetur, in longo,
tardè liberabitur. Occubuit mulier ista
non die vigesimo decretorio celeberrimo,
cuius perfectionem alibi
cum Galeno decla-
rabimus.

Gal. 7.
aph. 31.



ÆGROTVS

QVINTVS.

PICRATIS vxorem, quæ decumbebat apud Archegetem, partui iam propinquam rigor fortiter corripuit, non incaluit velut dicebant. Et postridiæ eadem erant. Tertia die peperit filiam, & alia omnia iuxta rationem venerunt. Postridiæ à partu febris acuta eam inuasit, cordis dolor, & muliebrium partium, Vbi verò glandem subdidisset, hæc quidem leuiores facta sunt, capitis autem, & colli, ac lumborum dolor. Somni non aderant. Ab alio modica, biliosa, tenuia, pura prodibant. Urinæ tenues sub nigrae. Sexta die, à quo febris ipsam corripuit, ad noctem delirauit. Septima, omnia exacerbata sunt, vigilans delirauit, siticulosa, secessus omnes biliosi abundè colorati. Octaua super-riguit, plus dormiuit. Nonna per eadem. Decima crura laboriosè dolebat. Cordis dolor rursus, capitis grauitas, non delirauit: magis dormiuit: alius restitit. Vndecima sudauit, minxit melius colorata, multam subsidentiam habentia: lenius degebat. Decimaquarta super-riguit: febris acuta. Decimaquinta vomuit biliosa flaua satis multa. sudauit, sine febre. Ad noctem febris acuta: urinæ crassæ subsidentiam albam habentes. Decimasexta ad noctem exacerbata est, & cum molestia, non dormiuit, delirauit. Decima octaua siticulosa, lingua combusta est: non dormiuit: multum delirauit: crura dolebat. Circa vigesimam

mam mane parum riguit, soporosa quiete dormiuit, vomuit biliosa; pauca nigra. Ad noctem surditas. Circa vigessimam primam lateris sinistri grauitas, per totum cum dolore; parum insuper tussijt. Vrinae crassae, turbatae, sub rubrae, quae depositae non subsidebant: caetera, leuiora, non sine febre. Statim ab initio fauces dolebat, rubor aderat; columella reuulsa, fluxio acris mordax, salsa, perpetuo perseue rabat. Circa vigesimam septimam febris libera, in vrinis subsidentia: latus dolebat. Circa primam, & trigesimam febris corripiebat: alius ex biliosis turbata est. Quadragesima die vomuit pauca biliosa. Indicata est perfecte libera à febre octogesima.

Partui iam propinquam -- Similem morbum, & ferè eadem symptomata habuit vxor Philini, & vxor Epicratis, de qua nunc agitur, sola differentia est in principio, & fine. Principium illius fuit post partum, istius ante partum, finis illius fuit mors, istius fanitas. Vtraque biliosis humoribus permixtis cum pituitosis scatebat, sed in hac plures aderant pituitosi, quàm in illa. Signum huius rei inter alia est rigor prima, & secunda die, à quo non incaluit: Verisimile enim est, hunc rigorem à pituita vitrea fuisse factum, quippe si à bile, nō potuisset nō incalescere. Sed nonne diximus antea cū Galeno, antiquos non cognouisse rigorem sine febre? ita est, & Galenus iccirco apposuisse Hippocratem, vt ferebant, propter rei nouitatem. Profectò non videtur credibile, eos omnino non cognouisse rigorem sine febre, sed rarum esse existimarunt, quod Galenus refert ad illius saeculi frugalitatem. Caeterum quoniam praegnantēs, ob vitiosos succos in ventri-

culo aceruatos, pica soleant laborare, praua edulia semper appetunt, præcipuè fructus, & & res acerbæ, potuit ergo contingere huic mulieri, quod contigit adolescenti, nempe, rigor sine febre ex esu glandium viridium ex palmulis collectarum, ista potuit acerbos fructus, aut similia in cibo vti, vnde & rigor, quem Galenus spontaneum vocat; cæterum licet ex prauo sit victu, spontaneus tamen est, nam non spontaneum solum dicemus eum, qui fit ex aspersione aque frigide, occursum frigidi aeris, combustione, medicamento acris vlceri imposito.

Tertia die peperit filiam -- Cum prius dixisset partui esse propinquam, significauit esse extra octauum mensem, in quo mense si factum emisisset, abortus foret, sed postquam octauus præterijt, & ingressus est nonum, partus fuit perfectus, non diffiteor fuisse acceleratum, propter concussionem rigoris, nihilominus iam fuit in tempore opportuno, & quemadmodum cum fructus in arbore iam maturitatem est assequutus, parum refert, an vento concussus cadat, an manu colligatur. Ita etiam, maturo iam existente, factu, nihil refert, an fuerit ab aliqua causa præter naturam partus prouocatus, an ex solius naturæ lege accersitus. Illud existimo faustum fuisse, quod *omnia iuxta rationem euenerunt*, nempe secundas emisit, & puerperia processerunt, vt par erat. Hæc purgatio non potuit non esse utilis, & sanguinis missionis vicem supplere.

Postridie à partu -- Ceterum in corpore admodum caco chymo, & iam ferè ægrotante parien-

di labor, & dolor ignem accensit in humoribus crudis, & biliosis, ac proinde febris acuta fuit excitata, cum defluxu putrescentis istius humoris ad vterum, & lumbos, & circumuicinas partes. Non narrat purgationes cessasse, vt cessarūt in Philini vxore, si cessassent, non possent non plegmonem in vtero excitare, nihilominus vterus violentiam in partu maximam passus, indoluit; reliqua omnia, vt in præcedente, grauiā apparuerunt per decem dies, ita vt similis euentu, timendus foret. Sed inter alia quæ habuit pessima, fuerunt vrinæ tenues subnigræ. Diceret tinctas ex purgationibus, sed ex his apparere solent sanguineæ, grumis plenæ, crassæ, tenues subnigras prauas esse diximus, tum, ob tenuitatem, tum ob nigredinem, existimo aliquam humoris nigri portionem eas tinxisse.

Sexta die à quo febris -- Distinctè loquitur, & ne aliquis existimet, sextam diem esse à partu, ait, sextam diem à febre, quæ fuit à partu octaua, numerat autem à febre dies, non à partu, vt indicet partum istum fuisse naturalem, ac proinde computandos esse dies ab aggressu febris; sexta ergo die, & septima magni incendiij signa apparuerunt, delirauit sexta, & vigilans delirauit septima, hoc est maiori delirio erat afflicta: nam cœpit inter dormiendum delirare, postea etiam inter vigilandum, hoc delirium, cum vigilia, fitis, qua premebatur, & deiectiones abundè coloratæ, hoc est multa bile saturatæ, adurentis caloris soboles erant, sicut etiam rigor octaua die superueniens,

Crura laboriosè dolebat -- Hoc habuit noturnum, quod cæteris malis nona die accessit, nempe, dolorem crurum, qui potuisset esse utilis, decumbente materia ad partes inferiores, verum adhuc nulla conspiciebatur conferentia, nam omnia graua persisterant: siquidem simul cum dolore crurum, aderat cardialgia, & capitis grauitas, sed hoc solum bonum habuit, quod non delirauit: quippe cum materia esset mixta, ex biliosa, & pituitosa, biliosa ob suam tenuitatem, & irrequietam conditionem ad ventriculi os, & ad crura se se contulit, pituitosa remanens in capite, minùs excalefacta, grauitatis sensum impressit, somnumque conciliauit, ideo ait, *magis dormiuit, aluus restitit*, quia; nempe, iuxta partes, ad quas materia se conferebat, symptomata eueniebant, contulit se ad ventriculum, & crura, dolebant hæ partes, deseruit caput, & intestina, præbuit locum somno; & non dedit occasionem irritationi: quare ægra magis somnolenta, & minùs irritata, dormiuit, & aluus ei restitit.

Vndecima sudauit -- Quemadmodum, si post horrendam procellam, & aeris obscuritatem, sydus aliquod appareat, lætantur nauigantes, ita debuit lætitiâ afferre signum bonum, quod in hac vndecima die primum apparuit, nempe, vrina, & in colore, & in contentis melior, de substantia non dicit, sed credibile est hanc quoque fuisse satis laudabilem. Hoc semper in febribus obseruate, cuncta signa bona cum vrinarum prauitate nullam fidem merere, & è contrario, cuncta signa praua cum vrinis bonis,

nis, non omnino esse terribilia. Non negabo in valde pestilentibus, vrinas apparere bonas, & tamen ægrotantem perire, nihilominus, siquid in medicina est, cui fides sit habenda, sunt coctiones, quas securitatem significare, dixit Hippocrates.

Considerare oportet in hac die vndecima, die satis considerabili, fuisse sudorem, fuisse urinam, meliorem, quam antea, fuisse conferentiam: siquidem, *lenius degebat*. Duo erant diuersa, nempe, causæ, & signa, vtraque decretoria, causa fuit sudor cum conferentia, signum vrina, cumque dies vndecima sit, & decretoria, & indicatoria, quatenus decretoria habuit euacuationem, quæ potuit morbum iudicare, sed non perfectè, quia habuit vnâ conditionem, alteram non habuit, nempe, habuit hanc, quod fuit in die decretorio, non habuit illam, quod fuit cum præcedentibus coctionis signis; nullam enim prius coctionis fecerat mentionem. Et ita sudor fuit quidem euacuatio proficua, sed non multum, & propterea, vt videbitis non perseuerauit subleuatio, sed statim priora redierunt.

Quatenus dies indicatorius, habuit urinam, quæ decimam quartam, & decimam septimam bonam poterat polliceri, bonus enim color, prima bonitas est in vrina, neque enim, à multo bilioso humore reddita erat valde saturata, subsidientia est signum sequestrantis naturæ utile ab inutili, erat tamen subsidientia multa, melius fuisset, si per gradus accederet, & prius apparuisset nebula, postea æneorema, tandem hypostasis. Adducor igitur, vt credam, non fuisse ve-

ram

ram hyposthasim, hoc est, concocti humoris portionem, sed potius pituitosum humorem, simul cum urinis eiectum, quæ eas reddidit melioris coloris, ac deinde, reposita urina, suo pondere fundum petijt. Confirmor in hac sententia, quia, si vera est hyposthasis in undecima, non potuisset non morbus decimaquarta, aut, ad summum decima septima, indicari, & tantum abest, quòd hoc euenerit, ut potius ad quadragessimum morbus fuerit protractus. Igitur pluris faciendus fuit sudor, quàm urina, quippe sudor præfens aliquod bonum attulit, nempe, ut aliquantisper ægra sublenaretur, urina non iudicauit rectè: Nam decimaquarta, non solum non fuit sequuta liberatio à febre, sed potius rigor non decretorius: iam enim audistis, rigorem non esse utilem, nisi secum afferat aliquam euacuationem, sed nullam attulit, immò, *decimaquarta supervignit febris acuta*; hoc est, ad rigorem non sequuta fuit refrigeratio, sed excalfactio, contra normam boni rigoris.

Decimaquinta – Sudor, & sublenatio à febre, quæ die decimaquarta euenire debuerat, euenit decimaquinta, & tanta est dierum criticorum dignitas, ut, quoniam hæc sublenatio extra diem criticam euenit, durabilis non fuit, hoc tamen habuit bonum hæc febris, quòd aliquoties quiescens, inducias præbebat, ac proinde ægrotantis vires reficiebantur.

Ad noctem surditas – Post nigram vomitionem surditas accessit, quam Autor Coacarum non timet, inquiens *in nigris vomitionibus surditas non nocet*, quam sententiam nec Hollerius, nec

Duretus recipiunt, sed tanquam falsam rei-
ciunt. nam in prorrheticis æruginosi vomitus si-
mul cum surditate, ad insaniam perducere dicū-
tur, & Galenus ibidem, æruginosos viam esse ad
nigros, quare si æruginosi prauī sunt, prauiores
sunt nigri. Vomitus fit per consensum a cerebro;
quando igitur cerebrum est occupatum, vt sur-
ditas ostēdit, estq; occupatū ab atra bile, vt ostē-
dit vomitus niger, sperāda est insania vehemēs.

Hoc quamuis ita se habebat, tamen in hac
muliere delirante ob atram bilem, quæ ce-
rebrum occupabat, & ventriculum ad vomitum
proritabat, surditas aliquid profuit, quia humor,
a cerebro ad auditorios meatus detrusus, minis
nocere poterat, quam si in cerebro permansis-
set. Fuit igitur in die vigesima hæc surditas cri-
tica, hoc est, veluti quidam abscessus, factus a
natura expellente materiam prauam, ex mem-
bro magis principe ad minus princeps. Itaque
vel surditas fit, ex soluta facultate, & tunc est le-
thalis, quod in præsentē non est dicendum, nam
ex alijs signis cognoscimus, facultatem non esse
penitus ex solutam, vel est firmata, & antiqua,
& hæc prorsus est incurabilis. Vel superuenit fe-
bri, si superueniat initio febris, tunc, *surditas in*
acutis turbulentis mala, sic Clazomenius a princi-
pio obsurduit, & quarto die desipuit. Et Her-
mocrates, qui mox obsurduit, quinto delirauit,
& Phylista, qui secundo obsurduit, & eodem
circa meridiem insaniit. Cum ergo turbulentia
fiant in principio, augmento, & statu, in his
temporibus surditas raptum humoris ad caput
indicat, estque prauus turbulentia affectus.

At

*1. prorr.
sect. 1.
32. & 6.
epid. sec.
5. rex. 13
& in
Coac.*

At Epicratis vxor, de qua agimus, in vigesima die erat constituta, vrinæ reductæ ad meliorem frugem, omnia sedari incæperant, quare magis ex adueniēte surditate delirij solutionem, quam delirij aduentum possemus prædicere. Vidi multoties surditates in acutis pessimas, & quarum consentanea erant deliria. Vidi pluriès delirantes, surditate superueniente, liberari. Quid ergo sperandum ex hac surditate, contingente iam iuxta declinationem? nempe, superuenturum, vel sanguinis è naribus fluorem, vel alui fluxum ex quibus morbus soluetur, sic Hippocrates, quibus in febribus aures obsurduere, his sanguinis è naribus profluens, aut perturbata aluus morbum soluit; sanguis è naribus non fluxit, sed propè morbi solutionem, videlicet, circa trigessimam primam, aluus biliosis turbata est, & quadragesima fuit iudicata. Sed quæret aliquis, cum crisis fieri soleat manifestis euacuationibus, quænam fuit euacuatio, per quam ista mulier fuit iudicata? nempe biliosa deiectio, quæ trigesima prima incepit, tum vomitus biliosus, qui quadragesima die accidit. At respondebit, vomitum fuisse exiguum. ita est; ac propterea iudicatio fuit imperfecta: quippe per alios quadraginta dies cum febre transegit, donec octogesima tandem die perfectè à febre fuit libera. Ita vt, cum morbi soluantur, & per iudicationem, & per simplicem solutionem, hic morbus vtroque mordo fuit terminatus; per iudicationem quidem, sed imperfectam, ideo quadragesima iudicata est, per simplicem tandem solutionem, octogesima perfectè à febre libera.

*Hip. 4.
aph.60.*

Occurrit in historia vnũ duntaxat magni momenti considerandum, videlicet, Hippocratem vrinarum boni coloris, & subsidentiam habentium, in hac ægrotante mentionem fecisse, quod non fecisset, si illi fluerent conuenienter lochia, idest, puerperia, nam tunc multo sanguine conspurcatæ vrinæ, vix medicis conspiciendæ offeruntur. Habuit ergo suppressas purgationes, & hoc etiam indicant varia symptomata, quæ in hac historia narrantur, omnia puerperiorum, cessationem testantia, quomodo igitur potuit euadere, purgationibus istis non superuenientibus? nam mulier morosa, superuenientibus purgationibus mensuris, euasit. In hac Epicratis historia scimus purgationes cessasse, quod (vti diximus) testantur vrinæ puræ, & symptomata superuenientia; non constat autem has purgationes superuenisse, neque enim id silentio, prætermisisset Hippocrates. Mihi videtur Hippocrates, venam ex talo, aut ex poplite huic mulieri secari iussisse, & fortasse non semel, sed pluriès, at sanguinis missio ex cruribus, vel prouocat purgamenta vel saltem supplet eorum vicẽ, misit sanguinem huic mulieri, & missione sanguinis suppleuit purgationes, atque iccirco, non superfluentibus purgationibus, potuit liberari. Non meminit, autem venæ sectionis, quoniam non solet curationem narrare.



ÆGROTVS SEXTVS.

CLEANACTIDEM, qui supra He-
racleum decubebat, febris corripuit er-
roneo modo. Dolebat autem caput abini-
tio, & latum sinistrum: & aliarum par-
tium dolores aderant lassatorum modo. Febres exa-
cerbabantur aliàs aliter inordinatè. Sudores quan-
doque, quandoque non. Exacerbationes vt pluri-
mum in iudicatorijs diebus magis accedebant. Circa
vigesimalquartam summas manus dolebat. Vomuit
biliosa, flana, satis multa; paulo post autem erugino-
sa. Ab omnibus alleuatus est. Circa trigesimam
sanguis ex vtrisque naribus erumpere capit, atque
hoc erroneo modo paulatim, vsque ad iudicationem.
Non autem fastidiebat cibum; neque siticulosus erat
per totum tempus; neque in somnis. Urinæ tenues
non decolores. Circa quadragesimam minxit subru-
bra, subsidentiam multam valde rubram habentia:
alleuatus est: post hæc autem urinæ variæ quando-
que subsidentiam habebant, quandoque non. Se-
xagesima urinis subsidentia multa, & alba, &
lævis. Remiserunt omnia: febres intermittebant.
Urinæ tenues quidem, verum boni coloris. Septua-
gesima à febre liber permansit diebus decem. Octo-
gesimo riguit, febris acuta corripuit: multum suda-
uit. Urinis subsidentia rubra, lævis, perfectè iudi-
catus est.

Febris corripuit erroneo modo—Miratur Mercu-
rialis, cur inter constitutionis pestilentis ægros,
qui

qui tunc fuerunt, recenseat hunc, qui nulla habuit pestiferi morbi indicia, sed statim ab initio longioris morbi, & salutaris prætulit argumenta. Miror ego Mercurialem, qui in hoc ægro maligni, & pestilentis morbi signa non cognouerit; fuerunt quidem, quorum non pauca ab Hippocrate narrantur, ut nos singula perscrutantes, monstrabimus. Interim sine dubio scitote, illud, quod idem ait, nempe, in Peste quoque fieri morbos non pestiferos, falsum esse, immo pestiferæ, seu pestilentis constitutionis hoc proprium esse, ut omnes morbos ad se conuertat. Et ipsemet Mercurialis, inter alia signa, pestis, hoc præcipue tradit, quod omnes morbi in idem genus conuertantur, & desinant. Marfilus Ficinus in suo antidoto affirmat, tempore pestis, nullam præter pestem, ægritudinem apparere. Et Andreas Gallus, ait, cum pestis vires in vna regione vigent, quicumque morbus tunc acciderit, etiam si puer vermibus molestetur, pestifer erit. Consonat his Thucydides, qui in sua pestilentia sic euenisse narrat: *Si quis antea aliquo morbo laborabat, in hunc omnia conuertebantur.* Egrotauit igitur Cleanactes, grauiter, sed morbus in progressu mitior fuit redditus, quare æger euasit; neque enim in quantumuis horrenda pestilentia omnes moriuntur.

Corripuit igitur Cleonatiden ~~ære~~ ignis, hoc est, febris magna, & vehemens, ut intelligatis, hanc sua magnitudine præcedentibus non esse inferiorem, exacerbationes erant erratico modo, hoc est, non sibi inuicem respondentibus

Merc. in prælect. de peste c.7. Ficin. in antid. c.

4

pari lege repetitionibus, hoc tamen non tollit, quominus fuerit continua: nam continuæ proportionales suas repetitiones habent, respondentes repetitionibus intermittentium, possuntque esse vel tertianariæ, vel quartanariæ, vel singulorum dierum, vel tandem inordinatæ, quas vocant medici erraticas, Hippocrates *πλανήτας*, in præsentē verò *πεπλανημένους* hoc est, erranter. Celsus has febres incertas vocat, intelligite, incertitudine paroxysmorum, quod Galenus declarat, quod est nullo circuitus ordine, ut nunc v. g. tertio, vel quarto quoque die febricitaret, nunc quinto, vel sexto.

Dolebat autem caput — Multum referret, si nobis explicaret huius doloris cōditionem, vtrum, scilicet, fuerit acutus, an pulsatorius, an vero grauatius, & vtrum in posteriore, an in anteriore capitis parte, num fixus, & continuus an qui euanesceret, aut repeteret. Quid hæ differentię secum portent, nos explicabimus, interim memores estote, raro esse febrem, in qua caput non doleat; cum enim, ut Hippocrates ait, concavum sit, & veluti cucurbita corpori incumbat, ad se trahit, & illuc corpus vapores omnis generis, teste eodem, demittit, quare rectè appellari solet totius corporis caminus, & ex consequente, quando in corpore incendium viget, necesse est, ut in camino fumus superfluat. Sunt aliqui (sed rarò) quibus caput adeo robustum est, ut nunquam illis doleat.

Et latus sinistrum — Galenus de difficultate respirationis, ex hoc lateris dolore colligit, hunc ægrotum difficilem habuisse respirationem, tamen

men id omiffum ab Hippocrate, vt pote valde manifestum. Et quidem videtur, fimul cum lateris dolore femper paruam, & frequentem adesse respirationem, tamen nec propterea credatis fuisse pleuriticum, nam alias tuffis excreatur, quod præcipuum est inter pleuritidis signa, mentionem feciffet.

Et aliarum partium dolores aderant lassatorum more -- Cum non fit vna tantum lassitudinis species, nec vnus tantum omnium lassitudinum dolor, oportebat, vt nobis significaret, fuerit ne dolor tensiuus, an grauatiuus, an compositus ex vtroque, & hunc tertium magis fuisse existimo: quippe cōsentaneū est Cleanactidē, vt alia signa ostendunt, & plenitudine, & cacochymia laborasse, ac subinde affectū habuisse phlegmonosū.

Vt plurimum iudicatorijs diebus -- Proprium esse pestilentium in diebus decretorijs exacerbari, decretum est à Galeno, quod cum Cleanactidi euenerit, mirum est quod Mercurialis, immò & Galenus salutaria omnia in hoc ægro tanti inuenerint, forsitan magis ex euentu, quàm ex rationis norma iudicantes. Cum ergo omnibus morbis commune sit, decretorijs diebus agitationem pati, hæc in salutaribus victoriam naturæ attribuit, in malignis eandem, vel proster nit, vel satis fatigat, ita vt salubres diebus criticis, meliùs habeant, insalubres autem deteritis.

Sanguis ex vtrisque naribus -- Præcedens capitis dolor aut vomitum, aut sanguinis fluorem è naribus significabat, vtrumque accidit, Vomitus, quidem, non ob culpam ventriculi: nulla enim in eo erat noxa, quod constat, quia nec si-

ticulosus erat, neque in appetentiam patiebatur. Quare miror Vallesium, qui huius mali mineram in ventriculo constituit. Si verò quærat ab eo, cur nec sitim, nec inappetentiam stomacho læso? respondet id accidisse, quia multus, & crudus, frigidusque humor erat. Sed hoc præter rationem est dictum, nam ab exeuntibus cognoscimus, biliosos potius, quam pituitosos fuisse humores, deinde humor multus, licet, crudus, & frigidus, inappetentiam facere est aptus, vel saltem famis carentiam, quippe nec inanitio, nec diuulsio tunc sentitur. Multò minùs mihi placet, quod ait, humores fuisse non solum in capacitate ventriculi, sed etià intra eius tunicas: at tunicæ ventriculi humore excremētatio imbutæ, possunt non excitare nauseā, vti cavitās vomitū.

Exiuit igitur sanguis copiosus, quæ laudatissima est euacuatio in ardentibus febribus, dico copiosum, quia si fuisset stiliæ sanguinis, id declarasset Hippocrates, vt in alijs fecit. Caput igitur ob repletionem totum doluit, propterea per vtramque narem se exonerauit. Erat hoc opus naturæ circa materiam morbificam, satagentis, cumque adhuc non adessent signa coctionis, magis impetu, quam lege sua ducebatur, ac proinde inordinati erant motus, & sanguis inordinatè fluebat. Et fortassè quia febris erroneo modo affligebat, in qua etiam erroneo modo solent rigores accedere, omnia etiam alia erroneo modo se gerebant, inæqualitatem materiarum attestantia. Durauit tamen isthæc euacuatio vsque ad diem crisis, nempe, natura peruices se se exonerante, & quod vnica expul-

sione præstare nequiuit, pluribus multiplicatis præstitit.

Minxit subrubra — Ex hac vrina, poterat medicus sanitatem polliceri, addito tamen in prognosi, quod adhuc duraturus fuit morbus, vt re vera accidit: siquidem quadragesima die has vrinas subrubras cum sedimento valde rubro minxit, & morbus ad octogesimam fuit prorogatus, perfectè tamen iudicatus.

Multum sudauit — Mirum, quod sudore fuerit iudicatus, cum tamen multiplex adfit ratio, ob quam abscessus foret sperandus; tum quia febris erat laboriosa, in qua Hippocrates fieri abscessus sic ait, *lassitudinem habentibus in febribus, in articulos, & circa maxillas potissimum abscessus fiunt.* tum quia erratica continua: sicut enim erratica intermittens abscedit in quartanam, sic continua in articularum tumores, vt Galenus nos docet. Tum denique quia diuturna, dicente Hippocrat. *Quibus febres longæ, ijs tubercula, vel labores in articulis fiunt.* Attamen per totum morbum visa fuit natura ad sudorem inclinare, quapropter eam viam faciliorem inuenit.

Subsidentia rubra — Perfecta iudicatio fuit, quàm præcedere debuisset subsidentia alba, vt-pote perfectæ coctionis index, præcessit rubra: quippe etiam hæc, vbi adest fortis naturæ contentio, sufficit ad criticam expulsionem. In cuius rei gratiam animaduertite, sexagesima die febre, ex continua factam fuisse intermittentem, quod idem est, ac si dicamus, naturam redditam superiorem potuisse materiam, quæ prius intra venas putrescebat extra venas emit-

H. 4. a.
ph. 31.

Gal. 3.
cris. c. II
Hipp. 4.
aph. 44.

tere, & quolibet paroxyſmo portionem euincere. cum igitur in paroxyſmo octogefimæ diei expulſio facta fuiſſet copioſa per ſudorem, videtur natura, & coctum, & ſemicoctum ſimul, parta ſemel victoria, expellere potuiſſe. Ad-

moneo tamen

vos, ne ex

hoc

agrotantem addiſcatis, criſim breui

futuram polliceri, cum adhuc ſe-

dimentum non eſt ynde-

quaque perfe-

ctum.



ÆGROTVS

SEPTIMVS.



METONEM febris vehemens corripuit, lumborum grauitas dolorosa. Postridie; vbi aquam bibisset satis multam, ab aluo probè prodyt. Tertia capitis grauitas secessus tenues, biliosi, subrubri. Quarta omnia exacerbata sunt. Fluebat à dextra nare bis sanguis modicus. Noctem molestè tulit. Secessus similes tertie diei. Vrinæ subnigræ, habebant quiddam in medio innatans, subnigrum, diuulsum: non subsidebant. Quinta effluxit ex sinistra nare sanguis largus, merus. Sudauit iudicatus est. Post iudicationem in somnis delirabat. Vrinæ tenues, sub nigræ. Capitis lotionibus vsus est: dormiuit: resipiscebat. Huic recidua facta non est. Sed sanguis erupit sæpe etiam post iudicationem.

Lumborum grauitas dolorosa -- Plerosque ex ægrotantibus illius tempestatis dolor lumborum comitabatur, quod in plenitudine contingit, repleta scilicet vena caua ascendente, quæ per lumbos discurrit, & tensionem cum grauitate faciēte. Febris igitur cum plenitudine synocha fuisse videtur, nempe, ex sanguine iam quodammodo in bilem abeunte, propterea meritò aquæ potu copioso eam Hippocrates curauit: quippe credibile est, ægrum, nonnisi iubente medico, potum largiorem frigida haufisse. Poterit tamen aliquis negare, medici consilio fuisse vsum; quippe non dum aderant coctionis no-

tæ, quæ requiruntur à Galeno ad exhibendum aquæ potum.

Fluebat à dextra nare bis sanguis modicus— Quarta hac die, sanguinem è naribus pigrè admodum egressum fuisse, non esset in bonis ducendum. Duretus existimat perniciosum signum fuisse, & Metonem in magno periculo fore, ni Hippocrates lotionè capitis vberiore hemorhagiam prouocasset. Verùm hoc ridiculum admodum est, nam quarta die apparuit sanguis paulatim fluens, quinta fuit iudicatus, post iudicium mansit vigil, & delirus, ad quæ duo symptomata respiciens, lotionè capitis vsus est, quid conferre potuit hæc lotio ad sanguinis fluxum, qui iam antea die quinto fuit copiosus. Profecto, quemadmodum sanguis parcè fluens, quia est diminuta euacuatio, si die decretoria contingat, prauum est: neque enim morbum potest iudicare, ita si contingat in die indicatoria bonum esse potest, quasi incipientis euacuationis indicium. sic paucus sudor in die indicatoria, copiosum sudorem in decretoria pollicetur. Atque hæc sunt signa, quæ

*Gal. 1. Galenus signa simul, & causas appellat. Alter-
cris. c. 14 rum genus (inquit ille) non solum signorum decreto-
ricum, sed etiam causarum obtinet vicem. Sunt
vero hæc vomitus, & excrementa alui, & multitu-
do vrinarum, & sudores, & sanguinis eruptiones, &
parotides, atque alij decubitus. Ceterum illud
semper pro indubitato habete, securiores esse
febres, in quibus natura nihil excernit, quam
in quibus pauca, & inutilia. Et huius rei triplex
potest assignari ratio, prima, quia interim su-
spicio*

Spicio adest naturæ coctioni incumbentis, secunda, quia signum est materiam, nec copia, nec qualitate irritare, tertia, quia abest timor translationis ad membrum princeps, quæ translatio fieri solet ex euacuatione tentata, sed non perfecta.

Noctem moleste tulit -- Non erat adhuc sequuta euacuatio, caput autem, extranmisso in vapores conuerso sanguine, satis graue, nec cessabat natura, etiam per inferiora, deiectiones precedentibus similes, expellere; vrina etiam secum ferebat adusti humoris portionem, multis flatibus permixtam, siquidem contenta non subsidebant.

Quinta fluxit ex sinistra -- Quoniam vrina nigra, & nigrum vrinæ contentum magis ad lienē suspicionem mali deferabant, ideo dicendum est, rectitudinem seruata fuisse, cum sanguis fluxerit per sinistram narē; fluxit, autem, copiosus, tum a natura transmissus, tum ab arte adiutus. Cæterum duo hic occurrunt, in quibus medici mens hæere debet. Primum factam fuisse crisin, non vna, sed duabus euacuationibus, valde inter se diuersis, nempe, hæmorrhagia è naribus, & sudore. Alterum iudicationem istam fuisse perfectam; siquidem sine recidua; immò & Galenus perfectam fuisse ait, & tamen precedentis coctionis nulla fit mentio. Quod attinet ad primam hæitationem. Respondeo, in Metone naturam iam antea fuisse sanguinis flori inclinatā, quem, cū perfecisset, remanens exonerata, potuit aliā euacuationē salubriter tētare. Quod si vtraq; simul esset, nullum foret inconueniens, impe-

G. 2. diff.
fic. resp.
c. 10.

G.3.cris.
c.2.

impetu actam naturam, hanc illam suscepisse
viam, immò & artifex medicus in magno peri-
culo multa simul, & diuerſa molitur, ſperans ſic
naturam adiutam iri. Videndus eſt Galenus, qui
vnam, vel plures ſimul euacuationes in criſi con-
cedit. Quod attinet ad ſecundum, fuit, quidem
perfecta criſis, non tamen vno impetu absoluta;
ſed per plures continuata; ſufficit, autem, quod
præcipua euacuationis pars in die critica inci-
piat, vt poſtea, id quod ſubſequatur, vtile ſit. Si
vero quæras, cur ſine præcedente coctione po-
tuit criſis eſſe perfecta, reſpondeo ab Hippocra-
te, tamquam quidpiam rarum, fuiſſe hoc adno-
tatum: nam ait. *Huius recidiva facta non eſt* cuius
rei cauſam exiſtimat eſſe, quia poſt iudicatio-
nem ſanguinis fluxus è naribus continuauit: qua-
ſi hac euacuationis repetitione diminuta fuerit
materia, adeò, vt non ſuperfuerit tanta, quæ po-
tuiſſet feбри fomitem præſtare. Et de ſanguinis
fluxu ſpontaneo idem, quod de venæ ſectione
fit, dicendum puto: duo de ſanguinis miſſione
ſunt comperta, vnum ad hoc auxilium non eſſe
neceſſariam coctionem, quod Auicenna inculca-
uit, alterum ſanguinis miſſione leuatam natu-
ram ab eo, quo veluti ſarcina premebatur, ſui
còpotem remanere. Hæc eadem fluxui ſanguinis
ſpontaneo accommodemus: nam, nec requirit
antecedentem coctionem, & naturam à ſarcina
leuat, vt poſſit, quod reliquum eſt, conco-
quere.

ÆGROTVS

OCTAVVS.

ERASINVM, qui habitabat circa Bootæ torrentem, febris vehemens corripuit post cenam. nocte turbatus fuit: diem primam quiete, noctem laboriosè transegit. Secunda omnia exacerbata sunt, ad noctem deliravit. Tertia dolorosè, multum deliravit. Quarta molestissimè ad noctem nihil dormiuit. Insomnia, & ratiocinationes: deinde peiora, & magna, & periculosa, timor, molestia. Quinta mane resipiscebat, ac intelligebat omnia. Verùm ad meridiem multum insanijt: continere se non potuit. Extremitates frigida, sub livida, Urinae inconcoctæ; circa solis occasionem mortuus est?

Huic febres perpetuo cum sudore: præcordia sublimia: distentio cum dolore. Urinae nigra, habentes quædam in medio suspensa, innatantia, rotunda, non subsidebant. Ab aluo stercora prodibant sitis perpetuo, non valde. Convulsiones multæ cum sudore circa mortem.

Quamvis post cenam in febrem incidit, ne tamen iccirco exilimetis cum Mercuriali, causam procatarcticam huius febris fuisse opiparam comestationem in illa cæna, neque enim fieri potest, vt statim à cibo assumpto, febris accesserit. Hanc ille sibi difficultatem obijcit, & respondet ex Galenò, ex frequentato prauorum

G. 2. de al. fac. c. de cucumere. rum eduliorum usu, copiosos humores colligi qui qualibet leui occasione febres *κακονθεις* accendant, propterea in Erasini corpore prauis humores ex prauo victu cumulati, potuerunt, occasione liberalioris cænæ, incallescere. Putat ergo, hanc historiam esse quasi exemplum detrimenti, quod sequitur ad errores commissos in cibo, & potu. Et profectò, si recte attendamus, Galeni mens non abhorret ab hac sententia: siquidem, cum Erasinus mortuus fuerit in fine quintæ diei inquit *quintus itaque ab initio quo discessit, non numerato primo, quartus efficitur.* quasi velit prima die fuisse febrem ephemeram, factam ex calore cænæ, propterea ex secundâ die debere incipere computationem. Nihilominus melius mihi videtur, hanc historiam esse notabile exemplum repentinæ inuasionis febrium pestilentium: Cum enim nihil mali præsensisset, & optimè cænasset, nulla præeunte lassitudine, nulla futuri mali suspitione, subito post cenam veneno, quod intus latebat, se se manifestante, grauius caput ægrotare. Philista, ex longis potationibus caput grauius dolebat, postea quadam nocte dolor solito grauius esse cepit, & *incaluit primum.* Adolescens Melibæ ex nimio potu, & Venere diu calefactus decubuit, notate illud *diu*, quod præteritas computationes significat. Quidam alius incaluit, & postea cænauit, habuit scilicet ægrotandi occasionem, & principium ante cnam. De Erasino longè aliter narratur,

3. epid. sect. 2. ægrot. 4.

ratur, videlicet, vehementi febre post cœnam fuisse correptum, neque adhuc cœna nocendi tempus habebat. Subitam verò malignorum inuasionem significauit Hippocrates enarrans pestilentem constitutionem his verbis *sacri ignes multi hos cum occasione affecerunt, illos non, qui maligni cum essent, multos interemerunt*. cui consonat Thucydides in enarratione pestilentiae suo tempore grassantis. *alios ex nulla euidente causa, sed subito cum sani forent*. H. 3. ep. sect. 3. tex. 9.

Fateor quidem magnum laboriosae nocti attulisse ante actam cœnam, & melius habiturum si non cœnasset. Cæterum cum nulla impendentis mali habuisset indicia, qui potuit à cibo abstinere? cum ergo pleno ventri febris superuenisset, anxietudines fuerunt maximæ. Si enim sanis ventriculus, cibis grauatus, toti corpori *δυσσπείαν* quandam inducit, ob quam, ut habetur, patiens in lecto inordinatè iactatur. 2. acut. 22.

Quamuis autem prima die, cessante noctis impetu, aliquantulum quieuit: neque enim paroxysmus ad sequentem noctem remisit, sed die declinavit, noctu reuersionem fecit, ut hinc intelligatis, male Mercuriali hanc febrem continentem acmaesticam fuisse dictam. Cur acmaestica? quia scilicet, ait ille, semper in deterius vergebat. At impertinens est isthæc ratio. Nunquid non moriuntur etiam homines ex continuis proportionalibus, quæ suas habent staturas

tutas exacerbationes? immò maximè. Deinde sciat oportet, ac mastica non ita dici, quia symptomata in deterius vergunt: hoc enim pacto, non nisi acmastica posset interimere, dicitur igitur acmastica, quoniam febrile incendium in dies maior fit, cum id quod resolvitur fit minus, quam quòd incenditur; sicut è contrario, quando id, quod resolvitur est magis, fit paracmastica, cum vtrumque est æquale, omotonos. Sed dicetis symptomata sequuntur morbum, velut umbra corpus, si igitur acmastica fit semper crescendo, similiter & symptomata semper ulterius progredientur, ad quod, omisis multorum inutilibus distinctionibus, respondeo, axioma illud symptoma sequitur morbum velut umbra corpus, recipi, quidem non tamquam pronuntiatum vniuersale, immo potius tamquam sententiam, quæ multoties fallit, quod à Galeno poteritis addiscere. Nam sic ait, *sæpius affectio, quæ laborant, mitior quidem existit, sed symptomata augentur, ut in phlegmone obsecsis particulis, 2. apb. 4. cum pus conficitur dolores, & febres fiunt, magis quàm postquam confectum est, sæpius autem mutuis exultant incrementis decrementisque symptomatum magnitudines, & ea quæ affectionis est.*

*Gal. 3.
acut.
cons. 62.*

Tertia dolorosè multum deliravit — Appellat, ut mea fert sententia, delirium dolosum querimonias deliras, contingit ægrotantibus, qui mente non constant conqueri assiduo, nec tamen, si interrogentur, rationem querimoniarum reddere, sed tamen quæruntur, & grauissimum malum esse iudico; periit enim in his iudicium,
re-

remanet naturalis instinctus, instinctu queruntur, iudicij defectu non exprimunt, cur querantur. Si verò obijciatis, eos, qui dolorem non sentiunt mente laborare. respondeo, verum esse, sed non vicè versa, hoc est, quoties adest manifesta doloris causa, si æger non conqueratur, id fit ob mentis læsionem. potest tamen mentis læsio adesse, & æger conqueri, illis magna obliuio facit, vt quærimonias obliuiscantur, in istis applicatio naturæ relinquit quærimonijs locum.

30 Dolorem quidem sentiunt etiam delirantes, neque Hippocrates id negaret, quamuis dixit *dolorem non sentiunt, sed non sentiunt*, quasi diceret, non sentire videntur: quoniam non conquerruntur. Tria in dolore concurrunt, vnum obiectum, alterum sensus, in quo fit dolor, tertium potentia, in qua fit doloris cognitio, quam Aristoteles phantasiā, Hippocrates mentem vocat; iuxta hæc tria tripliciter potest cessare dolor. Primo ablato obiecto, hoc est, curata doloris causa, vt quando dolores ex calido frigoricis, aut ex frigido caloricis curamus, aut solutionem continui emendamus. Secundo quando deest sensus, vt in oculo cæci, aut in aure surdi, quantumuis validum adsit obiectum, non potest fieri sensatio, & hoc modo medemur doloribus per narcotica; quippe sensus tactus, in ea parte cui obstupefactum remedium adhibemus, cessat. Tertio quando potentia, in qua debet fieri cognitio, est læsa, & hoc pacto deliri dicuntur dolorem non sentire. Cæterum duo hic notate, vnum ex defectu obiecti, aut organi dicitur verè non adesse dolor, ex defectu potentia,

tia, adest quidem dolor, non tamen adest doloris cognitio. Hinc est, quod in prælio vulnerati, aut quouis alio modo non aduertentes, exiguo temporis spatio non queruntur de dolore, postea in se ipsos reuerfi, nulla re denuo adueniente, dolere se aiunt. Alterum notatu dignum est, non ex omni mentis læsione, nec in omni dolorifico obiecto, doloris priuationem contingere. Nam in potentia internæ actione deprauata, causa levis obliuione inuoluitur, si verò eundem delirantem fortiter astringatis, dolens exclamat. In potentia internæ ablata actione, vt in forti apoplexia, nulla omnino sensationis apparent signa, adeo vt vrantur, neque prorsus moueantur. In actione diminuta, prout magis, aut minus actio est diminuta, maiora, aut minora obiecta sentiunt, videbitis apopleticos, si astringantur, contrahi, dormientes verò, qui longè leuius habent actiones impeditas, leuiter puncti contrahuntur.

Itaque in dolore est sensatio, & hæc fit in suo organo, est cognitio, & hæc fit in potentia interna. ad sensationem sequitur cognitio, nisi adsit impedimentum, quale adest in ijs, quibus mens ægrotat, ad cognitionem adest quærela, quæ si cognitio distincta sit, optima cum ratione peragitur, sin confusa, non fit cum ratione. Erat Erasinus mentis confusione impeditus, quare querebatur sine ratione, quod Hippocrates ait *dolorosè delirabat*. Cæterum, videor mihi contrarius, qui initio dixi, conqueri delirantem instinctu naturæ, nunc dico conqueri cognitione confusa, at instinctus nullam

lam supponit cognitionem. Ego vero existimo, nihil aliud esse instinctum, quam cognitionem confusam, quam, vt vnâquæque pars corporis habet ad conseruationem sui totius, ita vnumquodque indiuiduum ad conseruationem speciei, & partes, etiam mundi, ad conseruandum vniuersum.

Nihil dormiuit, insomnia, & ratiocinationes — Duplex videtur inuolui contradictio, vtramque expedio. Prima est, si nihil dormiuit, quomodo aderant insomnia, quæ non nisi dormientibus adsunt? Altera, si somniabat, quomodo ratiocinabatur? Quod attinet ad primam: cum somnus sit quies corporis, & animi, meritò somnus ille, qui *ταραχώδης*, hoc est, turbulentus appellatur, quippe aliquando dormiunt furiosi, sed in somno exclamant, profiliunt, iactantur, somnus, vt pote, qui non est quies. Vnde rectè dicit non dormiuit somniauit: non dormiuit, inquam, quoniam non quieuit, somniauit, quoniam non erat vigil. Quod attinet ad secundam sermocinatio, ratiocinatioque in somno etiam naturali multis per sanitatem contingit, quanto magis in somno turbulento, qui laboriosam vigiliam potius, quam somnum representat.

Circa Solis occasum mortuus est — Sub finem quintæ diei, cum sextæ appropinquaret, obiit. Exacerbationes habuit, nunc in diebus paribus, nunc in imparibus: quippe proprium est malignorum, nullum seruare ordinem. Adeo autem acuta fuit hæc febris, & signis stipata lethalibus, vt potuerit die quarta occidere, nihilominus tam ad bonum, quam ad malum crises ex suo die

decretorio ; facile in sequentem dilabuntur , quod & tarditati lunaris accessus , & naturæ innato robori , & remediorum potentia attribui potest. Ad sextam, non potuit accedere præ gravitate morbi , & oppressione naturæ , neque si accessisset euaderet : nam & sexta est veluti tyrannus , & præcedentia nihil boni sperare sinebant.

Huic febres perpetuo cum sudore. — Febres dixit in numero plurali , ut hinc magis conuincatur opinio dicentis , fuisse fynochum . Fuit febris , quæ plures habuit accessiones , non quidem intermittens ; nam sic periculo vacaret , sed continua proportionalis . Fuit semper cum sudore , ac proinde dicenda est febris , quæ ab Hippocrate in epidemijs *ἰσπώδεις* appellatur ; & à veteribus dicebatur *τυφώδεις* & *ελώδεις* , in quibus ab initio ad finem perpetuò sudat ; sudor tamen iste inutilis est , imò perniciosus , nihil enim secum , nisi virium deiectionem , afferre potest . Dicitur *ἰσπώδεις* hoc est sudorifica . Dicitur *τυφώδεις* quasi fumosa , quia in ea multi exhalant fumi , ex quibus concrescit sudor ; dicitur *ελώδεις* hoc est humida , palustris , in hac enim corpus (vultu dicam) redditur palustre .

Prinæ nigrae — Has in progressu narrationis crudas appellavit hoc est non coctas : quemadmodum enim albæ , & aquosæ crude sunt ; quia infra coctionem subsistunt . Sic nigrae , quia in coctione non consistunt , sed materia , quæ concoqui debuerat , adurit . Quod vero addit ultimo loco , circa noctem fuisse convulsiones multas cum sudore , & mentionem tunc particularem

larem sudoris facit, quamuis toto morbo sudauerit. Hoc indicat, extremum istum sudorem esse alterius conditionis à priore: nimirum sudor frigidus iam qualitate prauus: multum adijcit prauitati, modo excretionis, & loco, modo si exitu pigro, veluti miliaris exsudet, loco, si tantum capite, & collo. Cæterum quod conuulsiones comitem habuerint sudorem, nihil deterius poterat euenire: quippe sudor iste diaphoresin, hoc est resolutionem, & conuulsio virium prostrationem, inferit. Duobus autem adeo



ÆGROTVS NONVS.



CRITONI in Thaso erecte ambulanti, pedis dolor fortis à magno digito caput. Decubuit eadem die horridus, anxius, parum subcalescens: nocte desipuit. Secunda die tumor laxis per totum pedem, & circa malleolum sub rubens cum distensione. Pustulæ nigrae: febris acuta: insaniit. Ab aluo verò merà, biliosa, satis multa prodibant. Mortuus est altera ab initio die.

G.6. loc.
affect.

Acerbissimus hic morbus, & citò interimens nobis exemplo esse potest innati in corpore veneni, cuius mentionem facit Galenus. Potest aliquis existimare cum Mercuriali, ex maligno, & pestilente abscessu in pede facto, auram venenatam ad cor fuisse transmissam, cuius vi febricitauit Crito, & velociter fuit mortuus, quod potest probari exemplo adolescentis, cui è digito pedis aura adscendens ad caput epilepticos paroxysmos inducebat. Cœterum dupliciter accidere potuit iste abscessus in pedem, vel per metastasim, vel per epigenesim. Per metastasim, transmutata materia ab aliquo interno ad pedem, dummodo tamen inde per palindromiam, hoc est, per recursum iterum ad cor reuerteretur. Per epigenesim autem, hoc est, per propagationem, quia, scilicet, venenum, in aliquo membro

intus

intus latens se se propagauit, tum ad pedem, tum ad cor, & quod quietum prius manens non offendebat, postea agitatione periculum, immò interitum inuehexit. Hoc autem est proprium abscessuum pestilentium, vt deteriores, cum apparent, reddant febres; quia scilicet prius intra corpus venenum cohibitum suas vires non admodum prodidit, postea, iam sine fræno agens, deterioris mali est causa.

Itaque de ambulanti pedis dolor fortis à magno digito capit. Potuit deambulatio occasionem præbere huic descensui. Si impurgatus (inquit Hippocrates) laboraueris, victa erumpent. cur? nempe; quia exercitio humores ad cutem euocantur, qui prius erant, quia corpus erat cacochymum, ita etiam venenum, quod prius latebat, occasione deambulationis, se se contulit ad pedis digitum.

Fuit dolor fortis, locus est neruis multis præditus, ac proinde sensu exacto. Sed dolorem augebat materiæ malignitas, quæ multum confert ad augendam doloris magnitudinem. Decubuit in primis horridus, tum quia, patientibus neruulis digitis pedis, compatiebatur vniuersum venosum genus, tum quoniam humoris concitati motus horrificas febres efficit. Erat insuper anxius, non vitio stomachi, etenim nulla simul aderat nausea, quæ anxietudines è ventriculo ortas solet comitari, non ex summa debilitate, propter quam æger membrorum pondus sustinere non potens, iactatur, at tanta debilitas nondum aderat, erat ergo anxius propter malignitatem, quæ cor petebat. Erat parum
sub-

subcalescens, quod indicabat oppressionem naturæ, propter quam non poterat promptè calorem ad externa effundere.

Nocte desipuit — Proprium est (vt Fernelius optimè adnotavit) non solum cor, sed omne, etiam princeps, quare venenum istum & cor & cerebrum fuit aggressum, in corde ostenditur ex febre, & anxietudine, in cerebro ex delirio. Altera die crevit tumor per totum pedem, non ita tamen, vt materia decumbens in illam partem defereret alias nobiliores; erat igitur tumor laxus, hoc est ædematosus, nempe ex ferocitate humoris, cui malignitas maximè imprimitur. Sed quamvis in pede erat ædematosus, circa malleolum magis inflammatus partem distendebat, & sic dispar erat in exiguo loco materia; altera ædema, altera inflammationem efficiens, nam, vbi distentio aderat, aderat etiam rubor. Ceterum inflammatio non erat simplex, hoc est, ex sanguine benignissimo humore, sed ex sanguine maligna qualitate infecto, quod cognoscebatur ex pustulis nigris, quas possumus dicere, fuisse ex adusto sanguine carbunculos. Ex adustione materiæ calor febrilis factus fuit mordax, ac proinde febris magis quam antea, acuta, & delirium, quod prius erat duntaxat desipientia, nunc, propter adustionem, conuersum erat in insaniam, hoc est in furorem vehementem. Adustio identidem acutiem materiæ præstavit, biliosam diarrhæam suscitavit, ad quæ nihil profecit ad detrudendam materiam ad inferiora, quippe fomes malignus intus latens, remanebat, qui potuit adeo cor gangræ-

A P P R O B A T I O.

D. Hipolitus Nardus Medicinæ Doctor videat,
& referat, si in hoc opere reperiat, quod
fidei Catholicæ, vel bonis moribus aduersetur.
27. Nouemb. 1654.

Vinc. de Bardis Vic. Gen. Flor.

Doctissima hæc in Hipp. Ægrotos Comment.
eximij olim Viri Steph. Roderici Castrensis atten-
tè perlegi, nec quicquam Catholicæ fidei, bonisue
moribus aduersum reperi, immo vtile, & exopta-
bili, cunctis opusculum hoc fore censui, si typis de-
mandetur.

Ego Hippolytus Nardus M. P.

Stante suprascripta relatione imprimat. seruatis
seruandis 30. Ianuarij 1654.

Vinc. de Bardis Vic. Gen. Flor.

D. Anton. Badij Medicinæ Doctor videat dili-
genter presens opus, & referat: die prima Februa-
rij 1655.

*Fr. Iacobus Cima de Seza Inquisit.
Gener. Flor.*

Reuerendiss. Pater. Accuratè perlegi eruditis-
sima hæc Stephani Roderici Castrensis Præcepto-
ris mei commentaria. Quæ sicut & omnia alia ip-
sius opera, celeberrima, ac Litteratis omnibus ex-
optanda existimo. Ideo perutile erit cunctis, vt Ty-
pis mandentur.

Ego Antonius Badium M. P.

Attenta supradicta relatione. Imprimatur.

Fr. Iacobus Cima Inquisit. Gener.

Alexander Victorius Senator, Sereniss. Magni
Ducis Audit.